

**NATIONAL ASSEMBLY OF
SEYCHELLES**

Tuesday 20th June, 2023

The Assembly met at 0902am

National Anthem

Moment of Reflection

Mr Deputy Speaker in the Chair

MR DEPUTY SPEAKER

Bonzour tou Manm Onorab; tou *staff* Lasanble Nasyonal e gran piblik ki pe swiv travay Lasanble Nasyonal pour sa Mardi le 20 Zen. Byenveni. e mon ava dir en bonzour spesyal bann zelev Lekol La Pointe Larue ki dan Galeri ozordi. *Welcome to the National Assembly* e mon swete ki zot pas en bon moman avek nou ziska ler zot ale pli tar.

Donk nou ava pou komanse, demann Madanm Clerk pour fer prezantasyon bann papye ki devan Lasanble pour ozordi silvouple.

MADAM CLERK

Mersi Mr Speaker. Bonzour Mr Speaker. Bonzour tou bann Manm, nou bann *staff* Lasanble, bann zanfana Lekol

Pointe Larue Segonder e osi nou bann dimoun ki a lekout.

Nou annan de papye ki pe ganny prezante, de *Committee Reports*.

The Women's Parliamentary Caucus, 2022 Annual Report e The Annual Report 2022 for the International Affairs Committee. Mersi Mr Speaker.

MR DEPUTY SPEAKER

Mersi Madanm Clerk. Donk san tarde nou pour bouz lo nou *Order Paper* ozordi ki –. Anr dan bann papye ki'n prezante nou annan Prezantasyon Papye *Annual Report* pour *Caucus* Madanm, donk mon ava demann *Chairman* Komite Onorab Esparon pour fer sa e pour *IAC* osi mon prezimen zot pare avek rapor ki nou kapab fer apre?

Donk mon a donn laparol Onorab Esparon.

HON REGINA ESPARON

Mersi Mr Speaker. Bonzour tou dimoun a lekout. Bonzour tou Manm Onorab. Bonzour spesyal pour bann zelev sorti distrik Pointe Larue, Lekol Pointe Larue dan Galeri. Mr Speaker san tarde, mon ti a kontan prezant Rapor *Caucus* Madanm pour 2022.

Caucus Madanm in reste angaze pandan lannen 2022, dan lannen, dan sa lannen 2022 nou'n fer nou 8 *meeting* ordiner e nou'n reste angaze ek bann lezot *stakeholders* dan sosyete ki pe travay pour promouvwar lentegrite bann madanm.

Pour le 8 Mars lannen pase nou ti zwenn avek Anbasader Franse ki ti pe kit pei apre son Kontra e Anbasader li enn son bann spesyalite i kontan regarde *gender-based violence*, i en *issue* ki i ti pasyonnen avek, nou ti zwenn pour diskite. Nou ti osi zwenn avek groupman ki travay avek *COMFWB*, ki travay avek bann madanm ki dan biznes. Nou ti zwenn avek ansyen *CEO SNYC* pour nou fer preparasyon en travay pour *International Democracy Day*.

Nou'n osi rankontre avek *Virtuous Woman Seychelles*, en groupman relizye ki travay avek bann madanm. Nou'n zwenn osi avek en lorganizasyon ki apel, "*End Rape in Seychelles, ERIS*." Pour Lazournen bann Madanm osi nou ti onor de madanm ki ti deza Manm Parlman dan setyenm Lasanble ki ti'n sorti.

E nou ti annan nou en gran - nou ti fer nou en *workshop* lo "*The sexual and*

Gender-Based Violence" e sa ti ganny finanse par Linyon Eropéen an kolaborasyon avek *SADC*.

Nou ti osi fer en vizit kot Lekol Eksepsyonnèl avek Lekol Sourd, pour vwar ki bann *challenges* ki zot pe fer fas avek e pour *International Democracy Day*, nou ti zwenn avek en groupman, en group zenn sorti dan bann lekol segonder pour - kot i ti angaze avek Lasanble ek kot nou ti annan bann *leaders* osi ki ti adres zot, lo demokrasi dan Sesel li menm e ki mannyer Lasanble i travay vizavi demokrasi.

E lafen lannen nou ti zwenn avek, nou ti fer en vizit kot Sainte Elizabeth akou nou ti anvi vwar parske laba i annan en *daycare* ki pe, ki ti pe fer fas avek en pe problem ki son leta pa ti tro, tro bon. Nou ti zwenn avek zot pour nou regarde ki mannyer nou kapab pous devan pour zot kapab ganny finansman pour refer sa *daycare*.

E osi letan nou ti laba, nou ti profite pour nou, pour nou vwar, pour nou vizit bann madanm, i annan en ward madanm kot Sainte Elizabeth, nou ti vizit bann madanm ki pe reste laba.

E pour, *Gender-Based Violence Week* sa 16 zour kot i

mark, i mark sa lalit kont *gender-based violence* i annan en mesaz ki ti ganny, ki ti ganny lir dan Lasanble, nou apel sa “*The Orange Week*”, ki ti ganny lir dan Lasanble pour sansibiliz bann lasosyete lo size vyolans kont bann madanm.

E Mr Speaker *Caucus* Madanm Lasanble i reste angaze pour travay ek bann diferan groupman ek lasosyasyon, pour promouvwar lentegrite bann madanm, zanfan ek bann ki pli vilnerab dan sosyete.

Nou kalandriye pour sa lannen i osi byen sarze, e nou'n swete ki nou fini akonplir tou sa ki nou annan nou plan. Avek sa de mo Mr Speaker, mon annan plezir pour prezant Rapor *Caucus* bann Madanm pour 2022 avek Lasanble. Mersi.

MR DEPUTY SPEAKER

Mersi Onorab Esparon e nou ava demann *parliamentary reporter* pour kolekte rapor. Donk prezan mon ava pas laparol avek *Chairperson* Komite *IAC* Onorab William pour prezant rapor avek Lasanble silvouple. Mersi.

HON WAVEN WILLIAM

Mersi Mr Speaker. Mr Speaker rapor in ganny table, e depi en pe letan. So mon napa

lentansyon, aköz mon mazine bann Manm in fini pas lo sa rapor, si i annan okenn keksoz ki Manm i anvi leve, zot ava met devan Komite *IAC*. Mersi.

MR DEPUTY SPEAKER

Sertenman e zis pour rapel bann Manm osi anba nou *Standing Orders*, i fer provizyon ki nou kapab kestyonn bann Manm solman an relasyon avek zot travay dan Lasanble donk par egzanp bann *Chairman* si zot anvi.

Nou ava kontinyen. Mersi pour sa. Nou ava kontinyen ek ou *Order Paper* pour ozordi bomaten. E prosen item i *Private Notice Question*. Donk nou ava demann *parliamentary reporter* pour apel delegasyon pour sa kestyon silvouple. Mersi.

Donk prezan nou ava swet labyenveni delegasyon ki fek zwenn nou pour reponn *PNQ* e avek nou ozordi bomaten i annan Vis-Prezidan Mr Ahmed Afif, i annan Brigadier Michael Rosette ki *Chief Defence Forces*, e Mr Christian Lionnet ki Depite Sef Egzekitiv Lakonpanyen Devlopman Zil *IDC*.

Welcome to the National Assembly e mon ava demann *Leader* Lopoziyon pour demann son kestyon silvouple.

HON SEBASTIEN PILLAY

Mersi Mr Speaker. Bonzour e bonzour tou koleg Onorab. Bonzour bann zanfan lekol ki dan Galeri avek zot bann ansennyan e bonzour tou dimoun ki a lekout.

Mon le swet osi en bonzour pour Vis-Prezidan ek son delegasyon Brigadier Rosette e Mr Lionnet lo lapar IDC. Mon kestyon pour Vis-Prezidan i lir koumsa Mr Speaker:-

Vi ki Gouvernman in pran desizyon pou permet konstriksyon en devlopman touristik lo Assumption, ki'n arive avek son plan pou annan en baz Gard Lakot lo sa zil? Mersi Mr Speaker.

MR DEPUTY SPEAKER

Mersi Onorab. Nou ava envit VP pour larepons.

THE VICE-PRESIDENT AHMED AFIF

Mersi bokou Mr Speaker. Bonzour Mr Speaker, bonzour *Leader* Lopozisyon tou bann Manm Lasanble, tou bann zelev Lekol Segonder Pointe Larue, tou dimoun a lekout.

Mr Speaker premyerman mon oule konfirman ki sa ki Gouvernman i aprouve se pour permet okenn dimoun ki

enterese pour devlop sa de zil, pour vin devan e pour montre zot lentere.

Byensir sa pour dan kad ki IDC ti eksplike le 14 Zen 2023 semenn pase; setadir pour permet devlopman touristik lo de zil ki enkli Assumption.

Akoz en devlopman touristik Assumption e ki pour arive avek nou prezans Gard Lakot lo sa zil? Premyerman les mwan eksplik rasyonel lenvestisman tourizm lo Assumption. Mr Speaker i enportan pour nou konn en pe plis lo nou zil Assumption. Zot a rapel Komite Zil Lasanble Nasyonal dan dernyen Lasanble, e kot ou menm Onorab ou ti form parti sa Komite, i ti fer en travay vreman detaye lo tou nou zil ki enkli Assumption.

E mon a *quote* dan sa rapor Mr Speaker, ki ti en rapor enterim, ki ti ganny *tabled* le 5 Out 2020. Me ladan parmi plizyer keksoz ki i koz lo la, siperfisi sa zil ki 11.6kilomet kare, i pli gran ki La Digue, aktyelman. E parmi bann lezot eleman dann sa rapor i ti koz - mon ava al lo son bann rekomandasyon.

E i enportan pour nou fer sa revi dan listwar, parske sete

en travay ki devan Lasanble Nasyonal e ti ganny *tabled*.

E i ti dir ladan ki, “vi ki Aldabra ki en leritaz mondyal e Sesel in fer en kado Aldabra pour lemonn, e vi ki Assumption i tre pre 30kilomet avek Aldabra, Assumption i annan en misyon tre spesifik, pour li protez Aldabra”. Mon pe *quote* dan rapor.

Alor komite i rekomann-de ki Assumption i zwe en rol tou lede, kot i annan en rol touristik koman en *stepping stone* pour Aldabra e an adisyon Assumption i devret annan en rol konservasyon.

In mete ladan poudir en pti letablisman touristik i devret ganny fer lo sa zil, pour azir koman en *transit hotel* pour Aldabra, oubyen *as a holiday establishment* pour okenn dimoun ki anvi ale, pour vizite enkli Seselwa.

E i dir touris i kapab, zot kapab zwir enn bann pli zoli lans ki annan 6kilomet lans e byensir Assumption e Aldabra tou lede i annan en *dive site* ki tre ris e *deep sea fishing* i kapab fer.

Prezan lo *Coast Guard* ki form parti sa kestyon ki devan nou ozordi. Lo *Coast Guard* i dir ki, vi ki bokou in ganny koze lo prezans militer, e nou konnen ki sa letan, *India* ti enterese

pour fer en baz militer Komite Zil li i krwar poudir...

MR DEPUTY SPEAKER

En moman *VP*. Mon fek aprann ki sesyon Lasanble pa pe transmet lo radyo. Mon ti ava prefere ki si i ganny rektifye avan ki nou kontinyen.

Ok it's been rectified? So we proceed. Was it on the same point Leader of Opposition? Ok! Same point we proceed. Mersi.

HON SEBASTIEN PILLAY

Mr Speaker.

MR DEPUTY SPEAKER

Sorry pour lenteripsyon.

HON SEBASTIEN PILLAY

Mr Speaker avek ou permisyon. Eski i posib pour mwan redemann mon kestyon pour ki dimoun i konnen ki nou pe diskite, si zot pa'n ganny sans swiv komansman?

MR DEPUTY SPEAKER

So savedir *VP* nou pour bezwen *take it from the top*. *Ok. Ok* i manz dan nou letan, nou pour etablir, nou pour mentenir presedans ki'n deza etablir otour *PNQ* ziska 10er. Donk *proceed Leader* Lopozisyon.

HON SEBASTIEN PILLAY

Mersi Mr Speaker. Mon soufer mwan, kantmenm SBC ki fer fot mwan ki peye. Mr Speaker mon kestyon pour Vis-Prezidan i koumsa:-

Vi ki Gouvernman in pran en desizyon pou permet konstriksyon en devlopman touristik lo Assumption, ki'n arive avek son plan pou annan en Baz Gard Lakot lo za zil? Mersi Mr Speaker.

MR DEPUTY SPEAKER

Mersi. *VP* ava *proceed*.

THE VICE-PRESIDENT AHMED AFIF

Mersi bokou Mr Speaker. Mr Speaker premyerman mon ti le konfirman ki Gouvernman in aprouve, sa ki'n aprouve se pour permet okenn dimoun ki enterese pour devlop sa de zil pour vin devan e pour montre zot lentere.

Byensir sa pour dan kad sa ki *IDC* ti eksplike piblikman dan en *press conference* le 14 Zen 2023; setadir pour permet devlopman touristik lo de zil ki enkli Assumption.

E aköz en devlopman touristik Assumption e ki pour arive avek nou prezans Gard Lakot? Premyerman les mwan eksplik rasyonel lenvestisman tourizm lo Assumption. I enportan pour nou fer en revi lo

listwar Assumption. E sirtou lo sa vizit e rapor Komite Zil Lasanble Nasyonal ki Onorab *Leader* Lopozisyon ti form parti sa letan, e kot son travay ti fini avek en rapor enterim ki ti ganny *tabled* dan Lasanble Nasyonal le 5 Out 2020.

Dan sa rapor ti annan plizyer eleman ki ti souleve, son grander par egzanp i 11.6 kilomet kare ki menm pli gran ki La Digue, ki li i 10kilomet kare.

E dan sa rapor ti koz lo plizyer eleman ki annan pou fer avek zil, sirtou lefe ki i o bor Aldabra e aköz i o bor Aldabra ki Sesel in donneren koman en kado, pour lemonn koman en *World Heritage Site*.

Assumption i annan en rol natirel pour ofer proteksyon pour Aldabra. E alor Komite ti rekomann-de, ki i zwe en rol - Assumption i annan en rol touristik koman en *stepping stone* pour al Aldabra e answit i annan en rol konservasyon osi.

I mete poudir nou devret annan en pti letablisman touristik ki pour vin parey en *transit hotel* lo Aldabra, pour ki Seselwa e etranze tou lede i kapab al vizit Assumption e Aldabra.

E osi fer - dekrir poudir Assumption i annan enn bann pli zoli lans ki 6kilomet longer e

i osi annan bann sit ekselan, pour al koule e pour ankor pour donn valer azoute dan okenn ekskirsyon ki kapab ganny fer laba.

Kot i konsern *Coast Guards* i ti mete ki i annan lentere pour devlop sa landrwa koman en baz militer e sirtou sa letan ti par Gouvernman *L'Inde*. Me Komite Zil ti annan sa son pwennvi ki sa landrwa i devret ganny servi, koman en baz *Coast Guard* ki i pour ganny mete Assumption li menm e sa i pour ede dan lalit kont trafik drog e bann dimoun ki pe *poach* lo sa zil, ki pe vole, pe vol plizyer keksoz, enkli bann lespes dan delo sale.

E i devret osi annan en rol pour li protez Aldabra an ka i annan en deversman delwil par egzanp dan lanmer, devret annan bann fasilite pour kapab ede pour protez kont sa bann zafer.

E zot ti osi mansyonnen ladan ki lo kote lapas petet nou kapab annan en pti vilaz lapas demen, en landrwa kot peser i kapab *store* serten keksoz byensir avek laranzman propriyeter zil ki *IDC*. E sa i a kapab ed lendistri lapas osi.

Sa rapor Mr Speaker, mon fer - mon rapel Lasanble ki ti ganny lir Lasanble Nasyonal le 5 Out 2020, e rapor e mon a sit

bann Manm ki ti lo sa komite, ki ti fer sa rapor sa letan ti, ti annan;

Onorab Charles De Commarmond, Onorab *Leader* Lopozisyon, Onorab Chantal Ghislain, e lo kote parti mazoriter dan Lasanble sa letan ti annan Onorab Ramkalawan, Onorab Bernard Georges, Onorab Clifford Andre, e Onorab Steven Pillay. Sete zot ki ti lo sa rapor.

Mr Speaker ozordi kwa ki'n sanze ant 2020 ek 2023? Assumption i ankor parey, i pa soutenir son lekor finansyerman. I kout *IDC* preski 10milyon - annefe R8.4milyon par an pour soutenir sa zil, son *runway*, son lenfrastruktir e prezans travayer; enkli enn pti prezans nou *Coast Guard* ki laba, militer.

Byensir *IDC* i fer son prop mwayen parske li *IDC* i fer aktivite komersyal, lo lezot zil ki prezan zot kapab tenir Assumption debout. Me nou ti a kontan Assumption i debout lo son prop lipye, parey rapor Komite i dir.

Alors vi ki ozordi preski tou dimoun ki al Aldabra i pas atraver Assumption, nou vwar sa loportinite ki prezante. Annou pa bliye ki Aldabra lo li menm, li osi i pe fer ase larzan e mon rapel en kantite fwa

Onorab Churchill Gill i demande akoz larzan ki servi Fon Ferdinand e Vallée de Mai pa ganny servi pour Praslin olye ganny anvoy-e pour soutenir Aldabra?

Parey zot konnen sa i tonm anba *SIF*, ki li i servi son bann reveni pour li soutenir Aldabra. Alors ki loportinite nou vwar ek sa lotel? Premyerman i pour permet viziter, kapab servi Assumption koman en landrwa repo pour zot al vizit Aldabra.

Sa i a permet en dimoun pran en vol sorti Mahé, pour Assumption e apre pran bato pour al Aldabra. Ler in fini vizit Aldabra, retourn Assumption pour repo e landmen si i ankor annan en dezir pour al vizit Aldabra - Aldabra i gran - petet ou pa pour kapab fer li dan en zour, zot kapab fer li.

Ozordi sa i pa posib, dan en fason komersyal, akoz napa fasilite pour dimoun reste *overnight* pour al Aldabra. Me avek en tel proze, sa pour kree en nouvo loportinite biznes kot Sesel a vann lasanm, i a vann vol, i a vann ekskirsyon, i ava vann bann *diving*, bann loportinite pour al koule, e menm lezot servis atraver en lotel.

Sa lotel a permet bann viziter al dan bann lezot zil, par

egzanp Astove e Cosmoledo, ki pa lwen e bann viziter ki sorti laba zot osi zot kapab vin vizite pour zot al Aldabra, ki ozordi zot pa pe fer akoz napa en *transit point*.

Kot i konsern Gard Lakot, li son rol i pour vin pli enportan prezan, parske nou annan plis mouvman lo zil, e neseserman vi ki zil i lwen ek Mahé, nou pour bezwen annan plis fasilite apropiye pour ofer proteksyon, tou dimoun lo zil.

An menm tan Gard Lakot i pour dan fason pli efektif pour anpes lapes ilegal dan sa zanmerant ou okenn aktivite ilegal dan bann zalantour. Akoz pli efektif? Parske i annan plis bato par egzanp ki pour fer ekskirsyon, i annan plis prezans e si i annan keksoz ki pe arive, i annan plis fason pour detekte.

Atraver plis reveni, li i osi i kapab fer plis patrol e alors mye protez nou teritwar. Lo en eleman konservasyon Mr Speaker parske rapor zil ti osi koz lo konservasyon, sa ki mon konnen se nou ti annan sa ki apel en “fou *abbotts-booby*” ki ti ganny dekouver en 1892, e i an *endemic* pour Assumption.

Me avek leksplwatasyon gwano sa letan zot ti tir plis ki 160mil tonn gwano in ganny tire lo zil. Sa zwazo ti sove

Assumption e ozordi i ganny trouve zis lo *Christmas Island*. Be lo en pwennvi konservasyon vwala en loportinite, si i annan plis aktivite, si i annan plis reveni, kot nou kapab petet koman en proze konservasyon, fer trounen sa zwazo lo son zil orizinal. Vwala Mr Speaker, mon espere ki mon'n kapab donn en pe detay pour reponn sa kestyon. Mersi bokou.

MR DEPUTY SPEAKER

Mersi Vis-Prezidan. Donk aprezan mon pour pran bann kestyon siplemanter. Onorab Audrey Vidot.

HON AUDREY VIDOT

Mersi Mr Speaker. Bonzour Vis-Prezidan ek delegasyon. Bann zelev ek ansennyan Lekol Pointe Larue, bann Manm Onorab e tou manm piblik ki a lekout. Mon kestyon, Vis-Prezidan atraver ou Mr Speaker. Mon le konnen akoz ki Gouvernman pa'n vin pli transparan dan sa size Assumption son devlopman, ki zot pe agree lo la?

Espesyalman parey lontan ler ti size Assumption ti vin devan Lasanble e menm piblik ti pe kestyonn lo la, ti annan bokou lenformasyon an detay ki ti ganny donner ek piblik.

Me ozordi menm si *IDC* in mansyonn serten zeneralman an term sa proze, me i annan mankman, dan latransparans pour detay pli kler; par egzanp lo lekel bann ki pe montre lentere dan sa bann proze pour piblik konnen?

E akoz ki prezantasyon pour Assumption pa'n ganny fer parey dernyen fwa kot Prezidan Larepiblik ti detaye ler en proze devlopman ki ti ganny fer isi Mahé? Akoz sa diferans? Mersi.

MR DEPUTY SPEAKER

Mersi mon'n note de kestyon la. *VP?*

THE VICE-PRESIDENT AHMED AFIF

Mersi bokou Mr Speaker. Mersi Onorab. Onorab mon pa trouv ki fason Gouvernman pa transparan. Par egzanp, nou'n toultan koz lo lentere pour devlop nou bann zil, ki enkli Assumption, ki enkli Coetivy, ki enkli tou nou bann zil. Nou pa'n zanmen fer en sekre lo la.

Semenn pase *IDC*, in al devan lapres e in dir ek zot, poudir i pe al lans en *expression of interest*. E mon annan en kopi sa *expression of interest*, ki'n ganny publiye i sa enn la ki la. E sa *expression of interest* zis

mon a lir pour ou, kot i konsern Assumption.

I dir, “*The Island Development Company*”, mon a lir li an Kreol. I pe envit okenn dimoun ki enterese pour soumet propozisyon pour devlopman en *ecotourism resort* lo zil Assumption ki pour permet annan en *gateway* pour al lo sa ki nou apel en *UNESCO World Heritage Site*.

Assumption i sitye 625mil notik ek Mahé, i ganny administre par *IDC* eksetera in donn detay, apre i dir okenn parti ki enterese, ki kapab montre poudir i annan atraver son lentere, i kapab demontre bann - sa 5 eleman swivan:-

Proze. Son groser son proze e ki son *market brand* ki i pour servi.

Konbyen pour koute, soutenabilite konservasyon e ki bann eleman lenerzi renouvlab i pour annan?

Son kou *marketing* e *gateway* pour al Aldabra e ki manner pour entegre sa zil ek *IDC* ki *manager* sa zil ozordi?

Bann – pa bezwen, zot pa pour bezwen soumet bann plan *concept plans* selman zot pour bezwen donn tou bann *background information* lo zot group. Savedir pour zot fer *due diligence* enkli sa bann investiser lezot parti.

IDC in ofer zot pour kapab ede pour aranz bann vizit e in donn en dele letan pour fer soumisyon ki le 3 out 2023, *by* 2er apre midi. E in donn ladres pour zot *email* i ladres Mr Lionnet ki la.

Alor, nou, nou pa'n - nou pa'n fer nanryen an kasyet! Tou keksoz i kler nou'n dir dimoun sa ki enterese, soumet son proze, nou'n donn en *deadline* ki le 3 Out.

E swivan sa nou ava resevwar, mon asire *IDC* i annan en fason kot zot pour resevwar sa bann lentere, e nou a *take it*. Nou a pran sa prosen lepa apartir ki nou'n resevwar sa, e pareyman nou'n fer pour Coetivy. Napa nanryen ki ganny fer an sou sekre Onorab! Sa i pa fason pratik sa Gouvernman.

E nou le fer li kler, nou'n al ek lapres, nou'n envit lapres pour zot vini, e mon ti a kontan annan okenn sizesyon petet, kwa ki nou kapab fer pli byen. Parske nou, nou anvi Seselwa i konnen ki pour arive avek sa zil, e nou pe fer li dan latransparans. Nou espere ki nou ganny bann soumisyon ki enteresan.

Mwan mon menm, mon krwar ou menm ki ti demann mwan a kestyon dan en lot kestyon ki ti monte e mon ti dir

ou si ou konn okenn dimoun ki enterese fer nou konnen!

Swivan sa nou'n fer *expression of interest*, e mon krwar i en fason pli transparan, pour fer keksoz marse. Mersi bokou Mr Speaker.

MR DEPUTY SPEAKER

Son dezyenm kestyon sete aköz ti napa en prezantasyon detaye parey lotel Anse La Mouche?

THE VICE-PRESIDENT AHMED AFIF

Be rezon napa en leksplikasyon detaye se napa en soumisyon ozordi, lo Assumption. Proze Anse La Mouche ti en proze ki'n fini soumet, fini aprouve, par Gouvernman sa letan.

E mon pa konnen si zot, zot ti fer dan zot lepok, me selman nou, nou pa ni ankor ganny en proze. Nou pe envit dimoun pour fer li transparan pour ki napa zis en sel dimoun, ki ganny – apre nou a ganny akize nou'n donn zis en dimoun.

Nou pe envit dimoun pour vini, ler nou ava ganny bann soumisyon, mon pa vwar okenn rezon aköz enn fwa nou'n fini tonm dakor lo bann soumisyon e lekel ki devret fer sa. Mon pa vwar okenn rezon aköz *IDC*, pa pour kapab donn bann detay,

be pour lemoman nou napa. Mersi bokou Mr Speaker.

MR DEPUTY SPEAKER

Mersi ou annan klarifikasyon Onorab? Me pour ou rod plis fe lo sa de kestyon ki ou'n demande.

HON AUDREY VIDOT

Wi. Wi Mersi Mr Speaker. Mr Speaker zis avan mon rod sa leklersisman, pour konfirm avek *VP*. *VP* in dir ek nou, in demann avek nou si nou annan okenn - konpare ek Gouvernman avan, mon le zis met lo rikord Mr Speaker. Vis-Prezidan ki ti dan Gouvernman avan i merit konnen li. Aret demann nou aköz li ki la ozordi.

Mr Speaker mon kestyon eski *VP* pe konfirm ek nou poudir ziska prezan ozordi, zot pa ankor ganny en sou soumisyon, okenn dimoun ki annan lentere dan okenn sa devlopman ki pour ganny fer Assumption si i kapab klarifye i a byen? Mersi.

MR DEPUTY SPEAKER

Mersi. En kestyon direk si in annan lekspresyon lentere?

THE VICE-PRESIDENT AHMED AFIF

Mersi bokou Mr Speaker. Mr Speaker an 2018, depi 2016

ziska 2020 mon ti dan Lasanble Nasyonal kan proze Anse La Mouche ti ganny soumet, mon ti dan Lasanble Nasyonal, mon pa ti dan Gouvernman.

Eski nou annan okenn lentere ki'n ganny soumet? Mwan mon pa okouran sertennman, mon mazine IDC ki direktman lye avek sa.

Avek ou permisyon mon a permet Mr Lionnet reponn sa, me mwan mon pa okouran mon krwar lafason se met sa bann soumisyon koman *expression of interest*, apre nou ava regard *next step* apre sa. Mersi.

MR DEPUTY SPEAKER

Mersi Vis-Prezidan. Mr Lionnet?

DEPUTY CEO DEVELOPMENT COMPANY CHRISTIAN LIONNET

Mr Speaker mersi. Wi depi ler nou'n lans sa *expression of interest* i annan detruwa investiser ki'n kontakte IDC ki montre zot lentere. Me solman anvi ki nou ankor dan sa peryod *expression of interest*, mon pa krwar i normal pour nou devwale lekel ki'n montre lentere a sa pwen. Mersi Mr Speaker.

MR DEPUTY SPEAKER

Mersi Mr Lionnet. Onorab Hoareau.

HON JOHN HOAREAU

Mersi Mr Speaker. Bonzour VP avek ou delegasyon. Mr Speaker pour mwan mon vwar li i drol ki Onorab Pillay anmenn en kestyon koumsa, vi ki i konnen li menm e i ti parti form parti sa komite ki i ti, ki ti pe get bann zil dan sizyenm Lasanble.

E i konnen lo paz 51 sa rapor Komite i dir ki bann zil parey Assumption i kapab ganny servi pour *coastguard*, i kapab ganny servi osi pour tourism, pour *fishing* e *agriculture* e i menm koz lo akse avek sa bann zil.

Eski sa i pa en stratezi pour gaspiy letan Lasanble? Eski sa pa en stratezi pour li abiz son privez PNQ? Mr Speaker mon ti a kontan ki Minis i konfirman, ki si se stratezi e lentansyon Gouvernman, pour devlop bann zil dan en fason soutenab, kot IDC pa bezwen okenn sibvansyon avek Gouvernman parey ti ete dan bann lepok avan sa Gouvernman LDS? Mersi.

MR DEPUTY SPEAKER

Mersi Onorab. Vis-Prezidan?

HON SEBASTIEN PILLAY*(Off-Mic)***MR DEPUTY SPEAKER**

Ou kapab *state* ou *matter of privilege* Onorab.

HON SEBASTIEN PILLAY

Mersi Mr Speaker e bonzour e mersi Onorab Hoareau pour ou kestyon. Mr Speaker dan son, demann son kestyon Onorab Hoareau in *impute* en *improper motive* ki mon pe servi mon privelez pour gat letan Lasanble.

Mon le met lo rikord pour ki tou dimoun i konpran byen ki mon annan en privelez pour anmenn en *PNQ*. Anba *Standing Order* i donn mwan sa privelez, pour anmenn en *PNQ*. E mon'n anmenn en *PNQ* lo en size nasyonal ki konsern en morso nou teritwar nasyonal, pour nou kapab ganny en klarifikasyon avek Vis-Prezidan e Gouvernman.

Mon pa vwar sa pe gaspiy letan Lasanble aköz dan lepase, sa size Assumption ler Prezidan Ramkalawan ti *Leader* Lopozisyon, i ti anmenn plizyer kestyon, e i ti fer plizyer deba dan Lasanble lo size Assumption.

Mon eskize si Onorab in pran lakoler avek lefe ki mon'n anmenn sa kestyon, me mon krwar ki dan lentere

latransparans, se pour sa rezon ki mon'n anmenn sa kestyon. E mon *refute* kategorikman mon vwar sa i en *attempt*, i en lesey pour sali mon pozisyon koman *Leader* Lopozisyon e mon pa apresye ditou. E mon ti ava demann ou pour demann avek bann Manm pour reste lo size kestyon ki mon'n anmenn. Mersi Mr Speaker.

(APPLAUSE)

MR DEPUTY SPEAKER

Mersi Onorab. Mon pa vwar okenn privelez ganny *breach* aköz sa i en kestyon lopinyon en Manm *verses* en lot, e i bann lareg ki, ki swa ou lo kote *LDS*, ki swa ou lo kote *US*, nou bezwen *be mindful of*, aköz toultan nou pour tant kanmarad lo en nivo politik pour fer bann komanter koumsa. So mon - nou kontinyen avek kestyon. *VP* ou ti pe reponn kestyon lo rezondet *IDC* pour fer sa devlopman? Mersi.

**THE VICE-PRESIDENT
AHMED AFIF**

Mersi bokou Mr Speaker. Mersi Onorab. Wi mon kapab konfirm avek ou se bi *IDC* se pour devlop bann zil e pour fer li dan fason pli soutenab. Parey ou konnen si ou regard *IDC*, son listwar e

kot i ete ozordi, *IDC* ti en lorganizasyon ki ti ganny sibvansyonnen, me par Gouvernman pour li kree bann lenfrastriktir, lenfrastriktir parey Por, parey en *runway*. Tou bann lenfrastriktir lo zil, bann fasilite se Gouvernman ki ti met larzan sa ki ti apel *capital project* sa letan.

Ozordi *IDC* in transform li atraver en stratezi kot in dir, be si mon annan bann byen ki anba mon responsabilite, akfer mon bezwen demann larzan Gouvernman pour fer sa bann byen marse?

Fer sa bann byen prodwi, anmenn deviz, kree lanplwa, pey *tax*, e transform zot ki nou pa pour bezwen pran larzan *taxpayers* pour fer marse bann zil. E ozordi tou bann zil, apard enn de, tel ki Assumption ki pa fer larzan e nou pe rod fason pour zot fer larzan e kontribye ver lekonomi Sesel.

Ozordi *IDC* i en lakonpanyen ki mon fyer poudir, in transform son lekor. In transformen dan le sans ki son *turnover* in desot en bilyon Roupi. Son profi probableman ler i fini pibliye i pour dan 100ekek milyon Roupi.

E pour fer tou bann lenfrastriktir ki enkli *runway*, ki enkli, enn pti, enn pti Por, enn pti, en *jetty* plito avek bann

fasilite i pa demann en sou larzan ki pour Bidze in pas devan zot, zot a vwar napa okenn larzan ki *IDC* pour demann Gouvernman. O kontrer i pour donn Gouvernman *dividend*.

So *IDC* in transformen konpletman. *IDC* ozordi i en lakonpanyen ki pare pour kontribye aktivman dan devlopman ekonomik sa pei. E i pe fer li dan en fason reel, dan en fason kot i pe anmenn deviz, i pe kree lanplwa, e avek sa proze lo Assumption nouvo loportinite ankor pour Sesel. Mersi Mr Speaker.

MR DEPUTY SPEAKER

Mersi Vis-Prezidan. Prosen Manm mon pour apel-e se Onorab Conrad Gabriel.

HON CONRAD GABRIEL

Mersi Mr Speaker. Bonzour tou bann Manm Lasanble *VP* ek ou lekip, mon *welcome* bann etidyan sorti Lekol Pointe Larue. Mersi pour zot vini. Mon ava al direk lo mon kestyon *VP*. Ki benefis Sesel pour gannyen atraver en tel proze, andotmo ki son retonbe ekonomik pour Sesel?

And then eski sa konstriksyon i pa pour anmenn okenn lefe advers lo nou pei, dan lefitir, vi ki ou'n dir nou

atraver ou nou annan en pli zoli lans, apre i en lespes fou zwazo ki'n anvaisan? So andotmo asir nou Lasanble ki nou pei pour ganny *gérer* byen. E atraver sa proze i napa okenn konfli lentere. Mersi.

MR DEPUTY SPEAKER

Mersi Onorab. Vis-Prezidan?

THE VICE-PRESIDENT AHMED AFIF

Mersi bokou Mr Speaker. Mr Speaker mon pa konnen si petet mon pa'n fer mon lekor ase kler. Me mon'n dir poudir ozordi *IDC*, i ganny - pe sibvansyonn atraver son prop fon pour li kapab tenir Assumption debout.

Alor i R8.4milyon ki tou le lannen petet i ti kapab donn Gouvernman oubyen re-
investir dan lezot fasilite lo bann zil, ki ozordi i bezwen met dan Assumption sa larzan i retourn dan fon *IDC*. Sa en premye benefis.

Dezyenmman, i pour kree lanplwa, pandan staz konstriksyon mon mazine pour annan en kantite etranze akoz lo bann zil souvandfwa dan nenport ki konstriksyon ou annan kantite travayer etranze.

Me i pour annan en rol kot Sesel osi pour benefisyer ou pe fer konstriksyon, ou pour

annan voyaz bato, ou pour annan avyon li menm ki pour bezwen transport travayer. Ou pour annan *fuel* ki zot bezwen aste; pour annan materyo konstriksyon pou bezwen aste loka. Pour annan en bon pe ki enporte byensir. Me selman i pour annan en retonbe ase konsekan pour Sesel dan son faz konstriksyon, dan son staz loperasyon. I zis deviz etranzer pou lagrann parti son reveni mon krwar. Akoz ozordi ou annan en sit mondyal, pour *UNESCO* ki pa pe anmenn reveni. Be akoz Sesel i annan en *World Heritage Site*, kot ou annan potansyel pour fer lemonn e Seselwa kapab al vizite e peye pour al vizite? Byensir i pour annan en retonbe pozitiv.

Lo kote lanvironnman eski pour annan okenn lenpak lo la? Mon espere non. Me akoz mon dir mon espere non, parske avan ou fer en tel proze ou pour bezwen annan parey nou Lalwa i egzize ki nou bezwen annan en *EIA*.

Okenn proze, okenn devlopman ki pour ganny fer lo bann zil bezwen pran kont lanatir sa zil, tou son bann sansibilite ki i annan vizavi sa e nenport ki konstriksyon ki nou pour fer, nou, nou en nou en pei

ki nou atas en gran lenportans ek lanvironnman.

E finalman nou pe fer sa proze pour vann lanvironnman. So nou pa pour kapab fer en proze kot nou pou al detri sa lanvironnman pour komanse, ler pour al fer son konstriksiyon.

So byensir nou pour pran tou bann mezir nesaser, pour fer sir ki konstriksiyon i ganny fer swivan tou bann Lalwa, tou bann regilasyon ki egziste ozordi.

Si Lanvironnman i dir nou, depan groser byensir, parske laba nou ti pe mazin petet 10 lasanm ziska maksimonm kekfw 40 lasanm. Nou'n deza fer sa bann kalite lenvestisman lo Desroche i bokou pli gran ki sa.

Me mon pa'n vwar okenn, okenn retonbe negativ lanvironnman ki'n arive aköz sa. Nou'n fer parey Alphonse, nou'n fer en pe parey Astove, pa lo en gran lanpler. Me nou'n deza fer sa. E nou vwar zis benefis, nou pa vwar okenn retonbe negativ. Mersi bokou Mr Speaker.

MR DEPUTY SPEAKER

Mersi Vis-Prezidan. Onorab Bistoquet.

HON ROSIE BISTOQUET

Mersi Mr Speaker. Bonzour Mr Speaker. Bonzour tou bann Onorab en bonzour spesyal pour tou bann etidyan Pointe Larue premye avek segonder ki dan Galeri. E osi bonzour Sir Holbert pour akonpanyi zot e mon Clerk Daniella Arissol pour akonpanyi zot, aköz sa vizit in ganny fer par mwan menm Manm proporsyonnel dan Lasanble. Mr Speaker.

(APPLAUSE)

HON ROSIE BISTOQUET

Mr Speaker mon ti annan en senp kestyon mon ti a kontan demann VP. VP konbyen letan sa proze pour pran e kan i pour terminen silvouple? Mersi.

MR DEPUTY SPEAKER

Mersi Onorab. Vis-Prezidan?

THE VICE-PRESIDENT AHMED AFIF

Mersi Onorab. Onorab napa en proze devan nou la. Sa ki nou annan devan nou, se en lenvitasyon pour lekspresyon lenter. Mon – nou ava byensir nou ava vin donn ou detay okenn proze e nou a donn piblik Seselwa, enn fwa ki nou'n resevwar bann soumisyon e nou'n tonm dakor, lo en proze. Mersi bokou Mr Speaker.

MR DEPUTY SPEAKER

Mersi Vis-Prezidan. Onorab Wallace Cosgrow?

HON WALLACE COSGROW

Mersi Mr Speaker. Bonzour Mr Speaker. Bonzour Vis-Prezidan avek ou delegasyon bonzour tou bann etidyan Pointe Larue dan Galeri. Bonzour tou Manm Lasanble e bonzour tou Seselwa ki pe ekout nou ozordi.

Mr Speaker i enteresan bomaten mon tann Vis-Prezidan koz lo *IDC*, bann *statement* vreman, vreman enteresan. Mon zis anvi *remind* li ki poudir sete nou Gouvernman ki'n investir dan *IDC* malgre tou sa bann letan ki zot ti pe kont *IDC* e ozordi mon kontan ou bann *statement* Vis-Prezidan.

Mr Speaker mon premye kestyon pour Vis-Prezidan i eski sa *expression of interest* ki zot in montre nou bomaten i enn ki ti ganny fer enternasyonalman ouswa zis lokal? E eski i annan okenn lenvestiser *Qatari*, Maldivyen oubyen Pakistani ki osi *involve* dan montre lentere, pour vin fer sa devlopman lo *Assumption*?

E eski sa *expression of interest* i pa zis en prosedir pour aprouv en desizyon ki'n deza fini ganny pran, par serten o

zofisye Gouvernman ozordi Mr Speaker? Mersi.

MR DEPUTY SPEAKER

Mersi Onorab. Vis-Prezidan?

THE VICE-PRESIDENT AHMED AFIF

Mersi bokou Mr Speaker. Mr Speaker mersi pour ou bann komanter lo *IDC*. Wi *IDC* in komans transform son lekor, in pran en peryod letan pandan ki in transformen. Me i ti transformen aköz ti annan en bezwen dapre Program Reform Ekonomik. Sete sa ki ti fer li transformen.

E ziska 5an, 6an pase, i ti ankor bezwen sibvansyon pour bann proze kapital par egzanp si i ti pour bezwen fer en devlopman en *runway* Providence par egzanp, ti pour bezwen kapital Gouvernman sa letan.

Pa tro lontan dan listwar sa! Me ozordi kot arive ni pour aste avyon, ni pou aste lezot lenfrastruktir pa bezwen Gouvernman. I pe progresivman transform li pour ki i nepli bezwen sibvansyon.

Lo kote lentere, lekel ki enterese? Mon krwar Mr Lionnet koman Deputy *CEO* in dir mon krwar i pa normal pour nou ozordi vin koz lo okenn dimoun ki pe resevwar, aköz

nou'n donn en soumisyon le 3 Out, nou pe fer li dan en fason transparan.

IDC i annan son Komite ki pour resevwar tou bann *bid* zot pour ouver, apre 2er apremidi le 3 Out zot pour ouver. So nou pa krwar i normal pour zot ozordi vin devwale lekel ki'n vin donn bann lentere.

Eski nou, nou pe fer sa koman en batlatet, akoz nou'n fini swazir en dimoun pour fer sa zil? Non! Si se lafason ki ansyen Gouvernman ti panse, ti fer keksoz...

(APPLAUSE)

THE VICE-PRESIDENT AHMED AFIF

Mon kapab konfirm avek ou ki sa se pa fason ki sa Gouvernman i *operate*, nou *operate* dan latransparans. Mon konpran akoz parfwa zot pans koumsa parske petet, in en fason fer.

Me avek sanzman ki'n arive apartir 2020, sa fason fer in disparet konpletman. E sa mon garanti ou, Nou pour fer li dan en fason transparan e piblik Seselwa i a konnen lekel ki pour gannyen; ki kriter ki'n ganny servi e akoz. Mersi bokou Mr Speaker.

MR DEPUTY SPEAKER

Mersi Vis-Prezidan. I annan en kestyon i - ou'n demann li lo zafer bann etranze, *Qatari* ou'n mansyonnen in reponn sa, apre ou'n demann li si proze pa'n fini aprouve sa i preteks sa in- be in dir non.

Silvouple met ou *mic on*.

HON WALLACE COSGROW

Mr Speaker bomaten mon'n demann *VP* detrwa kestyon senp.

MR DEPUTY SPEAKER

Non ou'n demann de kestyon, mon'n note.

HON WALLACE COSGROW

Wi. Me dan mon premye kestyon i annan en keksoz i pa'n reponn mwan. Eski sa *expression of interest* ti enn ki'n fer enternasyonalman? I pa'n reponn sa.

MR DEPUTY SPEAKER

Ok.

HON WALLACE COSGROW

I *pass on* letan zis dir mwan en bann zafer....

MR DEPUTY SPEAKER

Mersi.

HON WALLACE COSGROW

Batlatet. Zot ki abitye batlatet.

MR DEPUTY SPEAKER

Mersi Onorab.

HON WALLACE COSGROW

Pa mon lafot sa!

MR DEPUTY SPEAKER

Mersi Onorab.

HON WALLACE COSGROW

Si li ki ti abitye batlatet.

MR DEPUTY SPEAKER

Mersi Onorab.

**THE VICE-PRESIDENT
AHMED AFIF**

Mersi bokou Mr Speaker. Mr Speaker mon annan en kopi ki mon kapab fer li gannyen. Sa kopi in - sa ki la i mete, *“Interested parties should also submit background information of the development group including the investors”*. In ganny pibliye lokalman. Me i ouver, pour nenport ki etranze, oubyen Seselwa. So se lafason ki nou'n fer li. Mersi bokou Mr Speaker.

MR DEPUTY SPEAKER

Mersi Vis-Prezidan. 10minit i reste pour sa sesyon terminen. I reste 3 Manm apard *Leader* Lopozisyon ki ti'n lev zot lanmen e eksprim lentere pour demann kestyon.

Malerezman mon konn byen mannyer *Leader* Lopozisyon i demann kestyon. Sa 3 Manm zot pour bezwen les zot sans pase aköz si non nou pa pour fini 10er. Donk mon envit *LOTO* pour demann son kestyon. Mersi.

HON SEBASTIEN PILLAY

Mersi Mr Speaker e mersi Vis-Prezidan pour tou, pour tou ou bann larepons ziska la. Mr Speaker mon le retourn lo baz sa kestyon. *IDC* i vin lo televizyon e i dir nou poudir pour annan en lekspresyon lentere lo Assumption, ki i pe envit tou dimoun.

Prezidan i kit pei e i al an riflan pour al en vizit Maldiv, enn bann pei ki annan en repitasyon pour devlopman lo bann zil koralyenn, aköz Maldiv i annan en kantite sa bann, sa bann kalite devlopman.

E la ozordi ou'n vin dir ek nou koumsa sa de levennman pa konekte ditou, aköz sa ki Prezidan in pase an riflan Maldiv napa nanryen pour fer ek sa devlopman. So kestyon ki mwan mon annan pour ou, eski ou kapab dir nou, si i annan en lenvestiser Maldivyen ki deza in fini montre son lekspresyon lentere pour sa proze Assumption? Sa i mon premye kestyon.

Mon dezyenm kestyon pour Vis-Prezidan. Pandan sizyenm Lasanble an antye Prezidan Larepiblik in kontinyelman ler i ti *Leader* Lopozisyon, al a *forefront* size Assumption.

Li menm ki ti al *L'Inde* premye kou, e fer serten *statement* ek Gouvernman Endyen e laba dir poudir li i pe siport en baz militer. Apre vini re-vir sa *statement*, i ti sorti lo Komite Ladefans apre sa nou'n al lo zil e apre sa rapor in sorti, lo komansman *IDC* ti devret frenmen, *then IDC* i bezwen kontinyen.

So kestyon ki mon pe demann ou eski nou kapab fer ou konfyans ozordi ler ou pe dir nou poudir i annan en lekspresyon lentere, ki ou pa pour kapab met dan piblik e eski ou pour pare pour nou kapab vwar sa lekspresyon lentere?

Akoz si ou vire ou dir ek mwan poudir i koumsa ki mon Gouvernman ti fonksyonnen, be ou ti *PS* Finans dan mon Gouvernman. Savedir si nou ti bat latet, ou ti bater latet an sefl! Savedir mon krwar fodre ou arete anvoy sa zafer nou Gouvernman ek ou Gouvernman e reponn kestyon ki mon'n demann ou.

Eski ou pour pare pour met piblik. Eski ou pour pare pour met piblik, pour nou konnen si i annan bann lenvestiser Maldivyen, mon tand e annan en Mr Janah ki asosye avek sa proze. I annan lenvestiser *Qatari* ki kapab asosye ek sa proze. Pour ou vin devan e dir nou egzakteman kwa ki pe pase an relasyon avek sa proze? Mersi Mr Speaker.

MR DEPUTY SPEAKER

Mersi Onorab mon'n *note* de kestyon. Eski i annan envestiser Maldivyen ki enplike? E dezyenm kestyon eski lotorite i ava pare pour montre bann leksepsyon lentere? De kestyon fasil. Mersi.

THE VICE-PRESIDENT AHMED AFIF

Mersi bokou Mr Speaker. Mr Speaker mon pa konnen si mon pa pe koz en langaz ki ase kler. Mon pe koz Kreol. Mon pe dir ek zot poudir lekspresyon lentere in ganny donner ziska le 3 Out. I pa normal, i pa etik pour nou ozordi vin dir ti annan en Qataryen oubyen ti annan en lot, *Qatari* en lot eksetera pour nou vin koz lo la, la. Zot napa pasyans pour espere ziska le 3 Out?

Tou keksoz i baze lo mefyans, be keksoz i pour baz –

keksoz i drwat ozordi. Espere, vwar ki mannyer i ganny fer. si zot pa satisfè ek sa prosedir zot pa satisfè ek kriter, zot ava dir a son letan apwopriye. Me ozordi olye ankouraz en devlopman, en direksyon, ki pe al ver soutenabilite, zot prefere zis anvoy bann latak, senm dout, senm konfizyon dan en prosesis ki normal; kot nou, nou anvoy nou sel bi se devlop nou zil. Nou bi se permet Seselwa kapab al vizit Aldabra e fer sa dan en fason normal.

Mon pa pour koz lo okenn investiser onnetman Onorab. Mwan mon pa ni konnen! Mon pa *involve* dan sa *process* seleksyon mwan. Parske i annan en komite kot *IDC* ki pe fer sa, zot fer sa dan en fason transparan kot zot e zot, zot kapab ganny *audited* demen. Alor! Sa se lafason ki nou fer sa.

Ou'n fer en komantr ki Onorab Ramkalawan in sanz pozisyon enn de fwa lo Assumption. Be i pa vre ditou! Wi, in fer serten komantr poudir nou devret annan en prezans pour protez nou zil. Wi, toultan i dir sa! E sete dan son letan kot i ti *Leader* Lopozisyon, ki i tir ek zot poudir si zanmen zot anmenn okenn Trete devan Lasanble Nasyonal kot i ti annan mazorite, zanmen ti pour pase pour donn sa pour en

Baz Militer Endyen. Sa ti kler sa!

(APPLAUSE)

THE VICE-PRESIDENT
AHMED AFIF

Napa okenn pozisyon ki'n sanze. E depi ler in vin Prezidan in repet egzaktman parey, pou dir i pa pour zanmen permet souverente Sesel al anver okenn pwisans mondyal. E sa pozisyon i reste parey.

Alor annou aret senm konfizyon, lo pozisyon ki okenn dimoun e sa Gouvernman in pran lo Assumption. I pa pour vin en baz militer. Napa okenn dimoun ki'n fini ganny swazir. Mon pa pour mansyonn okenn non, parske mwan mon pa dan sa prosesis mwan.

I annan en prosesis transparan ki pe ganny fer atraver *IDC*. Zot a fer zot kriter, zot a swazir e zot a vin avek rekomandasyon kot Gouvernman.

Zot a dir vwala sa ki nou'n - lenterè ki'n ganny montre e Gouvernman a swazir enn fwa in swazir, zot ava transparan, zot ava fer zot *EIA*, zot ava ganny tou sa ki neser pep Seselwa a konnen ki pour arive avek son zil e ki benefis pour annan pour pep Seselwa? Mersi bokou.

MR DEPUTY SPEAKER

Mersi Vis-Prezidan. Son dezyenm kestyon sete eski zot ava pare pour montre bann lekspresyon lentere?

THE VICE-PRESIDENT AHMED AFIF

Mersi bokou Mr Speaker. Wi mon mazine sa prosesis ki manner in marse - byensir *once* i annan sa prosesis i en prosesis entern. IDC a fer le neser, i a vin kot Gouvernman, se Gouvernman dizour ki ou pour vwar, se Gouvernman dizour ki swiv son prose.

Nou pa bezwen vin ek tou keksoz, *internal* kot Lasanble Nasyonal. Byensir nou pour defann tou nou desizyon. Nou pour montre tou kriter ki'n ganny servi. E i ava ganny kestyonnen par pep Seselwa a son moman apropiye. Mersi bokou Mr Speaker.

MR DEPUTY SPEAKER

Mersi Vis-Prezidan. Onorab ou annan klarifikasyon lo sa de kestyon ki ou'n demande? Mersi.

HON SEBASTIEN PILLAY

Mersi Mr Speaker. Mersi pour donn mwan klarifikasyon. Mr Speaker ler mon'n ekout ou

byen lo komansman Vis-Prezidan ler ou'n komans reponn kestyon. E i paret ler ou'n komans reponn ou ti annan tou lenformasyon lo lekspresyon lentere. La ler i fini mon komans nonm bann non, ou napa lenformasyon, ou pour eksplik nou zis prosedir.

Mon kestyon pour ou i senp e *straight forward*, eski i annan en investiser Maldivyen ki apel Mr Janah ki'n eksprim son lentere pour sa proze? Sa premye klarifikasyon. Aret fer letour ek mwan.

Dezyenmman Speaker in dir ek ou koumsa mon kestyon se pour ou *provide* sa lalis lenvestiser. Si ou napa nanryen pour ou kasyet, pa bezwen ki ou fer gro lebra dir mwan ou Gouvernman ki o pouvwar. Nou tou nou konnen ou Gouvernman ki o pouvwar. Sa ki nou le konnen, sa ki nou le konnen nou, se eski ou pour pare pour fer Lasanble vwar sa lalis lenvestiser ki'n devan?

Si ou pa pare ou dir nou ou pa pare! Akoz mon bezwen met devan ou. Ou dir mwan Prezidan pa'n sanz son pozisyon. Nou tou nou'n swiv program lo Konstitisyon. Prezidan in sanz son pozisyon lo Konstitisyon, Prezidan in sanze son pozisyon lo Assumption.

Sa ki nou, nou pe rode se ki pa pour blok devlopman. Se pour ki Gouvernman i fer li dan latransparans pour ki en fetakonpli, pa vin ganny donnen avek Lepep Seselwa san ki pep Seselwa i konnen ki pe arrive. So i senp. Eski i annan en investiser Maldivyen ki apel Mr Janah *involve*, dan sa proze. E eski i annan en investiser *Qatari* ki fer leksepsyon pour sa proze? Tousala i sipoze lo en lalis investiser ki sipoze devan ou?

Ki manner ou napa lalis investiser be selman boner ou'n dir nou ou konnen ki manner prosesis i ganny fer. Sa ki mon pe rode se latransparans. Ou konpran?

So ou pa kapab dir mwan mon Gouvernman ti fer tel fason akoz ou ti dan mon Gouvernman, ou ti *PS* dan mon Gouvernman. Si nou ti bat latet, ou osi ou ti bat latet sa letan. So annou arete sa bann zafer. Ou konpran? Vin fran ek mwan. Dir mwan wi oubyen non! Si ou pa kapab dir mwan, ou dir mwan ou pa kapab dir mwan! Mersi Mr Speaker.

MR DEPUTY SPEAKER

Mersi Onorab. Anba *Standing Orders* se Speaker ki annan drwa poudir avek en Minis ki la si pour reponn kestyon ouswa

non. E lo ou dernyen kestyon e anfet mon ava fer en komanter zeneral, mon pe *disallow* sa kestyon. E mon ava dir zot akoz. E avan *panel* i kit nou.

Avan nou vin dan Lasanble pour nou demann kestyon ki swa *PNQ*, *Question for Oral Answers*, *Urgent Question*, ouswa *Question Without Notice*, mon ti a envit tou bann Manm pour nou etidye *Order 31* ki koz lo *Scope of Question*;

etidye *Order 36* ki koz lo *Content of Question*; etidye *Order 37* ki koz lo *manner of asking and answering a question*. E zot in fer plizyer vyolasyon sa bann *Orders* depi bomaten letan nou pe fer.

Mon'n les ale ekspre pour mwan fer sa komanter avek zot, par egzanp dernyen kestyon Onorab i *breach Order 37(g)* akoz *the process* i Ankour, ou pa kapab rod bann kestyon ki sansib, ki sekre par natir akoz *the process of tendering expression of interest* i still on ziska le 3 Out parey in dir, a plizyer repriz, i en vyolasyon sa *Order*.

Donk nou pe *disallow* sa kestyon. Mon ava remerisi *VP* avek son *panel* pour zwenn nou ozordi bomaten e nou ava eskiz zot parmi nou, nou ava

kontinyen avek lezot kestyon.
Mersi. Pas en bon lazournen.

MR DEPUTY SPEAKER

Ou ava sit ou *Order* silvouple
Onorab.

HON SEBASTIEN PILLAY

Mersi Mr Speaker. Mon pour
point of order i sa ki ou fek dir lo
Scope and manner of asking
questions. Ok. Koman en Manm
mon'n fer mon resers, lo sa size
Assumption, *ok.* Mon'n rod mon
bann lenformasyon e mon'n vin
demann en kestyon. *Now*
Standing Orders i dir ek mwan
koumsa mon pa kapab demann
en kestyon si mon pe fer
imputation, si mon pe fer
hypothetical suggestion
eksetera ki mon pa'n fer.

Vis-Prezidan ti annan zis
pour dir mwan wi oubyen non,
se tou. Mon pa'n fer okenn
keksoz so pour ou *disallow* mon
kestyon e pa les li reponn. Mon
santi poudir i en labi mon
privilez koman en Manm
Lasanble pour ganny
lenformasyon *from*
Gouvernman.

Dezyenmman mon pa
sipoze demann en kestyon ki
par son natir i sekre oubyen i
subjudice. Napa *as far as I*
know, okenn *case* Ankour ki
konsern Assumption. E mon pa
ti a kontan krwar ki poudir en

devlopman lotel lo enn nou
bann zil i en size ki sipoze
sekre. So mon pa tro vwar kote
ou pe vini avek sa largiman ki
mon kestyon i *out of order*.

Mon ti a kontan ganny en
klarifikasyon aköz i paret
poudir lo mon kote kestyon i vin
out of Order, out of
lenterpretasyon *Standing*
Order. So sey klarifye avek
mwan ki *ruling* nou pour
gannyen lo sa, lo sa *Standing*
Order Lasanble, aköz nou osi
annan en *National Assembly*
Privileges and Immunity Act ki
dir ki en zofisye Gouvernman ki
vin dan Lasanble i sipoze donn
en larepons.

Mon pa'n ensiste en
larepons ek *VP*, mon'n klarifye
en larepons. So i ti *up to* li pour
li reponn in swazir pour li pa
reponn, e ou'n swazir pour mon
rule mon kestyon *out of order*.
Lepep Seselwa i a fer son
inference lo la, i ava decide ki i
pour krwar ladan. Mersi Mr
Speaker. Me selman mon
demann ou pour regard sa
Standing Order ankor enn fwa
aköz mon pa dakor ek sa *ruling*
ki ou'n donner.

MR DEPUTY SPEAKER

Mersi Onorab pour ou
komanter. Mon repet ankor get
Order 37, 36(g), pour okenn
dimoun ki konnen dan lemonn

biznes parey Lalwa Akse avek Lenformasyon i presize, ki manner nenport ki antite ki donn lenformasyon avek piblik i ganny serten *coverage*, ouswa *for the lack of a better word* - derogasyon, pour donn akse ek lenformasyon, ler en prose ki konsern en *tender* i Ankour. Ou pa kapab donn nenport kwa an piblik! *You can't!*

So setadir in dir poudir lotorite napa difikilte avek donn akse Lasanble Nasyonal bann dokiman lekspresyon enn fwa ki *the process* in fini. Bomaten al reget ou verbatim ou pe ensiste,

“ou ava dir mwan si i annan en Maldivyen! “Ou a dir mwan si i annan en *Qatari*,”.

This is how you went about. So this Order -this size in fini, mon ti ava demann s Lebon pour kriy - ler mon pe sey – ler mon servi sa mo ankour i vedir en keksoz ki *in process*, *not* Lakour Siprenm silvouple. Nou fini avek - *expression of interest*. Mersi.

Pour nou kontiny travay Lasanble Nasyonal pour bomaten nou pour aprezan pas lo bann *Question for Oral Answers*. E nou akeyir avek nou Minis pour Lapes e Lekonomi Ble Minis Dezinyen Mr Jean-Francois Ferrari ki akonpanyen par Depite Sef

Egzekitiv Lotorite Lapes Sesel Mr Ashik Hassan e osi Mr Derrick Monthy ki *Project Manager* kot SFA.

E premye kestyon, kestyon 72 nou mentenir presedans ki'n etabli avan 15 minit pour tou bann kestyon. Onorab Andy Labonte.

HON ANDY LABONTE

Mersi Mr Speaker. Bonzour Minis avek ou *panel*. Bonzour tou koleg Onorab. Bonzour *Sir* Holbert avek ou bann zelev anler dan, dan Galeri. Mr Speaker kestyon 72 i lir koumsa: -

Minis dan ou kapasite pour – dan ou kapasite koman Minis pou Lapes, eski ou kapab donn en kontrandi pour sa peryod depi Oktob 2020:-

a. Lo ki kantite distrik ki'n benefisyé avek bann proze bazar e konbyen sa bann proze in koute ziska prezan?

b. Eski i annan lezot distrik ki ekspekte benefisyé avek bann menm proze dan le fitir e si wi lekel sa bann distrik? Mersi.

MR DEPUTY SPEAKER

Mersi. Mersi Onorab. Minis.

MINISTER JEAN-FRANCOIS FERRARI

Mersi. Onorab Speaker. Bonzour Mr Speaker, bonzour tou bann Manm Onorab dan Lasanble, bonzour bann etidyan. Kestyon lo bann proze bazar ki'n ganny fer dan distrik Mr Speaker. Premyerman mon ti a kontan dir ki fasilite La Retraite ki konpri 12 *gear stores*, masin *ice*, bazar, ponton, parking e tousala in kout anviron R5milyon.

Nou'n fer osi renovasyon bazar Grand Anse Praslin, ki'n kout anviron R225mil. Nou'n fer konstriksyon enn pti bazar Glacis, ki'n kout anviron R355mil, nou'n fer en konstriksyon en bazar Perseverance ki'n enkli kree lapas, lespas pour *parking*, enstal ponton e tousala ansanm in kout R650mil. E nou'n fer osi en fasilite Cascade ki'n konpri bazar *gear store*, *landing shed*, *fish shop* e *gear store* ki'n kout anviron R5.2milyon.

Tousala depi 2020. I annan lezot proze ki dan *pipeline* ki'n ganny fer dan distrik, e lenstalasyon bann masin *ice*; par egzanp enn grand Anse Praslin in kout anviron R1.8milyon. Sa i kouver kou pour sa masin, kou pour konstriksyon, slab konkret, *fencing* otour sa fasilite, e kou pour konekte delo ek elektrik.

Nou'n osi ouver lapas Anse La Mouche, ki'n kout anviron R2.2milyon. Nouvo *Fuel Depo* Victoria e sa i en ti en proze mazer in kout anviron R2.2milyon, non in kout anviron R3.3milyon aktyelman. Sa i enkli pour konstriksyon e kou pour aste de tenk *fuel* e lezot lekipman neserer e bann lekipman modern ki permet akse avek *fuel*, pour bann peser dan en fason pli efikas.

Mr Speaker parey bann Manm Onorab i konnen, ki i annan ankor bokou bann pli pti proze ki nou'n fer konstaman, pour amelyor lavi bann peser. Mon pa pour kapab nonm tou, me par egzanp bann ki'n swiv nouvel resaman, zot in vwar sa donasyon, bann *ice bins* ki'n nou'n partaze avek bann lasosyasyon peser. Sa nou'n fer li semenn pase. Sa i en legzanp bann pti keksoz ki nou fer regilyerman.

Nou bit se toultan pour fasilite travay nou peser e ed zot pour annan en pli meyer kalite prodwi, ki pour osi fer ki zot ganny en meyer reveni. Donk sa i premye parti kestyon Mr Speaker.

Dezyenm parti kestyon i demande, si eski i annan lezot distrik ki ekspekte benefisyer avek bann menm proze dan le

fitir e si wi lekel sa bann distrik?

Pour sa lannen Mr Speaker proze ki ekspekte konplete i konstriksyon fasilite lapas Baie Ste Anne Praslin, sa i en gran fasilite ki milti *purpose* e nou ekspekte i pour vreman en bon led pour bann peser Praslin. Nou ekspekte osi inogir fasilite lapas Anse Aux Pins ki osi en fasilite mazer, ki pour deservi sa distrik ki annan en gran kominote peser.

Nou pe komans travay lo bann *gear store* Grand Anse Praslin e nou ekspekte sa i terminen avan lafen lannen e nou annan en proze ki pe deroule aktyelman - anfen mon a korize ki pe komanse le 1 Zilyet, e sa i lo lapas e landrwa mouye La Digue, ki mannyer nou pour ouver sa lapas e ki mannyer nou pour fasilite akse pour bann peser.

Sa proze Mr Speaker pe ganny fer an kolaborasyon avek (*SPA*) *Port Authority*, pour nou fer sir ki i ler i annan aktivite ekonomik ki pe deroule, bann travay devlopman nou, nou servi sa menm lekipman, sa menm kontrakter, e lezot ki la *on the job already* pour nou kapab ganny en proze ki pli *cost effective*.

Pour bann proze ki pour komanse dan lefitir, bann ki

dan *pipeline* se konstriksyon *gear store* Glacis, ki finalman nou pe kapab mon mazine annan en dat komansman ver dernyen kar sa lannen.

Nou annan pour nou refer bazar Anse Etoile, ki dan en sityasyon kot i nesedit en bon travay lo la. E menm posibleman tir li net e fer en striktir nef. Nou pour osi fer reklanmasyon e *dredging* English River, ki Onorab pe demann sa kestyon, ki pour osi swiv par konstriksyon *gear store* e bazar English River.

I en proze ki enportan pour nou e li osi i pour ganny fer an menm moman ki akse i lo *zone* 14, sa *link* parey nou apel-nou dekrir li ant sa de *roundabout*, *roundabout zone* 14 e *roundabout* Radyo Sesel, sa travay pour ganny fer an menm tan.

Fasilite lapas Anse La Mouche, ki nou pe zis esper pour nou rezourd kontrent later, pour nou kapab komans fer nou travay. E finalman konstriksyon en bazar Au Cap ki osi, li osi i dan difikilte. Akoz i annan kontrent later e nou bezwen rezourd sa bann problem.

Donk Mr Speaker, sa i bann proze kekfwa i annan ki mon'n manke. Bann ki pli pti, me selman i en gran lalis proze

ki nou anvi, nou anvi konplete osi vit ki posibil. Mon ti a kontan parey nou dir “tou Senyer i ganny son loner”, sa bann proze i ganny finansse atraver kontribisyon Linyon Eropéen.

Atraver *Sectoral Support Fund*, ki en fon enportan pour devlopman lapès, e nou fer sir ki sa bann reveni, ki nou gannyen atraver lapès endistriyel ton, finalman i antre dan nou sistèm ekonomik dan lapès artizanal e lapès semi-endistriyel.

Donk en benefis ki retonn direktman lo nou bann peser Seselwa. Mersi Mr Speaker.

MR DEPUTY SPEAKER

Mersi Minister. E mon vwar ki Onorab Labonte i annan *supplementary*.

HON ANDY LABONTE

Mersi Minis pour ou bann detay, ou larepons byen detaye. Zis enn pti leklersisman, mwan mon konsern i plizoumwen pour La Riviere Anglaise, me selman i enportan ki nou etabli tou bann lezot distrik ki pe ganny sa bann servis ki nou bezwen apresye.

Minis, eski ou kapab donn nou en leksplikasyon ki zistans vreman pour proze English River in arive si in fini *tender*? Kan nou pe ekspekte demare e

kan petet nou pe ekspekte determin ki i terminen?

E apre mon ti a voudre konnen si dan Bidze nou annan, oubyen nou annan larzan ki'n deza ganny prevwar oubyen ki pe ganny prevwar pour nou kapab fini sa fasilite pour peser English River ki zot vreman pe espere? Mersi.

MR DEPUTY SPEAKER

Mersi Onorab. Minister?

MINISTER JEAN-FRANCOIS FERRARI

Mr Monthy i ava reponn Speaker.

MR DEPUTY SPEAKER

Anr! Mon'n sote mon ti krwar ou pe dir Onorab Phillip Monthy ava reponn sa keston. Mr Monthy.

PROJECT MANAGER SFA DERRICK MONTHY

Mersi Onorab. Mersi Mr Speaker. Onorab pour sa proze pe ganny fer par faz. So premye faz in deza in *planning stage*, e nou bezwen fer li konzwentman avek *SLTA*, ki osi pe pour agrandisman parey Minis in dir. I annan en pli gran plan stratezik avek *SIA* osi, pour elarzi semen pour donn fasilite, en pe plis mouvman trafik dan

lo de kote avek sa proze *processing* ki nou pe al fer.

So nou'n fini fer tou *design, layout* in fini fer an drwat kolaborasyon avek SIA e SLTA. *Actually* sa semenn ki la, normalman Zedi, nou pe al fer demarkasyon akoz i zis en formalite ki *Planning* pe fer.

So nou bezwen fer li *from the water site*, savedir dan delo fer demarkasyon vizib pour zot kapab konnen, pour zot pran bann pwen zistans e ki nou pe al *dredge* pour kapab fer li.

So i annan finansman pour reponn ou kestyon i R5milyon ki'n ganny vote pour sa premye faz ki la. Akoz letan ou fer *dredging* i annan son *settling period* ki pour vini, e osi i annan en drenaz ki anba sa semen ki nou pour bezwen konsidere pour refer, pour kapab. Akoz la aktyelman i pa pe deservi son fason ki i sipoze etc.

So sa en *requirement* ki nou ganny demande e ki nou bezwen konsidere pandan ki nou'n fer nou *design*. So nou'n fini *tabled* tou *design*. Tou keksoz i *on course* e avan lafen lannen nou pour komans fini fer sa *dredging* e osi met proze dan son premye faz. Mersi.

MR DEPUTY SPEAKER

Mersi Mr Monthy. E nou ava donn laparol en lot Mr Monthy. Onorab Monthy.

HON PHILLIP MONTHY

Mersi. Mersi Mr Speaker. Bonzour Minis ek ou delegasyon e bonzour tou manrmay etidyan Pointe Larue ki dan Galeri. Mon kestyon i baze lo sa fon Minis. *Sectoral Support Fund*, akoz mon vwar i annan en, plizyer proze enn deryer lot pe vini depi 2020.

Si ou kapab donn nou enn pti listwar lo sa fon. Depi kan i la? Eski sa fon fek a nou dispozisyon la 2020, oubyen in la depi plizyer lannen? E akoz ki nou pa'n vwar sa bann proze dan lepase, ki la en sel kou nou vwar bann poze enn deryer lot pe ganny materyalize avek sa Fon Linyon Eropéen? Mersi.

MR DEPUTY SPEAKER

Mersi Onorab. Minister?

MINISTER JEAN-FRANCOIS FERRARI

Mersi Onorab. Onorab i parey mon'n dir pli boner i en fon enportan, akoz i reveni sorti dan lapas endistriyel, dan sa Lakor Lapes Soutenab ki nou annan avek Linyon Eropéen ki antre dan nou sistenm lapas artizanal e semi endistriyel.

Sa fon i la depi premye lannen ki nou'n siny sa Lakor Lapes. Malerezman dan lepase, Gouvernman e menm *SFA* pa'n annan sa kapasite, pa'n montre sa kapasite pour zot enplimant bokou bann proze dan lapas artizanal e lapas semi-endistriyel.

In annan menm en lannen kot bann fon in telman akimile, ki i ti pe al perdi, sa bann fon ti pe al perdi ki zot in ganny servi pour fer, sa ki nou apel en sa lasose ki nou apel *EU* ki kot zot repar lasenn, akoz si nou pa ti fer sa, si – pa nou Gouvernman ladministrasyon oparavan - pa ti'n fer sa, sa fon ti kapab ganny perdi.

Me la ou vwar kot i pa ti en bon, i pa ti en bon *management* akoz larzan, lapas endistriyel finalman in retourn dan lapas endistriyel, tandis ki i sipoze retourn dan pos e fasilite lavi bann peser artizanal. Donk sa bann fon nou, nou'n annan en determinasyon pour nou fer sir ki tou le lannen, nou annan en serten sonm e i ganny depanse.

E menm mon ti a kontan felisit *SFA* pour sa, pour sa lannen e lannen pase, nou'n sitan annavans lo enplimantasyon bann proze ki nou'n bezwen espere pour lot trans larzan antre pour nou kapab depanse. E sa lannen, la

nou lo, nou lo limit, limit akoz nou'n fini fer tou sa ki nou ti dir nou pour fer.

E nou bezwen esper ankor enn pti pe dan dernyen *quarter* mon krwar ki nou pour ganny sa bann fon.

Donk sa i en Onorab Monthy sa i en, i sa ki lapas endistriyel i anmennen pour Sesel. E se pour sa ki mwan mon dir, kantmenm par ler i annan kritik lo Linyon Eropéen, lo fason ki nou fer sa bann Lakor Lapes, mon santi poudir i annan en gran benefis pour Sesel. Nou ki bezwen, nou koman en Gouvernman ki bezwen enplimant. Si nou pa enplimante, si nou zis asize, e nou esper, nou esper keksoz arive par mirak i pa pour arive.

Alors nou annan en tim devlopman, e Mr Monthy ki fek koze la ki *Manager Business Development* nou toultan, tou le semenn gete ki mannyer nou kapab enplimant sa bann proze. Mersi.

MR DEPUTY SPEAKER

Mersi Minister. Letan pa dan nou faver, mon note ki i annan ankor 1,2,3,4,5,6 Manm ki le demann kestyon lo sa kestyon. Me wi zot distrik in ganny mansyonnen me mon ti ava ankouraz zot, pour zot pran kontak direk avek *SFA*, pour zot

swiv dan zot soz spesifik aköz nou bezwen *manage* letan, nou'n ariv zis 15minit pour sa en kestyon.

Donk nou pour demann Onorab Labonte pour *proceed* avek kestyon 73 silvouple. Mersi.

HON ANDY LABONTE

Mersi Mr Speaker. Kestyon 73 i lir koumsa:-

Eski Minis i kapab dir Lasanble ki Gouvernman pe fer pou ede devlop e protez soutenabilite dan sekter lapès tradisyonnèl, lapès endistriyel e semi-endistriyel dan delo teritoryal Sesel? Mersi.

MR DEPUTY SPEAKER

Mersi Onorab. Minister?

MINISTER JEAN-FRANCOIS FERRARI

Mersi Onorab. Mr Speaker Gouvernman an kolaborasyon avek diferan antite, Nasyonal, rezyonnal, e enternasyonal, pe fer bokou keksoz pour devlop nou sekter lapès tradisyonnèl, endistriyel e semi artizanal e semi-endistriyel. Dan en fason ki soutenab.

‘Soutenabilite’, sanmenm sa mo ki nou servi plis dan nou travay. Be bann aksyon ki nou pe pran sa i enkli :-

Moderniz bann Lalwa, e Regilasyon Lapès

Lenplimantasyon bann plan zesyon lapès, lo plato Mahé, parey zot in tonm nonmen *marine spatial planning* ki enkli 15poursan *zone* proteze, 15poursan bann *zone* kot lapès i soutenab.

Devlopman nouvo plan zesyon pour diferan lapès; par egzanp banbara, krab ziraf, oumar e zourit. Sa i bann plan ki enportan pour nou fer sir ki nou, sa bann lapès i reste vivan e soutenab.

Devlopman e lenplimantasyon plan zesyon pour lapès ton, e langazman avek *IOTC*. Ler nou pe koze la i annan en *meeting* lo *tuna management plan* ki vreman enportan, ki nou pe diskite avek *IOTC*.

Nou osi pe moderniz nou bann stratezi zesyon pour lapès lo bann standar enternasyonal e partisipasyon. Nou annan en partisipasyon aktiv dan *IOTC* pour zer lapès ton dan Losean Endyen.

Donk sa i - mon annan bokou detay Mr Speaker, me selman mon ti a pli kontan ki mon ganny bann kestyon plito ki mwan mon gard laparol.

E kekfwa zis lo sa dernyen pwen, mon ti a kontan dir ki bann devlopman restan dan

lapes ton, i montre ki serten sa bann resours pe vin deplizanpli limite. E se sa - sa i enn bann keksoz ki nou vreman bezwen travay lo la tre for.

Dan kote artizanal, nou pe fer en kantite zefor pour nou parey zot konnen dan *Mahé Plateau Management Plan* pour nou lapés dan en fason soutenab, bann pli pti pwason, pa pran bann pwason ki *undersize*, pa pran bann pwason ki son stok pe ganny menase. E ankouraz bann lorganizasyon, bann lasosyasyon peser par egzant Lasosyasyon Peser Baie Ste Anne Praslin, pour zot enplimant bann zesyon, zot bann lapés zot menm.

Donk mo ki nou servi osi dan sa travay se “*co-management*”. Nou, nou pa krwar poudir nou koman SFA e koman Minister Lapes nou kapab *manage* tou sa lendistri nou menm. Nou bezwen en *partnership*, e se la kot *co-management* i vini, kot nou travay avek bann partener ki lo teren. Bann partener ki dan lendistri. Mersi Mr Speaker.

MR DEPUTY SPEAKER

Mersi Minister. Onorab Labonte siplemanter?

HON ANDY LABONTE

Mersi Minis pour larepons. Zis de pti leklersisman. Minis eski *regarding bycatch* i annan okenn keksoz spesifik oubyen nouvo devlopman pour ed bann lenvestiser pour met plis valer azoute avek bann *bycatch*?

Apré dezyenmman *in regards* ler ou'n koz lo Lalwa, nou vwar poudir i annan bokou bann etranze ki – si oule bann *expatriate* ki travay Sesel, zot kontan pran zot koman en labitid, oubyen en pastan ki nou vwar ki zot pe tyonbo tou bann lespes ki menm dan lanmar.

Well, i form parti nou teritoryal Sesel. Eski i annan okenn keksoz ki pe ganny fer pour adres sa sityasyon? Mersi.

MR DEPUTY SPEAKER

Mersi Onorab.

MINISTER JEAN-FRANCOIS FERRARI

Mersi Onorab. Mr Speaker lo sa dernyen kestyon premye, mon ti ava dir ki sa i en nou ankor dan en faz ledikasyon, pour nou kapab *convince* bann dimoun ki nou bezwen, nou bezwen toultan azir dan en fason soutenab i annan bann pratik ki nou pa devret ankouraze.

Sa i en keksoz ki mon konnen ki Onorab Adelaide Baie Lazare in toultan lev sa

pwen, e nou'n travay avek bann lotel e bann konpanyen konstriksyon pour nou dekouraz sa bann pratik. E mon ti a kontan dir ki si sa bann pratik i kontinyen, e nou vwar poudir atraver ledikasyon nou pa pe ganny okenn sikse.

Nou pour bezwen annan en sistenm fer Lalwa aplike. E sa i pa premye opsyon nou ladministrasyon me selman si i nesese nou pour bezwen fer, nou pour bezwen fer li.

Ou premye kestyon Onorab sete?

HON ANDY LABONTE

(Off-Mic)

MINISTER JEAN-FRANCOIS FERRARI

Wi *bycatch*. Briyevman lendistri *bycatch* in devlop koman en *subsector* enportan, dan lapès, dan transformasyon e dan *value addition* lokalman. Minister avek *SFA* i ankouraz bann lenvestisman dan sa sekter e nou annan detrwa, detrwa antreprenè ki pe fer sikse dan sa, dan sa sekter e nou donn zot tou sipor.

I annan osi prezan kestyon lo *supply*, eski sa bann *bycatch* ki pe vini i sifizan e ganny, Sesel i annan kontrol lo la? Nou pa ankò arive lo en sistenm kot i annan total

kontrol lo la, pour en senp rezon. Se ki *bycatch* i fer parti *total catch*.

Donk ler en dimoun i lapès *bycatch* par ler i lapès dan delo Sesel, par ler i lapès dan delo enternasyonal. E parey Prezidan Ramkalawan i ti dir lotrezour lo *HARDTalk*, “ton e *bycatch* zot napa en paspor Seselwa zot. Zot Seselwa ler zot pas dan nou delo e ler zot pa dan nou delo, zot dan delo enternasyonal zot pa Seselwa!”

Alors nou bezwen fer sir ki nou annan bann fason efikas pour nou *manage* sa *bycatch* e ankouraz bann *thoniers senneurs* pour zot *land*, debarke e vann sa pwason lokalman.

I annan en zouti Onorab ki nou servi dan Minister Lapès e dan *SFA* ki apel “*the set aside*”. “*Set aside*”, i 2000tonn ton ki nou servi pour nou rekonpans bann konpanyen, bann bato ki debark e vann *bycatch* lokalman.

E sa nou pour kontinyen fer li, e nou pour fer li avek plis presizyon akòz nou anvi, e nou pour - mwan mon konvenki ki nou pour kapab soutenir sa lendistri *bycatch*, akòz i pe donn travay en bon pe dimoun e i pe anmenn en bon pe reveni dan nou pei. Mersi.

MR DEPUTY SPEAKER

Mersi Minister. Mon pour manz enn pti gin dan *tea break* bann Manm, akoz fason ki zot in demann kestyon oparavan e fer bann largiman. Mon ava apel Onorab William.

HON WAVEN WILLIAM

Mersi Mr Speaker. Bonzour Minis avek ou lekip. Mr Speaker mon ti a kontan demann Minis par lefe ki i rekonnèt mondyalman ki *overfishing bycatch damage ocean floor, managing fishing and ilegal fishing* i bann pli gro problemn kritik ki afekte lendistri lapès.

Mon anvi demann Minis si i satisfè ki pour lemoman delo teritoryal Sesel i ase *safe*, pour anpese ki nou rankontre bann sityasyon kot nou – i en term i ganny servi mondyalman, *“fishing down the food chain”*. E ki sa pratik i pa ogmante pour afekte plis nou lendistri lapès? Mersi.

MR DEPUTY SPEAKER

Mersi Onorab. Minister?

MINISTER JEAN-FRANCOIS FERRARI

Wi Onorab. Mersi pour ou kestyon. Mon krwar ki personn pa pour, pa pour - pa dakor avek lefe ki sa travay ki gid nou, sa prensip ki gid nou, se

zisteman pour nou gard nou bann lapès soutenab.

Pei pe fer en gro zefor, avek bann partener enternasyonal pour fer sirveyans e kontrol dan nou delo.

E la ankor nou annan en seksyon enportan dan *SFA* ki *monitoring control and surveillance*, ki vreman fer en travay tre enportan dan kolaborasyon avek lezot lazans, avek *Coast Guard*, avek tou bann lezot lazans sirveyans rezyonal.

E mon satisfè ki dernyerman nou'n pa'n ganny bokou bann aksyon lapès ilegal apard en travay, apard en bato, mon krwar de bato *Comorien* en bato Malgas. E sa lannen donk nou pe vwar en rediksyon. Me selman nou pa konnen si i pour rebran apre ki sityasyon ekonomik enternasyonal i sanze.

Me selman nou pei, nou ladministrasyon i determinen pour annan – pour met tou bann resours. E la nou'n fek ganny 4 bato ki pour ede ankor dan sa, dan sa sirveyans. Mon krwar ki tou dimoun i ava rekonnèt ki nou pe fer en gro zefor e ki nou pa pour les okenn dimoun vin fer nou per dan nou delo. Mersi.

MR DEPUTY SPEAKER

Mersi Minister. Onorab Cosgrow.

HON WALLACE COSGROW

Mersi Mr Speaker. Mr Speaker sa de kestyon i de kestyon, pour mwan i kontredir kanmarad. Me selman i pa kestyon i mal, me solman pour mwan i kontredir kanmarad akoz ler nou pe koz lo soutenabilite Mr Speaker. Mon ti a kontan demann Minis sirtou an relasyon avek *Mahé Plateau Management Plan*, en?

Lo en kote nou pe koz lo fer plis bazar ki i pa neserman mal pour donn fasilite bann dimoun, me solman si Minis i konpran sa konsep letan ou, ou pe koz lo soutenabilite ou bezwen osi get bann zefor ki ou pe met dan sa lapas.

So ozordi bann fasilite, ki pe ganny fer, i osi kontribye pour anmenn plis zefor dan lapas artizanal sirtou lo *Mahé plateau*. *Now* Minis eksplik nou, ki manner zot pe desin sa laliny, ki vreman en *fine line* lo soutenabilite avek zefor?

Akoz si nou pa kapab tir en laliny, nou pour napa soutenabilite tre byento an sa ki konsern *Mahé plateau*. E kan manner Minis pe anvizaz-e pous sa plan devan an relasyon

avek bann zefor ki zot pe mete dan lapas? Mersi.

MR DEPUTY SPEAKER

Mersi Onorab. Minister?

MINISTER JEAN-FRANCOIS FERRARI

Mersi Mr Speaker. Mersi Onorab. Onorab zefor i ganny kontrole par bann plan zesyon, parey *Mahé Plateau Management Plan*, e bazar i ganny kontrole par standar. Donk i de keksoz ki nou pe travay, ki nou pe travay avek la pour fer sir ki nou fer plis, nou ganny plis benefis avek mwens lapas. Sa i enn bann kestyon, bann kestyon - bann lakle ki nou fer avek bann pwason ki nou annan.

Son kalite i pli o, son standar i pli o e nou pa bezwen lapas bokou plis pour nou kapab, pour nou kapab pour bann peser ganny zot lavi.

I enportan Onorab pour konpran ki mwan mon ti fer en komikman avek bann peser, ler mon ti vin Minis Lapas ki mon pour leve standar bann peser. Mwan mon'n toultan dir, ki mon fatigue tande ki bann peser pa pe donn sa kalite eksetera. Nou pour leve bann standar, nou pour donn zot bann fasilite ki enportan. Dan lepase - e sa

bann fasilite, nou fer li an konsiltasyon avek bann peser.

Donk i napa okenn kontradiksyon, mon krwar ki bann peser pe komans, pe vremen konpran e zot pe partisip dan bokou sa travay ki nou pe fer, atraver zot bann lasosyasyon pour zot kapab zer lapas en pe pli byen.

Donk nou pa le refer menm *mistake* ki par egzant ladministrasyon presedan in fer, kot zot in, zot in fors dimoun preski fors zot pour antre dan lapas, semi-endistriyel, kot apre nou vwar napa kapasite, napa peser, nou bezwen al rod *Sri Lankan* pour fer sa louvraz, konmsi fors zot pour fer.

Me an realite pa les – pa les lanatir pran son kour. Donk e la ozordi nou vwar poudir bokou sa bann bato i anmare avek lasose. Donk nou metod se – nou stratezi se fer plis avek mwens e mon krwar si nou annan bann meyer fasilite dan bann distrik, nou pour kapab lev nou standar e ganny bokou plis reveni avek mwen resours. Mersi.

MR DEPUTY SPEAKER

Mersi. Mon'n note ou annan klarifikasyon. I annan en Manm ki ti'n deza lev lanmen mon pe *drop* son kestyon akoz

management letan. Donk mon envit aprezan Onorab Churchill Gill ki mon note i pa la i bezwen annan en Manm lo zot kote ki pe redemann son kestyon, pour demann kestyon 74.

Ki nou pe fer la nou pe sanz zesyon letan la bomaten. Nou fini avek sa *panel* ki la, zot al fer zot travay ki zot annan pour fer, e ler nou retournen apre *break* nou pran Minister Ledikasyon.

Donk lekel ki pe demann kestyon 74? Mon donn laparol silvouple. Mersi. Onorab Aglae? Onorab Cosgrow?

HON WALLACE COSGROW

Mr Speaker mon pa pe ganny...

MR DEPUTY SPEAKER

Nou a *proceed* silvouple. Mersi.

HON WALLACE COSGROW

Mersi Mr Speaker. Kestyon 74 mon pe demann lo lapar Onorab Churchill Gill ki pa dan pei, pour en misyon ofisyel Lasanble. Kestyon i lir koumsa:-

Eski Minis i kapab enform sa Lasanble

a) Kan ki sa proze lenfrastruktir pou peser dan distrik Baie Ste Anne i ekspekte konplete?

b) E kan ki i espekte ganny ouver pour ki bann peser a

kapab konmans servi sa fasilite? Mersi.

MR DEPUTY SPEAKER

Mersi Onorab. En kestyon tre spesifik pour Baie Ste Anne inikman. Minister?

MINISTER JEAN-FRANCOIS FERRARI

Ok larepons osi.

(Off-Mic)

MINISTER JEAN-FRANCOIS FERRARI

Mersi Mr Speaker. Larepons osi i pour byen spesifik. Proze pour ganny konplete an Zen pour bann dimoun ki ti Praslin sa *weekend* pour Lafet Nasyonal, zot ava vwar poudir i reste preski zis pour tir bann tol otour. E zot ava vwar en gran proze.

Onorab Gill mon krwar ti la dan sa rankont? Non? *Anyway*, mon pa tro asire. Donk proze pour konplete an Zen, e mon profit sa lokazyon pour felisit sa kontrakter ki'n delivre sa – en zoli travay *on time*.

Dezyenm parti kestyon, se kan eski i espekte ouver? Louvertir ofisyel pour ganny fer Sanmdi le 1 Zilyet par Prezidan Larepublik, e mwan menm. Me osi i pour annan Lanbasader

Linyon Eropeen ki pe vin Sesel, akoz sa i en proze ki nou tre fyer, e nou ti a kontan ki Linyon Eropeen i rekonnèt ki mannyer nou'n byen servi sa larzan pour nou fer en bon devlopman pour Praslin.

E tou bann Onorab fotespere Onorab Gill in retourn dan pei, akoz i vreman enportan pour son distrik sa ki'n deroule. E fotespere i ava vini e tou lezot Onorab Praslin e menm Onorab La Digue, i ganny envite akote par ler nou ava servi sa fasilite pour nou degaz en pe lasasen lo La Digue.

Donk, annou pran li koman en keksoz nasyonal e nou tou vini e selebre en zoli proze lo Praslin. Mersi.

MR DEPUTY SPEAKER

Mersi Minister. Onorab i annan siplemanter?

HON WALLACE COSGROW

Mersi Mr Speaker. Mr Speaker nou a note ki Onorab Gill i sa Onorab ki'n touzour lager e rod bann lenfrastruktir pour son distrik Baie Ste Anne Praslin. E enn son bann siplemanter sete ki eski Minis i kapab dir nou, si ler bazar pour ouver, eski i pour konplete avek tou son bann lekipman, pour ki kapab ganny servi? E kan eski bann peser Baie Ste Anne Praslin pour

kapab servi sa bann, sa fasilite bazar? Mersi.

MR DEPUTY SPEAKER

Mersi Onorab. Minister?

MINISTER JEAN-FRANCOIS FERRARI

Mersi Mr Speaker. Mr Speaker napa okenn sa kalite proze ki ler i ouver i san poursan napa nanryen pour li - pour fer avek. Toultan i annan bann pti amelyorasyon, bann pti azisteman.

E o firamezir nou'n reflexir lo en *butcher shop*, lo fasilite pour vann legim bann keksoz koumsa.

I en proze ki toultan an mouvman e – be selman mon kapab garanti Onorab ki le 1 Zilyet, i pour dan en bon kondisyon. mon krwar *ice plant* pe ganny mete la sa semenn e i pour ganny *commission* lafen lasemenn.

Lo tou bann keksoz ki esansyel pour la e i annan en dezyenm faz byensir. Sa dezyenm faz i en faz agrandi lasose *landing site*, kekfwa ouver enn pti pe lapas e landrwa mouye kot pour bann bato.

Donk toultan pour annan bann amelyorasyon o firamezir. Me selman parey ler proze Por Komersyal ti ouver, nou ti ouver

li e nou ti kontinyen anbelir li. E la ozordi - e sa semenn pour bann ki ti la, nou ti war poudir bann ki ti pe get lo televizyon osi, ti war poudir vreman i en proze fantastik ki sa ladministrasyon in delivre. E mon felisit tou bann zabitan Praslin pour en zoli proze. Mersi.

MR DEPUTY SPEAKER

Mersi Minister. Onorab Doyace Porice.

HON DOYACE PORICE

Mersi Mr Speaker. Bonzour Mr Speaker ek tou bann *staff* Lasanble. Bonzour Minis avek ou lekip e osi bonzour tou bann lezot Manm Lasanble.

Minis pour benefis zabitan Baie Ste Anne, eski sa lenfrastruktir pour peser e osi *staff SFA* dan distrik Baie Ste Anne, ti annan en retar? Si wi akoz? Eski i annan lezot faz ki pour kontinyen? Mersi.

MR DEPUTY SPEAKER

Mersi. Onorab. Minister?

MINISTER JEAN-FRANCOIS FERRARI

Mersi. Mersi Onorab. Onorab, parey mon'n dir pli boner nou'n azout e nou'n anbelir sa proze. E vreman ozordi in vin en proze konpreansiv e vreman pa zis

pour bann peser, e sa mon kontan, pa zis bann peser Baie Ste Anne ki pour benefisyé me popilasyon antye, bann bouse, bann agrikilter, tou dimoun konmsi pour kapab partisip dan sa zoli proze.

Alors parey nou kontan fer nou, nou pran nou letan pour nou kapab fini sa travay. E wi in, nou'n ler nou'n bezwen tit *substation* lot kote, lot kote semen pour nou anvoy pli pre avek nou fasilite. I pran en pe letan. E - me selman tou travay mon kapab dir in ganny byen fer avek en kalite ki eksepsyonnel. E mon krwar ki nou tou nou fyer ki nou pe ganny nou en zoli proze.

E parey mon'n dir ankor, i enportan ki toultan nou pe konsilte avek bann *stakeholders*. E dan sa proze nou'n konsilte, nou'n konsilte – nou'n konsilte avek bann ki anvil konsilte avek nou. I annan bann ki parey pa'n tro enterese sak fwa ler ou dir li vini nou a konsilte, nou a gete ki nou kapab fer amelyore, i pa vini!

Mwan mon pa kapab nou pa pour kapab kondann li, nou pa pour kapab anmar li, trenn li.

Me selman - pour tou bann ki anvil konsilte e menm nou'n konsilte avek bann dimoun Grand Anse, bann

lotorite Grand Anse, bann lotorite lokal, pour fer sir ki i en proze, i en proze pour Pralinwa an antye e parey mon'n dir osi i pour benefisyé bann Digwa dan en serten fason. Mersi.

MR DEPUTY SPEAKER

Mersi Minister. Onorab Woodcock.

HON WAVEL WOODCOCK

Mersi Mr Speaker. Minis i enportan ki ou fer resorti ki sa kestyon ti ganny demande dan *meeting* piblik Baie Ste Anne Praslin ki Onorab Churchill Gill pa ti prezan. Mon kestyon ou'n dir ki louvertir sa proze, lapes pour ganny fer an Zilyet.

Me an atandan nou konnen i annan en *issue* aköz *ice plant* pa pe marse pour lemoman. Alor peser pe pran *ice* Grand Anse. Mon ti a kontan konnen si sa *ice plant* bann peser pour kapab servi li avan louvertir an Zilyet, ouswa zot pour bezwen espere ziska Zilyet pour zot kapab servi sa *ice plant*? Mersi bokou.

MR DEPUTY SPEAKER

Mersi Onorab Minister?

MINISTER JEAN-FRANCOIS FERRARI

Ok, be, mon bann DCO isi avek Mr Monthy pe donn mwan en

bon nouvel. I dir mwan aktyelman *Ice Plant* Baie Ste Anne ti pe ganny teste sa *weekend*. E i sipoze ganny *commission* ozordi. Donk tou keksoz pe marse.

Me an relasyon avek *Ice Plant* Grand Anse Praslin. Se sa en pe, ki montre ki ler nou fer en devlopman, nou fer en devlopman pou tou dimoun. Mon kontan ki nou'n lans nou dan sa *Ice Plant* Grand Anse, Praslin, akoz sa i permet annan en *backup* pour Baie Ste Anne.

E i enportan ki Grand Anse avek Baie Ste Anne i travay ansanm lo partaz sa bann benefis. Akoz ler enn pou bezwen donn en koudmen kanmarad, i pou marse. Donk, annou, annou met zefor ansanm. Annou kontinyen travay dan sa direksyon.

E mon santi poudir – parey mon'n dir plizyer fwa bomaten, i annan benefis pou tou dimoun. E annou pous dan en menm direksyon e nou pei i ava benefisye. Mersi.

MR DEPUTY SPEAKER

Mersi Minister. Mon'n note ki i ankor annan – ti annan ankor 2 Manm ki ti'n eksprim lentere pou demann kestyon lo sa kestyon. Me in anmenn nou en ler ki nou pran en *break* la. Nou retournen 11:15, pour nou

kapab alor *manage* pli byen nou letan.

Mon ava dir mersi *panel* ki ti avek nou, dirize par Minis *Designated Minister*, Mr Jean Francois Ferrari osi Mr Ashik Hassan, Depite Sef Egzekitiv *SFA*, avek *Project Manager*, Mr Derrick Monthly sorti kot *SFA*. Apre *break* nou pou zwenn Minis pour Ledikasyon. Mersi. Nou ava rebran 10er – 11:15.

(BREAK)

MR DEPUTY SPEAKER

Welcome back tou dimoun. E dabor mon ti ava kontan, dir labyenveni *panel* ki fek zwenn nou. Pou reponn kestyon 75 ziska 79 lo nou *Order Paper* ozordi.

Sa i delegasyon sorti kot Minister Ledikasyon, dirize par Minis pou Ledikasyon Dr Justin Valentin. I akonpanyen par Ms Merna Eulentin ki Sekreter Prensipal pou *Education Services Department*. E Mr Bernard Arnephy ki Direkter Zeneral pou *Institutional Support Services*. *Welcome*.

Donk, mon ava envit loter kestyon 75 lo nou *Order Paper* e sa i Onorab Rocky Uranie.

HON ROCKY URANIE

Mersi Mr Speaker. Bonzour Minis ek ou delegasyon. Bonzour tou koleg Onorab. E byensir tou zabitan Zil Pros ki a lekout.

Mon kestyon i lir koumsa; Eski Minis i kapab dir ek nou Lasanble si i annan ansenyan etranze ki'n abandon zot lanplwa Sesel avek Minister Ledikasyon san met okouran Lotorite Minister Ledikasyon? Si wi, konbyen i annan e ki Lotorite Ledikasyon i fer dan sa sityasyon? Mersi Mr Speaker.

MR DEPUTY SPEAKER

Mersi Onorab. *Minister?*

MINISTER JUSTIN VALENTIN

Mersi Mr Speaker. Bonzour tou Onorab, Mr Speaker. Tou bann Onorab, *Leader* Lopozisyon. E osi tou bann dimoun ki a lekout.

Mr Speaker i touzour en plezir pou mwan avek mon lekip vin dan Lasanble, pou nou partaz en pe bann devlopman ki pe arive dan Ledikasyon. E la mon profite la pou remersye tou bann Onorab ki pe demann mwan kestyon. Mersi pou zot bann kestyon ki zot in anvoye.

Mr Speaker dan sa peryod ki mon'n dan lofis, depi Novanm 2020 ziska la, in annan 6 ka. Kot ansenyan etranze in abandonn zot lanplwa, avek

Minister Ledikasyon san met okouran Lotorite Minister.

Dan sa 6 ka ki i laplipar i bann, i sorti dan en sel nasyonalite, 5 ti abandonn lanplwa konm swivan;

Zot ti al lo konze normal ki'n ganny aprouve, e zot pa retournen. I annan ki anvoy zot demisyon ler zot lo konze se zot.

I annan osi ki demande pou al vwar paran, ou fanmir ki malad. Oubyen al lanterman manm fanmir pros. Oubyen al en maryaz, zot pran bann *emergency leave* e zot pa retournen.

Laplipar osi pou bann rezon zot kiltir. Zot demann ki sirtou zot pa kapab kit zot fanmir deryer ouswa zot zanfan. Zot santi zot dan problem, zot fer bann rezon. Zot donn nou bann rezon, epi zot ale zot pa trounen.

I annan en ka lannen pase, kot en ansenyan zeografi kot lekol La Digue ti kit pei san averti person. Se selman ler *Management* Lekol ti'n vwar ki i pa pe raport lekol, e apre i ti'n vwar pou dir osi son lakaz in reste fermen pou en pe letan, pou en detrwa zour apre en pe letan me pou enn de zour.

Me selman i ti'n kit son lenz deryer. Alor nou ti fer demann pou rod li. E dan tou ka sa bann sityasyon koumsa,

Minister Ledikasyon i azir konm swivan; i lyez ek Imigrasyon pou enformen si vreman sa ansennyan in kit pei, e kan sa in arive? E nou osi ler nou ganny sa larepons, nou fer blok son lapey e son bann benefis.

Minister Ledikasyon i osi esey re-etablir kontak ek sa bann ansennyan, pou konfirman si i annan lezot rezon ki'n fer zot ale. Par egzanp si zot in ganny en menas ki nou pa konnen. Me ziska prezan zanmen in deza annan en ka parey.

Minister Ledikasyon i rekonnèt ki sa fason abandonn lanplwa par bann etranze, pa neserman en bon pratik. E in komans etablir en kolaborasyon avek bann lotorite lokal e enternasyonal, kot bann ansennyan i sorti. Sa i ava permet nou met an plas bann petet bann kondisyon en pe pli sever.

Me selman i annan bann letan kot nou pa pou zanmen kapab anpes en ansennyan ale. E nou osi remarke ki parfwa, en ansennyan i vin rod travay Sesel e zot osi zot pe rod travay an deor en lot pei. E nou santi osi ki petet annan de ler, ler zot pe dir nou zot pe ale. Zot pe al en lanterman, i pa neserman i vre.

Swa zot pe al fer en *interview* ki zot ganny sa plas travay, e zot pa retournen. Me nou sa ki nou osi nou'n war ki enportan, se ki bann ansennyan ki vin ki nou anploye ki nou *recruit* an servan bann lazans normalman zot pa kit pei bonnavini.

Me bann ansennyan ki vin lo zot menm, i annan plis sa risk, sa tandans pou zot ale san averti nou. Donk, nou osi nou pe aranz nou mwayen *recruitment* pou fer ki bann ansennyan ki nou rode - sirtou aletranz - nou fer li an servan bann lazans ouswa Lotorite Minister Ledikasyon dan sa pei. Mersi Mr Speaker.

MR DEPUTY SPEAKER

Mersi *Minister*. Onorab Uranie.

HON ROCKY URANIE

Mersi Mr Speaker. Mersi *Minister* pou ou larepons. *Minister* eski zot annan en proper striktir an plas, ki fer *interview* avek sa bann dimoun pou donn zot lenformasyon korek avan ler zot vin Sesel? Eski zot fer li atraver zoom, oubyen zot anvoy dimoun laba pou al fer *interview*? Mersi.

MR DEPUTY SPEAKER

Mersi Onorab. Minis?

MINISTER JUSTIN VALENTIN

Mr Speaker, normalman i annan 2 metod. Wi, nou fer li par *zoom* e osi i annan bann reprezantan. Minister Ledikasyon ki al dan sa pei konsernen, kot i fer bann *recruitment*.

Wi, i annan bann prosedir ki donn bann ansennyan tou lenformasyon ki nesese. E anplis ki sa nou'n osi komans fer bann *induction*, pou fer ki bann ansennyan i antre dan sa profesyon avek plis konesans lo striktir e sosyete Sesel.

Me parey nou dir, i annan ki ganny bann *cultural shock*. E zot bezwen zot santi zot dan en fason ki zot pa kapab kontinyen. Me petet i annan ki pa nesese man dir nou, ki zot pe ale. Zot rod en leskiz e zot abandonnen zot ale. Mersi.

MR DEPUTY SPEAKER

Mersi *Minister*. Onorab, ou annan klarifikasyon lo ou kestyon?

HON ROCKY URANIE

Mersi, mersi ankor Minis pou larepons. Minister eski bann ansennyan ki ler zot vin Sesel. Parey ler nou get nou bann etidyan letan zot al dan lekòl, zot ganny mete lo en probasyon. Eski bann ansennyan etranze ler i vini zot osi zot ganny mete

lo en probasyon, e zot ganny *monitor*? Pou zot kapab zisteman fer sir ki zot pare vreman pou pran sa *challenge*, *teach* dan nou lekòl Sesel. Mersi.

MR DEPUTY SPEAKER

Mersi Onorab. *Minister*.

MINISTER JUSTIN VALENTIN

Mr Speaker, mersi. Non, napa sa faz probasyon ki bann ansennyan i pas ladan. Me sa i en keksoz ki nou pe konsidere. Akoz nou santi pe vin en problem e la byensir nou pou travay avek Lotorite Lanplwa dan Sesel. Akoz nou pa kapab etabli sa zis nou menm, nou bezwen travay avek Lotorite Lanplwa dan Sesel, pou fer sir ki nou donn zot en peryod letan.

E wi nesese man i pa zoli si en ansennyan i zis abandonnen i ale. Par egzamp nou, nou osi koz ek bann ansennyan ki la. Nou dir zot si zot annan problem, i annan en striktir ki nou pe devlope. Akoz la nou santi annan de ler sa i vin en *issue*.

Alor nou pe devlop bann striktir pou met an plas, ki bann ansennyan etranze i kapab koze, dir nou zot problem. E laplipar ditan nou rezourd sa problem si i annan. E parey mon pe dir i annan pou

bann rezon kiltirel ki zot pa abitye avek sa kiltir ki zot in vin *teach* ladan.

E i annan petet zot ale, zot sove zot krwar poudir zot pa pou zanmen kapab ganny sans ale. Be nou, nou pa zanmen, nou pa zanmen anferm en *teacher*. Si i annan son rezon, i santi i anvi abandonnen parey tou travay, en dimoun i *resign* e i ale. E nou komans avek lezot *recruitment*. Mersi Mr Speaker.

MR DEPUTY SPEAKER

Mersi *Minister*. Onorab Aglae.

HON EGBERT AGLAE

Mersi Mr Speaker. Bonzour Minis, *PS* Eulentin e Mr Arnephy. Minis dan ou larepons, ou'n fer resorti poudir i annan 5 sa bann ansennyan ki 5 a 6 menm nasyonelite, *ok*? Eski ou ti kapab dir nou ki pei sa bann ansennyan i sorti?

Dezyenmman anvi ki Sesel, i annan bann relasyon bilateral e bann *MOU* ki nou sinyen ant bann Minister Ledikasyon ant sa bann pei, eski i enn sa bann pei ki nou annan en lagreman *MOU*, baze lo nou relasyon bilateral?

E dernyen, eski dan sa ka anvi ki i annan en *breach of contract*, eski i annan okenn prosedir petet legal ki zot pe mazin pran? Pou anpese osi ki i

annan bann lezot ansennyan ki zis deside kite, e abandonn sa kontra ki zot in sinyen avek Minister Ledikasyon? Mersi.

MR DEPUTY SPEAKER

Mersi Onorab. Mon'n not 3 kestyon. Pou larestan Manm evite fer sa ankor. *Minister*. 2 kestyon tou manm, pa 3.

MINISTER JUSTIN VALENTIN

Mersi.

MR DEPUTY SPEAKER

Proceed ou.

MINISTER JUSTIN VALENTIN

Mersi Mr Speaker. Onorab sa 5 ka an kestyon bann ansennyan ki sorti *Kenya*. Avek *Kenya* partikilye, nou napa lagreman. Bann ansennyan laplipar ditan, zot swazir pou vin travay Sesel par zot menm. Donk, non napa lagreman.

Me selman parey mon dir i annan serten, i annan 1 pei an partikilye kot nou annan lagreman, sa i byen etabli. E ler nou *recruit* bann ansennyan, nou *recruit* li atraver zot lazans *or* en *commission*. E nou santi poudir la sa letap i pli byen. E sans ki en ansennyan i ale dan sa ka i mwens.

E sanmenm mon'n dir lo finisyon mon larepons lo boner. Si nou'n remark sa tandans, e

prezan nou, nou pou anvi ki ler nou fer bann *recruitment* nou pou plito servi lazans. E apre i annan en pei an partikilye, en lazans ki'n deza dir nou Minis mwan an partikilye mon ti dan en konferans. Zot ti dir avek mwan koumsa, sa, sa lazans an partikilye ti dir ek mwan koumsa "letan zot fer atraver en lazans, si zanmen nou, nou menm nou Sesel, nou santi poudir sa ansennyan ki in anvoy Sesel nou, nou menm nou pa satisfè avek, nou kapab koz avek zot, zot kapab fer sa bann ranplasman." Donk, vwala.

Me parey mon pe dir, en dimoun i abandonn son kontra. E byensir nou *trigger* sa prosedir ki dapre sa kontra, pou kapab si i annan larzan ki pou rann. Me laplipar ditan napa larzan pou rann, me apre osi nou santi poudir sa prosedir pou al fer tou sa demars, i pou en prosedir ki pou long, ki pou konplike.

Donk, nou pa'n al dan sa direksyon pou fer okenn prosedir legal. Sirtou avek bann etranze ki'n abandonn zot kontra. Mersi Mr Speaker.

MR DEPUTY SPEAKER

Mersi Minister. Mon note ki ankor 3 Manm ti le demann kestyon lo sa kestyon. Me pou

kestyon kontrent letan, e mon krwar sa size in ganny byen epwize. Donk, mon pou bouz lo kestyon 76. Mon note ki Onorab Kelly Samynadin pa la, i bezwen annan en Manm ki'n dir pou demann son kestyon. Onorab Philip Monthy, kestyon 76.

HON PHILIP MONTHY

Mersi Mr Speaker. Bonzour Minister avek ou delegasyon. Kestyon Onorab Samynadin i lir koumsa;

An vi ki Minster Ledikasyon i bezwen ranforsi bann mekanizm e devlop kapasite resours imen avek bi pour amelyor prosedir lotonomi gradyel bann lenstitisyon skoler, eski Minis i kapab donn Lasanble en kontrandi lo ki manner sa prosedir pe ale? Mersi.

MR DEPUTY SPEAKER

Mersi Onorab. Larepons Minis.

MINISTER JUSTIN VALENTIN

Mersi Mr Speaker. Prosedir lotonomi gradyel bann lenstitisyon skoler, pe al dapre plan Minister Ledikasyon. An Zilyet 2022, proze ti komanse lo en baz pilot, kot 11 lekòl ti ganny selekte baze lo plizyer kriter. Ki enkli nivo lekòl segonder osi primer. *Zone* ki zot ladan zot grander epi serten

bann karakteristik dan sa bann lekol.

Konsiltasyon ti komanse an Out 2022, kot bann zofisye Minister Ledikasyon ki angaze lo sa proze ansanm avek en konsiltan, ti al dan tou le 11 lekol. Kot zot ti zwenn avek zesyon lekol, Konsey sa bann lekol e en seleksyon bann ansennyan pou ganny zot persepsyon. Zot pwennvi lo sa zafer lotonomi.

E sa i vreman en faz kot nou ti pe rode, eski bann ansennyan i konnen ki vedir lotonomi bann lekol? Setadir ki lotonomi i vedir, pou zot kapab konpran pli byen dan ki prosedir nou pe ale, dan zot bann responsabilite. Responsabilite ansennyan, responsabilite bann zanfan. E tou sa bann lezot keksoz ki vin avek lotonomi.

Sa bann lenformasyon ti permet lekip baze dan *headquarters*, e konsiltan, pou konkretiz plan aksyon pou lenplimantasyon sa proze. E sa plan i konpri 4 etap. An fevriye 2023, premye etap sa plan ti demare kot bann lekol ti ganny demande pou revwar zot vizyon, zot misyon e zot bann *core values*.

An Avril 2023, 2enm etap sa proze ti kontinyen kot bann lekol ti ganny sans pou

aprofondir ki mannyer zot pou devlop kapasite zot lekip. Pou grandir dan sa fason ki zot kapab travay ansanm dan laklas ek bann zanfan e bann paran. E kre en latmosfer kot i annan plis konfyans dan lekol. Lobzektif se pou fer ki lekol i vreman *attend* son bi.

An Zilyet 3enm e 4enm etap pou ganny adrese. E la bann lekol pou ganny sans aprofondi lo ki mannyer zot idantifye bann lobstak ki pe anpes zot *attend* zot vizyon. E servi sa bann lenformasyon, pou zot devlope, pou fer bann plan. E pou zot avans devan.

Tou sa bann lenformasyon parey mon pe dir, i pou enform *management* ki desizyon ki bezwen ganny pran avek en bi, pou amelyor kalite ledikasyon, nivo ledikasyon. E pou fer ki sa bann lekol zot ariv ver zot sikse.

Ziska konmela bann lekol i vreman satisfe avek sa lakonpanyman ki zot pe gannyen. Zot in kolabor tre byen ansanm avek bann konsiltan e bann zofisye ek sa bann konsiltan, ki bann zofisye Minister Ledikasyon.

E apre sa legzersis ki'n ganny teste avek sa 11 lekol, bann *feedback* ki'n gannyen, nou pou analize. Koumsa ver lannen 2024 nou pou kapab akonpanyy lezot bann lekol.

Pou fer ki zot osi, zot komans viz zot travay ver lotonomi.

E nou dan Minister Ledikasyon, nou konfortab e nou satisfè lo ki mannyer sa bann prosedir pe ganny fer ziska prezan. Mersi Mr Speaker.

MR DEPUTY SPEAKER

Mersi *Minister*. Onorab Monthy, ou annan siplemanter?

HON PHILIP MONTHY

Mersi Mr Speaker. Petet koman siplemanter mon ti a demann Minis, eski ou santi ki sa bann lekol ti'n apre pou pas atraver sa prosesis la a sa moman? E si osi i annan okenn defi mazer ki zot, zot pe rankontre, ler zot pe enplimant sa prosesis lotonomi dan sa bann lekol? Mersi.

MR DEPUTY SPEAKER

Mersi Onorab. *Minister*.

MINISTER JUSTIN VALENTIN

Mersi Mr Speaker. Mr Speaker, mon krwar enn bann desizyon enportan ki nou'n pran vizavi lenplimantasyon lotonomi bann lekol se pou fer sa proze pilot. Akoz wi, menm si sa konsep ti pe ganny adrese depi 2010. Me nou'n vwar ki lekol pa ti'n vreman ganny prepare pou antre dan sa letap.

E bann lekol letan zot komans donn zot serten pti

responsabilite, senserman i annan ki santi zot en pti pe kwense. I annan ki en pe - mon pou servi sa mo - i en pe per pou avans devan. Donk, sa letap sa proze pilot ki nou'n fer in vreman en letap ki pe donn bann lekol konfyans. E pou pli byen eksplik zot ki zot pe al antreprann ladan.

Donk, ti nesese fer sa letap. Akoz bann lekol annan de ler pe dir nou, zot pa ti ekspekte i pou sitan konplike. Akoz letan ou gete i annan osi responsabilite e sa mo ki apel *accountability* ki vin avek. E le moman ki ou komans koz *accountability* avek en ta dimoun, zot rekile.

Donk, mon krwar sa prosedir i en prosedir ekselan ki nou'n fer. E nou pou prezan kapab servi sa koman en levidans, pou nou propaz avek bann lezot lekol, ki parey mon pe dir an 2024 ler nou pou *scale up ver the project*. Mersi Mr Speaker.

MR DEPUTY SPEAKER

Mersi *Minister*. Onorab Romain.

HON GEROGES ROMAIN

Mersi Mr Speaker. Minis bonzour avek ou lekip. Minis ler mon'n ekout ou byen, mon'n

swiv en pti pe, *more or less* ou pe koz lo primer ek segonder.

Eski zot in pran konsiderasyon si *post-segonder*, si ou annan plan pou *post-segonder* osi tou dan lavenir? Mersi Mr Speaker.

MR DEPUTY SPEAKER

Mersi Onorab. *Minister*.

MINISTER JUSTIN VALENTIN

Mersi Mr Speaker. Lo nivo *post-segonder*, enn i annan 2 keksoz enportan ki mon pou koz lo la, la sa pwen. Mon pou koz enn ki i annan plis bann responsabilite ki bann Lenstitsiyon *post segonder* i fer. San bezwen okenn gran lenterferans ou lenterfansyon *headquarters*.

Donk, legzersis, zot egzers en pe plis lotonomi kot zot. Dezyenmman, lannen 2021 milye 2021 mon ti komans en prosedir kot 2 lekol, 2 lenstitsiyon an partikilye. *Guy Morel Institute* avek SBSA ti vin devan koman sa 2 lekol, akoz ler ou gete Lenstiti *Guy Morel* li i pratikman otononm.

E *Business Studies* osi, SBSA i osi en lenstitsiyon kot i a pe avans en pe pli vit e pli devan ki bann lezot lenstitsiyon lo sa topik lotonomi. Donk, sa 2 lenstitsiyon ti zwenn ansanm pou zot kre sa ki nou ti apel a

sa moman en *thinktank*. Kot zot ti met size lotonomi koman zot tenm prensipal pou zot adrese.

E ansanm zot in fer detrwa travay avek bann lezot lenstitsiyon, pou fer ki zot osi zot konpran pli byen sa konsep lotonomi, ki sistenm ledikasyon pe demande. Pou ki annefe lobzektif final, lobzektif final se vwar ki bann lenstitsiyon *post segonder* i fonksyonn plizoumwen parey lo sa model kot *The Guy Morel Institute*.

Donk, zot en pe pli devan e zot pe fer sa prosedir en pe pli vit ki bann lenstitsiyon primer e segonder. Mersi Mr Speaker.

MR DEPUTY SPEAKER

Mersi *Minister*. Onorab Cosgrow.

HON WALLACE COSGROW

Mersi Mr Speaker. Bonzour Minis avek ou delegasyon. Minis letan nou pe koz lo lotonomi en. Nou konnen ki poudir ozordi en gran poursantaz Bidze bann diferan lekol. Bidze finansyel i ganny zere santralman par Minister Ledikasyon.

Mon a donn en legzanp, ozordi e lekol napa gran se dan en sans. Ozordi nou annan 2 lekol par egzanp Perseverance avek Mont Fleuri, ki sa larzan ki Gouvernman i donner pou lafet

travayer pou *staff* in ganny servi pou pey elektrisite.

Now, eski dan sa lotonomi, petet Minis i kapab dir nou akoz sa - eski dan sa lotonomi bann lekol pou annan plis lotonomi finansyer pou zot kapab zer zot Bidze zot menm?

Dezyenm Mr Speaker, dan menm laliny lotonomi. Eski bann lekol zot pou kapab osi annan serten lotonomi administrativ dan sans ki par egzanzp ler en *teacher* i *resign* or i *retire* or ganny fer arete, sa lekol li menm i kapab donn bann referans pou fer li pli vit?

Akoz mon pe note i annan en *teacher* kot *SITE* ki'n kite depi *Zanbye* or ki zot in fer arete depi *Zanbye*, lafen Zen i fer 5 mwan i pa ankor kapab ganny en referans travay. E mon krwar zot konnen lekol sa *teacher* ki mon pe koz lo la. Mersi bokou Mr Speaker.

MR DEPUTY SPEAKER

Mersi Onorab. Minis ou ava reponn lo lotonomi zesyon finansyel avek administrativ. Zafer pey *bill* elektrisite i en nouvo size ki pe ganny entrodwir, kit sa enn la ater. Mersi.

MINISTER JUSTIN VALENTIN

Mersi Mr Speaker. Mr Speaker, lesansyel ki nou pe avanse

devan ver sa lotonomi, byensir se pou donn, pou donn bann lekol sa sanmenm sa, sa, sa pilot sa travay pilot ki nou pe fer pou montre lekol ki mannyer enn pour zer zot larzan ki zot annan.

Lekol la a ler aktyel i annan zot Bidze. E zot Bidze i ganny, zot Bidze ki'n *allocate* avek lekol i ganny kontrole par *Management* Lekol e osi zot Konsey Lekol.

Donk, i annan sa travay ki pe ganny fer, e zot osi la a ler aktyel kan mon pe koze. I annan sa- lekol i annan pouvwar sa mank pouvwar pou zot servi zot Bidze ki zot gannyen pou zot fonksyonnen dapre zot plan e dapre zot nesosite.

Me osi nou pe viz ver sa letap kot menm bann serten, serten *recruitment* i kapab ganny fer *managing*-zot *staff* i kapab osi ganny fer lo nivo lekol. Donk, sa lentansyon; sa lentansyon ki nou pe avans devan.

Donk, en lekol e dapre nou plan kot nou pe ale i ava ganny sa konesans. E osi pa zis sa konesans, me sa kapasite pou zot kapab fer bann prosedir *recruitment*, parey sa plan pe demann zot pou fer.

Me mon osi dir i annan serten keksoz ki pa pou

zanmen, ki pa pou fasil konmela pou ariv totalman kot lekòl. Akòz parey mon pe dir i annan osi en Bidze santral ki nou pe koz lo la. Par egzanp letan nou pe koz konstriksyon bann lekòl, konstriksyon bann laklas. Akòz lekòl pa ganny larzan pou konstri bann gran lenfrazstriktir. Zot ganny pou *maintenance*, me zot pa ganny pou okenn bann gran konstriksyon.

Donk, i annan serten keksoz ki pou reste santralize. E sa i pa en move zafer, akòz nou pa pou kapab demen bomaten larg tou keksoz les lekòl fonksyonn lo zot menm. Donk, i annan serten keksoz ki pou reste santralize. Mersi Mr Speaker.

MR DEPUTY SPEAKER

Mersi Minis. Ankor enn fwa pou kontrent letan, i annan en Manm ki ti'n eksprim son lentere pou demann kestyon lo sa size. Malerezman ou pou bezwen perdi sa sans.

Nou pou bouz lo kestyon 77, e mon pou envit Onorab Algae pou demann kestyon dan plas Onorab Churchill Gill. Mersi.

HON EGBERT AGLAE

Mersi Mr Speaker kestyon demande par Onorab Churchill

Gill, Manm Elekte pou Baie Ste Anne Praslin. Eski Minis i kapab enform sa Lasanble pou benefis bann paran Praslin e Zil Pros; dan Bidze 2023 tou etidyan ki lo *scholarship* aletranze zot tou zot in ganny en logmantasyon dan zot *stipend*?

Vi ki bann etidyan ki sorti Praslin ek La Digue pe ganny demande ki zot pou bezwen redwir serten lekipman pou ede redwir *bill* elektrisite *hostel*. Ki ou Minister i anvizaze fer pou ed sa bann etidyan ki reste dan *hostel*? Mersi.

MR DEPUTY SPEAKER

Mersi Onorab. Minis ou larepons silvouple.

MINISTER JUSTIN VALENTIN

Mersi Mr Speaker. Mr Speaker mon anvi fer en klarifikasyon selman dan sa kestyon li menm.

MR DEPUTY SPEAKER

Zot pe endik mwan ki i annan en koreksyon? Ou'n mal lir en keksoz.

HON EGBERT AGLAE

Non, non. i annan en dezyenm parti ankor son kestyon.

MR DEPUTY SPEAKER

I lo lot paz.

HON EGBERT AGLAE

I tonm en pti pe pli anba lo *Order Paper*. Dezyenm Minis, eski ou Minister pe rekomann ek Gouvernman pou donn sa bann etidyan Praslin, La Digue en logmantasyon zot osi?

MR DEPUTY SPEAKER

Mersi Onorab.

MINISTER JUSTIN VALEANTIN

Mersi Mr Speaker. Mr Speaker i annan en pti klarifikasyon mon anvi fer dan sa kestyon, kot i dir tou bann etidyan ki lo *scholarship* aletranze zot in ganny en logmantasyon. Non, i pa zot tou. I etidyan ki dan 17 pei selman. Prezan mon anvi koz lo sa kestyon li menm.

Mr Speaker, lentere sa kestyon in ganny deza demande, mon 3enm fwa dan Lasanble ki nou pe koz lo lentere sa kestyon. Bann Onorab sorti lo Praslin, lo La Digue in demande. Lentere sa kestyon se pe koz lo en logmantasyon dan *allowance* bann etidyan Praslin, ki vin dan *post-segonder* lo Mahe.

Donk, mon anvi dir ki Minister Ledikasyon in tann sa lapel. E i en lapel ki valid e valab. Nou pe fer provizyon, dan non nou *spending proposal* ki

nou pe fer sa lannen, Minister Ledikasyon pou rekomann byensir avek Gouvernman, pou annan sa logmantasyon. E menm sa pwen in sorti dan bann *meeting* piblik ki pe ganny fer.

Donk, nou'n tande, nou'n ekoute nou'n tande, e nou pou pran en desizyon vizavi sa pwen fer logmantasyon pou bann etidyan Praslin, La Digue. Me nou napa sif ozordi konbyen i pou ete, me nou pou fer bann rekomandasyon. E byensir nou ava ganny dirize par Minister Finans, lo ki kantite sa valer i ava ete.

Me selman parey mon pe dir, lentere sa kestyon nou'n pran kont e nou pou adres li. Mersi Mr Speaker.

MR DEPUTY SPEAKER

Mersi Minister. Ou annan siplemanter Onorab?

HON EGBERT AGLAE

Minis premye, Minis si mon pa tronpe Minis Finans ki ti anons logmantasyon 10poursan dan *stipend* bann ki pe etidye aletranze. E i pa ti dir 17 pei, se sa ki kestyon in vin koumsa. Dezyenm mwan ki annan laparol, silvouple.

MR DEPUTY SPEAKER

Non. Lenformasyon i korek ti dir, ti dan piblik 17 pei. *Proceed.*

HON EGBERT AGLAE

Minis dezyenmman, an vi ki ou propozisyon ki ou Minister pe pran Pou pran pe met en *new spending initiative*. Petet si ou kapab donn nou en lendikasyon, si sa pou pran lefe sa lannen menm, ouswa lannen prosenn sa logmantasyon. Mersi.

MR DEPUTY SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Petet mon a repet dernyen bout mon pwen. Se ki nou pou met sa dan *new spending proposal* pou sa Bidze ki nou pe prepare la lannen prosenn. Me tou keksoz pou depan lo sityasyon finansyel pei. E bann direksyon ki Minis Finans, Minister Finans i ava diriz nou.

Me parey mon pe dir zot, nou'n tande sa demann. Wi, i annan en demann, nou'n tande. E nou pe pran li seryezman. Mersi Mr Speaker.

MR DEPUTY SPEAKER

Mersi Minis. Onorab Wavel Woodcock.

HON WAVEL WOODCOCK

Mersi Mr Speaker. Minis dan nou vizit ki Komite MYCC avek ou menm avek ou delegasyon, annefe, nou ti adrese sa bann size, ki enkli logmantasyon *allowance* bann etidyan Praslin, La Digue. Ti annan en lot *issue* osi ki nou ti, mon kontan ki ozordi nou pe trouv en solisyon pou sa problemn.

Me i annan en lot konsern ankor ki'n ganny souleve dan kestyon Onorab Gill, kot i konsern bann zanfan. Bann etidyan pe ganny demande pou redwir en pe lo bann lekipman ki zot servi.

Akoz dan *meeting* ti ganny fer resorti avek *meeting*, avek *management* se ki alokasyon bidzeter ki *hostel* pe gannyen i pa ase pou kouver tou zot kou. Alor ki en pti pe zot pou fer pou remedye sa, si dan Bidze osi 2023 zot pou adres sa size?

E finalman i annan sa alokasyon bidzeter pou tiket, pou bann zanfan pou zot al Praslin, La Digue. E mon konnen i en konsern pou bokou bann etidyan aköz sirtou bann ki lekol Anse Royale e Providence osi, zot bezwen pran tiket kot Minister Ledikasyon. E bokou zot pa pe kapab ariv a tan pou kolekte zot tiket, aköz sa zistans.

Alor mon pe demande si i posib pou ki bann tiket pou bann zanfan bann etidyan Praslin, La Digue i a ganny *issue* kot *Youth Hostel* oule ki zot bezwen desann. I annan lokazyon osi ki zanfan pa pe ganny bato, pe mank bato akoz sa problem. Mersi.

MR DEPUTY SPEAKER

Mersi Onorab. Ou'n entrodwir en nouvo item, zafer tiket. Minister malerezman Onorab pou bezwen *take* sa *privately* avek ou. Swa i ava ekrir en let, pa bezwen reponn sa enn la. Reponn spesifikman lo premye bout son kestasyon ki zafer elektrisite ki dan *preamble* sa kestasyon. Mersi.

MINISTER JUSTIN VALENTIN

Mersi Mr Speaker. Mr Speaker sa ki mon anvi dir, bann etidyan pe ganny demande pou redwir serten, petet serten lekipman. Sa petet zesyon *hostel* pe vwar ki wi i annan petet en lenplikasyon lo zot kou dan bann *bill*. E sa i en pratik ki partou i fer, menm dan bann lakour i fer, kot *basically* nou pe dir evite gaspiyaz.

Mon krwar lobzektif sa filozofi redwir en pe bann lekipman pou evite gaspiyaz. Me sa ki nou anvi dir, menm si *hostel* son sonm ki ganny

allocate pa ase, tou kou Minister Ledikasyon i antre. E i asiste *hostel* pou pey tou son bann *bill* ki i annan.

Donk, *hostel* napa bann det ki pa pe ganny rezourd. Minister Ledikasyon i asiste li pou rezourd bann det. Mersi Mr Speaker.

MR DEPUTY SPEAKER

Mersi *Minister*. Prosenman lo lalis i Onorab Pillay.

HON SEBASTIEN PILLAY

Mersi Mr Speaker. Mr Speaker premyerman lo larepons Minis ki ou'n donner *regarding* logmantasyon dan *allowance* bann etidyan, e ou dir ou pou met sa devan Minister Finans. E sa i pou baze lo performans ekonomik pei. Me tou lendikasyon ki nou pe tande, nou kontinyen ganny dir ki poudir pei pe fer byen, lekonomi pe fer byen.

So, eski ou kapab dir nou si sa pou vin koman en *policy* Gouvernman? Prenan kont kou lavi ki'n monte e lekonomi pe fer byen, pou ed sa bann etidyan avek sa logmantasyon dan *stipend*.

Dezyenman Mr Speaker, in dir pa entrodwir sa eleman tiket. Mon krwar mon'n tann ou *somewhere* ou'n dir poudir sa bann tiket pou ganny donner

dan zot *either* zot lenstitisyon, kot sa bann zanfan i lekòl. Kot sa bann etidyan i lekòl. So eski ou kapab klarifye?

Akoz mon pe ekoute Mr Speaker, sa ki mon pe sey ganny en konpran avek ou, rol Lasanble se pou press bann Minis pou aksyon. Nou annan 2 *MNA* sorti dan sa lo zil, Onorab 2 ki'n demann kestyon. Onorab Churchill Gill in anvoy son kestyon, Onorab Woodcock in anvoy en kestyon.

MR DEPUTY SPEAKER

Hang on a minute.

HON SEBASTIEN PILLAY

Non, non mon pe zis demann ou en kestyon.

MR DEPUTY SPEAKER

Ou pe koz ek mwan la ou. *Be look, this is Question Time, do not question the Speaker. Ask your question* ou premye kestyon, 2enm zafer tiket pe tonbe. Minis nou pa pe reponn sa kestyon.

HON SEBASTIEN PILLAY

Hold on en pti kou. Mon bezwen kestyonn ou, aköz ou pa pe les Lasanble fer son travay!

MR DEPUTY SPEAKER

Non. *Minister proceed* silvouple. Mersi.

MINISTER JUSTIN VALENTIN

Mersi Mr Speaker. Mr Speaker bann desizyon ki ganny fer, i bann desizyon kolektif, kolektif en Gouvernman. Donk, letan Minister Ledikasyon pou'n fer sa propozisyon e byensir nou ganny gide par Minister Finans lo ki direksyon nou pe ale.

E parey mon pe dir nou Minister Ledikasyon, nou pou fer nou *case*, nou pou met tou bann kart ater pou analize. E byensir bann analiz i en bann analiz kolektif ki ganny fer. Mersi Mr Speaker.

MR DEPUTY SPEAKER

Mersi *Minister*. Onorab Lemiel, ou dir mwan ou kestyon i tonbe. Dernyen Manm lo sa, nou ankor annan en pti gin letan. Onorab Arissol, Sandy.

HON SANDY ARISSOL

Mersi Mr Speaker. Bonzour Mr Speaker. Bonzour Minis ek ou lekip. Bonzour tou Manm Lasanble Nasyonal e tou bann dimoun ki pe ekoute.

Mr Speaker letan mon pe demann kestyon Minis Ledikasyon, *in regard to* Onorab Churchill Gill. Mon ti a kontan felisit Miss Juliana Agathine, *Head Teacher* primary Beau Vallon ki ozordi zot in selebre 25an lanniverser lekòl ek tou

bann *staff* - bann etidyan ki ti laba ti en zoli pti seremoni, se pou sa rezon mon ti en pe an retar bomaten. Alor felisitasyon Miss Juliana avek tou bann zanfan, tou paran e tou bann ansennyan.

Mr Speaker, an vi ki kestyon Onorab Gill i koz e demande i dir ki Minister i anvizaze fer pou ed sa bann etidyan ki reste dan *hostel*, mon ti a kontan demann Minis 2 pti kestyon lo la. Ki bann led ki bann paran premyerman zot pe donn zot zanfan ki reste dan *hostel*? E ki Gouvernman pe donner ankor bann lezot led, letan nou pe esper pei fer ankor bokou pli byen pou donn en pti pe lasistans an plis?

Kwa ki Gouvernman i deza pe fer, pou nou bann etidyan ki sorti lo sa 2 zil, Praslin avek La Digue, letan zot pe reste isi lo Mahe dan *hostel*? Mersi.

MR DEPUTY SPEAKER

Mersi Onorab. *Minister*.

MINISTER JUSTIN VALENTIN

Mersi Mr Speaker. Minister Ledikasyon byensir parey mon'n dir i pe ede pou peyman bann *bill hostel*. Me tou bann etidyan i ganny demande parey mon dir, pou zot osi fer zot bout pou pa fer labi. Minister Ledikasyon par egzantp i met

Management Hostel, an kontak avek bann *internet service providers*, pou nou ganny en *package* ki pli bon pou bann etidyan ki pli bon marse pou bann etidyan servi gannyen pou zot kapab servi.

E touzour byensir Minister Ledikasyon i ankouraz bann paran, zot osi pou zot kapab gete ki mannyer bann diferan, diferan lapir zot kapab donn zot prop zanfan. Me parey mon'n dir Minister Ledikasyon i kontinyen angaze. I fer sir ki bann etidyan i ganny zot tiket bato, pou zot osi kapab ale retourn dan lakour al vwar zot fanmir.

Donk, Minister Ledikasyon Gouvernman annefe atraver Minister Ledikasyon byensir, i kontinyen fer ki bann zanfan i santi zot eze letan zot vin, vin Mahe. Zot kapab pa fatig zot avek okenn kou finansyel. Donk, zot kapab fer zot letid avek sikse. Mersi Mr Speaker.

MR DEPUTY SPEAKER

Mersi Minister. Nou pou *proceed* prezan lo kestyon 78, ankor en kestyon pou Onorab Gill. E mon note ki tre, tre spesifik lo fasilite sportif lekol Baie Ste Anne Praslin.

HON EGBERT AGLAE

Mersi Mr Speaker. Kestyon orizinal par Onorab Churchill Gill. Eski Minis i kapab dir ek sa Lasanble pou benefis bann etidyan segonder Praslin: -

Ki plan ou Minister pou adres difikilte ki bann etidyan kot lekòl segonder Praslin pe fer fas avek, kot zot napa en landrwa pou kapab pratik ledikasyon fizik konvenableman.

Vi ki ozordi tou bann diferan kalite ledikasyon fizik i ganny fer lo en *multi-purpose court* ki'n ganny fer pou *volleyball* ek *basketball*? Mersi.

MR DEPUTY SPEAKER

Mersi Onorab. Minis ou larepons?

MINISTER JUSTIN VALENTIN

Mersi Mr Speaker. Mr Speaker mon kontan en pti bout dan sa kestyon. Vi ki ozordi tou bann diferan legzersis, kalite ledikasyon fizik pe ganny fer lo en *multi-purpose court*. Mon kontan sa fraz, "vi ki ozordi", ti a bon konnen kote dan lepase zot ti pe fer pou nou kapab fer sa al anvoy zot al fer egzaktteman laba.

Mwan ki mon anvì dir, sepandan. Mon anvì dir sepandan wi, nou rekonnèt ki lekòl Praslin akòz mwan mon koz ek *headteacher* mon

rekonnèt ki lekòl Praslin byensir ti ava'n ganny zot osi en landrwa konvenab pou fer zot legzersis fizik. E apre i sagren, i sagren osi ki letan bann dimoun pe prepar bann lekòl pe fer bann plan. I enportan osi pou mazin ledikasyon fizik dan konstriksyon en lekòl. Sa i enportan osi sa.

Sepandan Mr Speaker nou vwar ki lekòl Praslin i en lekòl ki kontinyen fer byen. Mon felisit bann etidyan, mon felisit bann zesyon lekòl ki malgre, malgre bann landrwa restrikte zot kontinyen fer byen. E zot anmenn, anmenn bann lakoup pou zot lekòl pou fer zot lekòl fyer.

Me spesifikman, la mon anvì dir ki sa lekòl li i sitye lo en *parcel number PR1007*. E lo kote nor, i annan en morso later ki a en moman donnen lekòl ti pe servi pou fer lagrikiltir. Me pli tar in ganny *fenced*, avek lekòl pou rezon sekirite. E osi i annan en konfizyon balizaz e dezakor ant en propriyete ki li osi en propriyeter, ki li osi i pe reklanm sa morso later.

Dan en vizit boner sa lannen, ki ti ganny fer kot lekòl, Minister Ledikasyon in eksprim son dezir avek Lotorite Distrik ki ti pe ganny reprezante par *DA e Liaison Officer* pou Praslin, pou ki sa morso later i ganny

remet avek lekòl, zisteman pou kapab konstrir en laplenn ki bann zanfan i kapab servi pou zot fer zot bann aktivite sportif.

So, an relasyon lo sa later, diskisyon nesese pe ganny fer avek lezot parti prenan, ki enkli Minister pou litalizasyon later pou vwar nou bann demann. Donk, Minister Ledikasyon li nou, nou an faver sa devlopman.

E nou pe kont lo sipor bann diferan lotorite distrik pou nou kapab zisteman donn bann etidyan Praslin, en teren en pe pli favorizan pou zot kapab fer zot bann aktivite ledikasyon fizik. Mersi.

MR DEPUTY SPEAKER

Mersi Minister. Ou annan siplemanter Onorab?

HON EGBERT AGLAE

Mersi Minis pou ou larepons. Minis etandonnen ki ou'n nonm sa teren ki an negosyasyon, *ok*. Eski sa teren li menm li ki an partikilye pe koz lo la i annan avek sa *owner*, eski ou kapab dir nou, si sa negosyasyon pou friktye?

E dezyenman anvi ki NSC osi i asiste lekòl parfwa pou kapab transport bann etidyan pou al lo lot laplenn, me selman i annan serten difikilte parfwa?

E an vi ki ou menm ou Minis, dan serten kestyon ou ti nonmen sirtou lo kote lekòl Glacis kot ou ti pe propoze ki i ganny bann bis; eski i annan en servis ki zot pe kapab met an diskisyon, pou osi fasilite *as and when* pou annan sa bann mouvman. Pou ki bann etidyan dayer ki Praslin i fer byen dan atletik i lev nivo *sport* skoler. Mersi.

MR DEPUTY SPEAKER

Mersi Onorab. Minister.

MINISTER JUSTIN VALENTIN

Mersi Mr Speaker. Wi, Ledikasyon nou konfidan ki sa negosyasyon pou friktye. Akoz la nou pe enkli Lotorite Distrik, e byensir nou demann i fer sans, bann negosyasyon ki pe arive i fer sans. E annou vwar dan ki laform i pou pran. Me selman nou santi i pou friktye.

E dezyenm mon kontan- Mon kontan ki Onorab swiv mwan byen, dan bann *meeting* piblik, akoz i tann bann keksoz ki nou koz lo la byen. Wi, parey Glacis nou ti dir mwan si i annan bann loportinite, zisteman, zisteman nou pou fer ki bann etidyan i kapab ganny transporte lo en laplenn.

Me apre an pwennvi legzersis, parey nou koz tou kou nou fer sir ki obesite i ganny

deal avek bann keksoz koumsa. E zanfan i vin pli aktiv, i pou annan letan kot bann ansennyan ledikasyon fizik petet i kapab prefere fer bann zanfan *jog* ziska kot sa laplenn.

E apre serten lekòl i kapab osi, serten laklas plito i kapab osi aranz zot *timetable* - sa i depan lo lekòl, antyerman lekòl. Ki manner petet laprantisaz, ledikasyon fizik sa leson petet i kapab komans en pe pli bomaten, kot zanfan i annan serten zanfan li, i komans son aktivite par ledikasyon fizik.

Sa i pou depan lo konteks lekòl, ki bann resours zot annan pou zot kapab fer sa. Me selman parey nou pe dir, wi i ti a neser si bann etidyan ti ava ganny transporte kot en laplenn. Akoz annan de ler pou fer bann konstriksyon i plito en pe plis larzan, ki servi bann fasilite ki deza egziste.

Mwan koman Minis Ledikasyon, dan tou bann letan kot mon ganny sans mon koz avek bann ansennyan. E bann zesyon lekòl pou nou gete ki manner nou kapab servi resours, ki annan dan plas mazin bann lezot konstriksyon.

Me kot nou krwar i pou pli bon marse, ou pli fasil fer nouvo konstriksyon, or nouvo fasilite, donk, nou al dan sa direksyon. Mersi Mr Speaker.

MR DEPUTY SPEAKER

Mersi Minis. Onorab Pillay.

HON SEBASTIEN PILLAY

Mersi. Mersi *Minister*.

Minis, eski ou kapab donn nou en konfirmasyon ki ou minister pe *either* si i pe pran sa ki lo ki baz priyoriter ki ou pe pran sa proze laplenn pou lekòl Grand Anse Praslin segonder? E si eski ou pe met okenn provizyon bidzeter pou annan okenn konstriksyon dan Bidze ki pe vini, ou bann Bidze ki pe vini? Akoz i pa kler si i en keksoz ki ou oule ou Minister materyalize.

Prezan zis an pasan Mr Speaker, mon oule *remind* Minis sa zafer transpor pou transport etidyan. Ou ti dir dan Lasanble lo en kestyon ki Onorab Esparon ti demann ou, an sa ki konsernan laplenn Glacis. Pa dan en *meeting* piblik. So, nou pe zis met lo rikord keksoz ki'n ganny dir.

Dezyenmman Mr Speaker, zis pou *remind* Minis poudir ou'n dan *Management* Ledikasyon pandan plizyer lannen ou osi ou. E si i annan bann planifikasyon ki pa'n marse, i annan dimoun ki ankor dan *Management* Ledikasyon ki ti lo

planifikasyon lekol ozordi zot osi zot in mal fer.

So, sa ki nou, nou pe rod avek ou se mon konpran ou problem. Ou dilenn *regarding* sa laplenn, mon'n fer lekol Grand Anse Praslin segonder. Mon pa krwar i pou pratik pou fer zanf an *jog* ziskan laplenn Grand Anse, akoz i tro lwen i pa pou pratik pou nou. So, sey eksplik nou ki mannyer ou pe sey realiz sa proze?

E ki sipor Lasanble i bezwen donnen pou ki sa proze i kapab materyalize. Mersi Mr Speaker. Mersi Mr Speaker.

MR DEPUTY SPEAKER

Mersi Onorab. Minis, Onorab in demann 2 kestasyon konfirman ki priyorite ou pou donn sa proze. E dezyenman si ou pou fer en provizyon bidzeter. 2 kestasyon senp. Mersi.

MINISTER JUSTIN VALENTIN

Mersi Mr Speaker. Mr Speaker tou proze ki vin lo latab Minister Ledikasyon i en priyorite, akoz nou anvi i materyalize. Me par kont i annan priyorite ki osi asosye avek bann kou finansyer. E pa tou kou ki nou propriyete i kapab vin en realite, par egzant akoz zisteman i annan bann lezot lenplikasyon.

Kou finansyer e osi letan en proze i enkli diferan lezot dimoun. Pou sa enn proze spesifik parey mon dir, i annan negosyasyon ki pe ganny fer. E nou, nou pe espekte ki nou kontinyen sa menm travay avek Lotorite Distrik, pou nou kapab ganny en bon solisyon pou lekol Grand Anse Praslin. Mersi Mr Speaker.

MR DEPUTY SPEAKER

Mersi *Minister*. Onorab Woodcock.

HON WAVEL WOODCOCK

Mersi Mr Speaker. Minis i annan sa later obor sa, obor lekol annefe ki zot pe konsidere. E annefe i anba konsiderasyon pou bokou lannen. E mwan mon konn tre byen sa later, bann *issue* ki'n annan regardan bann kontansyon sa later lo li menm.

Me si zot kapab rezourd sa, mon pa krwar i pou neserman kout en gran kantite larzan pou nou fer li vin en laplenn. *I mean* Nou pa bezwen met bann gran lenfrastruktir la. Me par kont si i *still* annan *issue* ek sa later, i annan en lot bout later zis lanmenm obor pa lwen avek lekol ki petet zot kapab konsidere.

E si mon pa tronpe i *PR 3180*, i lanmenm la obor i pa lwen i pli gran. Annefe ti annan diskisyon pou *subdivide* sa later pou al dan en proze *landbank*. Petet la osi zot kapab konsidere pou zot fer sa fasilite, *well* pa en gran fasilite parey mon dir sirtou en laplenn pou marmay kapab fer atletik, zwe futbol bann keksoz koumsa lo la. Mersi.

MR DEPUTY SPEAKER

Mersi. Plito en sizesyon, ki Onorab in met lo latab. E, i *ok* sa? Akoz ler ou'n mansyonn bann dimoun ki ti enplike dan negosyasyon, mon'n pa'n tann nonm bann *MNA*, mon'n tann nonm *DA ek liaison officer*. So, Minis mon krwar ou'n sezi son sizesyon. I pa vreman en kestyon ki ou bezwen reponn. I anmenn nou lafen lo sa enn kestyon 78. Nou ava bouz lo 79. Onorab Audrey Vidot.

HON AUDREY VIDOT

Mersi Mr Speaker. Mon kestyon pou Minis: - Eski Minis eksplik sa Lasanble ki mannyer Bidze renovasyon i ganny zere pour bann lekol Primer e Segonder pou asire nivo sekirite e lizyenn pour nou bann etidyan e ansenyan dan lekol? Mersi.

MR DEPUTY SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mr Speaker, sak lenstitisyon edikasyonnel i ganny en Bidze anyel anba zot *school maintenance*, pou fer bann pti travay renovasyon kot lekol. Pou asire ki bann nesesite lenfrastruktir debaz kot sa bann lenstitisyon i reste fonksyonnel.

Sa i enkli Seksyon Pti Anfans, primer, segonder e osi bann sant profesyonnel. Anba *school maintenance budget* pou lannen 2023, Pti Anfans in resevwar en son environ R1.5 milyon. Primer in ganny en sonm R3.7milyon, segonder R3.3 milyon e sant profesyonnel in ganny en sonm environ R1.3 milyon.

Sa bann alokasyon ki mon'n mansyonnen, e ki lekol i resevwar i ganny servi a diskresyon sak lenstitisyon. Ansanm avek zot *Management Lekol*. E osi zot *Konsej Lekol*, pou determinen kwa ki zot priyorite, kwa ki zot anvizaze fer.

E anplis ki sa, i annan dan Bidze santral environ R6.7 milyon, ki servi pou ed bann lenstitisyon avek bann travay en pe pli konsekans. Ki pe travay en pe pli mazer.

E ki fer ki an total i annan en Bidze environ R16.7 milyon

ki'n ganny fer pou, ki'n ganny *allocate* pou bann *maintenance* kot bann lekòl. E Minister i osi resevwar en Bidze anyel, R4000mil pou *firefighting equipment*. R 900mil pou *pest control*. R 500mil pou netwayaz bann *water tank*.

E tou sa bann proze, tou bann proze i ganny *tender* ki kontrakter i annan kapasite e kapab partisipe. E zot kapab ed lekòl pou reste parey nou pe dir, an sekirite e an bonn sante.

Sa bann sonm ki mon'n mansyonnen avan pa enkli Bidze pou *PSIP* ki kouver plito bann gro proze. Mr Speaker, tou sa Bidze i ganny zere e depanse avek bi pou al tir en nouvo sekirite. En o nivo lizyenn pou nou bann etidyan, pou nou bann ansenyan dan lekòl parey kestyon in ganny demande.

Minister Ledikasyon i reste angaze pou asire ki bann lenfrastruktir lekòl i reste byensir an bonn eta, malgre serten defi. Mersi Mr Speaker.

MR DEPUTY SPEAKER

Mersi Minister. Onorab, ou siplemanter.

HON AUDREY VIDOT

Mersi Mr Speaker. Mersi Minis pou ou larepons. Minis dan sa R6.7milyon ki ou'n dir lo baz lo

kote Minister, Lekòl Plaisance Segonder in enn ki depi lannen pase lenformasyon ki mon'n gannyen, i lo lalis pou fer bann renovasyon lo la. Me apre zot in ganny dir pou ganny bouz sa lannen, pou ganny fer sa lannen.

Vi ki'n ariv lanmwatye lannen 2023, e zot pa ankor vwar renovasyon ganny fer. Eski ou kapab konfirman kan egzaktaman i pou ganny fer sa lannen? E kan zot ekspekte li pou fini? Ou'n dir i annan sa R900mil ki zot dir pou konsernan *pest control*. E dan renovasyon letan zot pou fer ek sa bann lekòl, parey pou Plaisance i annan sa *issue* pizon. Lenfestasyon pizon dan bann lekòl, eski i annan dan sa Bidze ki zot pe konsidere pou adres sa bann *issues*.

Minis ler mon koz lo sa kestyon osi, mon lo sa enn ki mon pou al dir pou tous pou tou lekòl dan distrik Roche Caiman. Si ou kapab eklersi premyerman, dan ou repons ou'n mansyonn primer ek bann lezot. Me ou pa'n sertifye si Lekòl *for Exceptional Child*-i osi ganny enkli ladan zot Bidze.

E dezyenmman, paran i annan konsern. Zot in eksprim serten konsern ki menm si i annan striktir *PTA*, avek Konsey Lekòl pa tou paran ki

santi zot konfortab pou vin devan, pou eksprim zot bann difikilte finansyel. Me par kont diran bann term, tanzantan zot ganny bann demann avek lekol oubyen laklas. Pou zot kontribye anterm renovasyon swa laklas oubyen an term lekipman pou lekol.

Eski zot annan en pli bon fason striktir ki Minister pou gid bann lekol, pou asire ki paran ki kapab *afford* wi, me bann ki pa kapab pa santi zot oprese pou zot kapab kontribye, dan serten sa bann demann ki lekol i demande pou zot kapab kontribye anver bann renovasyon ki annan pou fer avek lekol? Mersi.

MR DEPUTY SPEAKER

Mersi Onorab. Mon'n not 4 kestyon Minis, alokasyon pou Lekol Plaisance, R900mil *pest control* alokasyon pou Plaisance. *Exceptional Child* ki son kontribisyon li *or* ki i pou gannyen. Apre kontribisyon paran dan renovasyon, i fer 4 la, 4 pwen. Mersi.

MINISTER JUSTIN VALENTIN

Mersi Mr Speaker. Mr Speaker, mon pou demann DG Arnephy pou elabor en pe lo renovasyon. E apre mon ava pran bann lezot kestyon si ou permet mwan. Mersi.

MR DEPUTY SPEAKER

Sertenman. Mr Arnephy?

DIRECTOR GENERAL INSTITUTIONAL SUPPORT SERVICES BERNARD ARNEPHY

Mersi Mr Speaker. Mersi Onorab pou ou kestyon. Bonzour tou bann Manm, bonn apre midi *in fact*. Mr Speaker pou Lekol Plaisance dan sa Bidze ki Onorab pe koz lo la. Wi, i annan serten travay ki pe ganny fer ki pe al ganny fer tre byento lo Lekol Plaisance Segonder. E sa i enkli serten travay mazer lo zot bann laboratwar. E answit travay lo zot *dining hall*.

E sa proze i dan staz finalize lo *tender*, e byento kontra pou ganny *awarded* avek bann kontrakter ki pou fer sa louvraz. E pou lenformasyon Onorab, osi dan sa Bidze nou annan bann *additional blocks of toilet* ki nou pe al konstrir kot Lekol Plaisance. Lakres Primer Plaisance.

So, nou pe al konstrir *toilet* pou etidyan osi byen ki bann *staff*. So, vwala sa bann proze ki annan pou lekol Plaisance dan sa Bidze sa lannen. Mersi Mr Speaker.

MR DEPUTY SPEAKER

Mersi. *Minister* ou larestan pwen.

MINISTER JUSTIN VALENTIN

Mr Speaker, lo kote *pest control* tou sa ki nou konsider li koman *pest* byensir i tonm anba sa larzan. Parey mon pe dir lekol osi sak lekol, i annan osi serten sonm larzan ki zot kapab servi, pou ede rezourd bann problemm lizyenn ki annan kot zot. Ouswa bann problemm sekirite, depandan osi lo zot priyorite.

Akoz nou'n demann bann lekol osi pou zot osi letan zot in ganny zot sonm larzan, pou zot etablir zot priyorite. E nou lo nivo santral si lekol pa kapab fonksyonnen, la nou entervenir e pre. Parey mon pe dir nou pa zanmen abandonn lekol dan sa prosedir.

Lekol Eksepsyonnel i enkli dan sa sonm ki mon'n koz lo la. Donk, i enkli dan lekol primer, sa sonm ki mon'n koz lo la. E rekomandasyon pou demann bann zanfan. Mr Speaker i pa Polisi Minister Ledikasyon pou fer lekol demann bann zanfan larzan, pou renouvle ouswa pou mentenir lekol. Non, i pa Polisi Minister Ledikasyon.

Mon pa konnen dan ki laform, lekol pe demann sa kestyon bann zanfan. Ouswa pe demann sa bann kontribisyon bann zanfan. Me mwan sa ki

mon konnen selman, annan de ler kot zanfan i kontribye dan kas bann lekipman, la i annan serten fason ki lekol i demann bann zanfan pou kontribye.

Me pou demann zot pou met en presyon lo paran, pou fer en kontribisyon, sa i pa Polisi Minister Ledikasyon. E la mon pe dir ek bann paran, si lekol pe demann zot larzan pou aranz lekol pou konstri. I pe met en presyon lo zot, sa i pa Polisi Minister Ledikasyon.

Me selman s aki nou konnen, i annan bann paran ki volonterman i fer serten kontribisyon. E sa nou kontan, nou aksepte tan landrwa ki ganny kontribisyon i bat lanmen i aplodi e fer bann seremoni pou nou resevwar sa bann kontribisyon.

E nou pou kontinyen fer sa, aköz nou valoriz kontribisyon paran. Nou valoriz kontribisyon lakominote. Me selman non, paran ki mwen fortinen ouswa ki pa kapab i pa Polisi Minister Ledikasyon. E la mwan si sa i en pratik, mon pe demann lekol pou arete si zot pe fer sa arete fer sa pratik.

Akoz non, nou pa kapab met en presyon finansyel lo paran pou ed rekonstri lekol ou nenport kwa. I pa devret en presyon, me paran ki santi li kapab kontribye i toultan

welcome pou fer li. Mersi Mr Speaker.

MR DEPUTY SPEAKER

Ou annan klarifikasyon Onorab?

HON AUDREY VIDOT

Wi. En klarifikasyon. Apre i annan en kestasyon ki pa'n ganny reponn. Mr Arnephy si ou kapab dir petet, mon pe demande kan zot pe komanse sa lannen? Akoz vi ki ti lannen pase pa'n ganny fer, ti dir pou fer sa lannen. Kan egzaktman? Akoz nou'n ariv milye lannen.

Apre en leklersisman konsernan ler mon'n demann lo sa Bidze R900mil, nou konnen poudir ti annan deza en *issue* kot lekol primer, kot lakres konsernan pizon. E segonder osi i annan sa *issue*, i annan plizyer lekol ankor ki'n lev sa size dan Lasanble. Eski sa R900mil ki zot pe gannyen, zot in deza komans travay pou adres sa bann *issue* dans a bann lekol? Sa ki mon ti oule klersi. *Thank you*.

MR DEPUTY SPEAKER

Mersi Onorab. *Panel*, lekol ki ti le reponn sa? Mr Arnephy?

DIRECTOR **GENERAL**
INSTITUTIONAL **SUPPORT**

SERVICES **BERNARD**
ARNEPHY

Thank you, Mr Speaker. Onorab parey Minister in dir, sa Bidze 900mil i pou *pest control* an zeneral sa. Me selman nou konnen pou dir Plaisance, *in fact* tou lede Lekol Plaisance i 2 lekol ki ganny afekte en kantite avek pizon.

E over the past years, Minister Ledikasyon in depans en kantite larzan, pou kapab *contain* sa sityasyon pizon. E finalman ki nou'n vwar nou bezwen pe bous tou bann pti trou ki annan dan bann laklas *and so on*. E sa dan li menm i pa *healthy* pou manrmay. Akoz i prevent sirkilasyon ler *and so on*.

So, nou konnen nou *health and safety director*, nou angaze la aktyelman la avek Lanvironnman. Pou nou kapab war en solisyon permanan pou sa bann pizon. Akoz zis bous tou bann trou dan bann lekol i pa neserman pe ede. Akoz pizon li sa bann *feral pigeon* la, zot teritoryal zot.

Ou farous zot, zot ale en 3 semenn apre zot retourn *back* ankor. E sirtou zot pe ganny *feed*, par egzanp nou'n fer en pti *survey* nou vwar pandan letan vakans zot pa kot lekol zot. Zot frekant for *housing estates*. Akoz napa dimoun kot lekol.

Dek ki marmay i retourn lekol ou vwar zot tou zot in retournen.

So, i en zefor kolektiv avek tou bann departman konsernen. Me selman sa Bidze li menm, i pa sifi pou adres tou problem pizon sa lekol. Me nou annan en program rutin ki mannyer nou servi sa R900mil pou nou kontrol bann *issues pest* dan lekol. E sa i enkli lera bann *rodents* e pizon enkli osi parmi, *ok?*

E pou kestyon proze, *yes*, nou ti annan en *meeting* avek Lazans Lenfrastriktir *ok - SIA* ki pe *manage* nou bann proze, *last week in fact*. E dernyen kominikasyon ki nou annan avek zot se ki sa 2 proze kot sa 2 lekol. *In fact*, sa 3 Lekol Plaisance Primer e sa lekol segonder in fini ganny *tender*. E zot dan staz evalyasyon final, avan ler ki proze i ganny *awarded*. Savedir proze pou ganny fer sa lannen. *Ok*, Onorab? Sa lannen.

So in dir nou proze in fini ganny *awarded*. So, i annan en staz evalyasyon ki zot bezwen pas atraver, apre i annan en *stand still period i think which is 5 days now, ok instead of 10*. E *once* ki sa i ganny fer, *then* proze i vin kot Lotorite Minister Ledikasyon si nou ganny laprouvasyon. *Then* proze i *kick-*

start. So, it should be this year. Posibleman mon mazin dan komansman Out proze a komanse. *Thank you.*

MR DEPUTY SPEAKER

Mersi *panel* pou larepons. I enteresan mannyer sa kestyon larepons *panel* ek enteraksyon oter kestyon in zis 15 minit. Kekfwa a koumsa i merit ete. En dimoun i anmenn en kestyon li ki enterakte ek *Panel* lo la. So, i annan nou 1,2,3,4,5,6 lezot Manm ti anvi demann kestyon lo la, mon pa pe aksepte okenn akoz zesyon letan.

Dernyen kestyon ki lo nou *Order Paper* ki en *Question Without Notice*. E sa enn la zot konnen prezidans ki'n deza ganny etabli. Se zis sa Manm ki demann kestyon lo son kestyon. Onorab Michel Roucou.

HON MICHEL ROUCOU

Mersi Mr Speaker. Mon dir bonzour tou dimoun. Bonzour Minis ek ou lekip. Bonzour tou dimoun ki a lekout. Minis mon kestyon i al koumsa:

Eski Minis pou Ledikasyon i kapab dir ek nou Lasanble, ki mezir pe ganny pran pou adres sa lenfestasyon lera kot lakres Mont Fleuri? Mersi.

MR DEPUTY SPEAKER

Mersi Onorab. *Panel*.

MINISTER JUSTIN VALENTIN

Mersi Mr Speaker. Mr Speaker, Minister Ledikasyon an partenarya avek tou bann lazans konsernen enkli Lotorite Distrik, *MNA* pou sa distrik pe travay ansanm lo sa konsern, *pest* depi en pe letan. E sak fwa i annan en konsern, aksyon i ganny pran pou detri sa bann *pest* sa bann lera.

Me konsekaman, avek Lasante Piblik nesosite in ganny vwar la tou resaman pou ferm lakres. E fer en netwayaz entans pandan sa *weekend* ki'n pase. E nou anvi kontinyen fer sa travay pandan sa semenn ki nou ladan, pou ki nou otan ki posib nou kapab enn fwa pou tou rezourd sa problemn.

Lakres in ganny netwaye, in ganny dezenfekte. Tou bann zouzou, bann latab e osi bann sez ki annan, bann lekipman dan lakres in ganny, in ganny dezenfekte. E la bann baraz - bann baraz in ganny mete pou ki bann *pest* bann lera pa kapab pase pou antre dan lekoul, dan laklas. Pa dan lekoul me laklas. E sa pe ganny fer avek bann volonter serten travayer Minister ledikasyon.

E osi bann Servis Prizon. Pou fer resorti bann prizonnyen pe fer en travay ekselan. E nou rekonesan pou sa travay ki pe ganny fer. Nou'n osi kontakte, e fer *assessment* avek Lotorite Lanvironnman, *Enforcement Unit e Land Waste Management Agency*. Akoz nou pe vwar ki otour lekoul i annan bokou salte ki pe ganny zete. E pa neserman lo propriyete Minister Ledikasyon. Bokou salte pe ganny zete dan zalantour, bokou dan bann boursay menm dan larivyèr.

E Minister Ledikasyon la pe demann avek Lotorite Distrik pou nou kapab vwar ki manyer nou pou fer pou fer sa netwayaz zeneral. E parey mon'n dir i annan de ler ki sa bann, sa bann kondisyon i pa neserman lo propriyete Minister Ledikasyon i dan zalantour.

E la nou bezwen travay avek tou partner, enkli ki bann Manm dan kominote ki manyer nou pou kapab kontrol nou lafason ki nou zet salte.

E lafason ki nou kapab fer pou kit lekoul zalantour lekoul prop. Donk, nou swete ki enn fwa pou tou apre sa travay entans ki nou pe fer la enn fwa pou tou nou ava elimin sa problemn. Mersi Mr Speaker.

MR DEPUTY SPEAKER

Mersi Minis pou ou larepons. Ou annan siplemanter Onorab?

HON MICHEL ROUCOU

Mr Speaker, anefe mon le dir Minis avek son lekip mersi. E Departman Prizon e bann *teacher*, Mis Sherley avek son bann teacher ki zot in groupe ansanm pou zot kapab fer en louvraz. Pou zot kapab rod en fason pou met lekol en pti pe plis dan sa lapropte.

Minis mon konnen poudir kot lekol i annan en kontrakter, ki ganny kontra pou li netway en pti pe lekol, met prop. E osi i annan en lazans ki zot tir salte tanzantan kot lekol. E nou war pou dir kot lekol souvandfwa, i annan letan kot salte pa ganny tire bann zour ki ti merite ganny tire.

E osi petet ki zot pe fer ki sa lazans ki pe netway lekol, ki petet i annan serten letan kot dan plas zot kontinyen swiv sa *schedule* parey zot pran, ki annan serten letan pete zot fer en *one-off*, ki sa i vin en proper netwayaz. Mersi.

MR DEPUTY SPEAKER

Mersi Onorab. Minis ou annan en larepons?

MINISTER JUSTIN VALENTIN

Mersi Mr Speaker. I vre ki annan de ler e sa i pa neserman zis pou lekol Mont Fleuri. I annan detrwa lekol kot lekip ki ansarz lapropte e lizyenn i pa satisfè, avek lafason ki bann *agencies* ki ganny sa responsabilite pou netway lekol i fer.

E dan sa ka, i annan en ta travay ki nou fer avek sa bann dimoun. I annan osi bann *warning* ki bann *agency* pe gannyen, akoz lafason ki zot pe fonksyonnen pa anliny avek sa ki nou pe fer.

E i annan resaman kot bann *agencies*, bann *agency* in ganny tire dan lekol. Akoz zot pa pe netway lakour lekol byen.

Me selman lo sa ka Mont Fleuri spesifikman, i pa neserman osi zis lo sa *agency*. Me i zalantour lekol, zalantour lekol i sal. Donk, e parey mon pe dir i pa neserman lo propriyete Minister Ledikasyon.

Be la nou pou gete ek bann diferan Lotorite Distrik, pou nou gete ki mannyer nou anforsi bann netwayaz. Ki mannyer petet nou demann bann dimoun ki responsab pou zet salte, pou kapab sibir bann konsekans ki neser.

E anplis ki sa, wi, bann landrwa, bann lazans, petet ki pa vin tir salte letan i fodre, sa

osi nou ava koz avek zot pou montre zot en ka spesifik. Petet sa ka Mont Fleuri i a ganny servi koman en *real case study* pou dimoun vwar, ki mannyer si nou pa pran nou responsabilite ki kapab arive. E ki difikilte, nou pa met zis en lekòl. Nou met paran, akòz ozordi ki pe arive?

Nou vwar ki paran, en bon group paran i war zot. La ozordi sa semenn anba presyon. Akòz zot pa kapab zot pa konnen ki mannyer zot pou fer avek zot zanfan, *or* zot bezwen, zot bezwen pa al travay pou kapab reste ek zot zanfan. Akòz petet en lot dimoun pa'n pran son responsabilite.

Donk, nou pe demann tou dimoun, tou lazans ki konsernen sirtou kot i konsern bann zanfan, pou zot kapab pran zot responsabilite. E nou bouz devan efektivman. Mersi Mr Speaker.

MR DEPUTY SPEAKER

Mersi Minister. Sa larepons in anmenn nou lafen nou sesyon kestryon pou ozordi. Nou ava zis demann *SBC* en pti leskiz pou sa dezekelibrasyon, ki nou'n fer dan zot programasyon. Nou ava remersi *panel* ki ti avek nou, dirize par Minis pou ledikasyon Dokter Justin Valentin akonpanyen par son

Sekreter Prensipal pou *Education Services Department* Manmzel Merna Eulentin. Mr Bernard Arnephy ki Direkter *Zeneral for Institutional Support Services*.

Nou pou *adjourn* la, nou pou rebran 2er apre midi. Ler nou rebran i annan 2 Mosyon lo *Order Paper* pou apre midi. E *Bills Committee* li i pe zwenn la zis apre. Donk, nou a zwenn 2er. Mersi.

(BREAK)

MR SPEAKER

Bonn apre midi tou dimoun. Manm Lasanble, *Staff*, e nou piblik. Nou annan apre midi nou annan Mosyon lo *Order Paper*. Oule adres keksoz avan, Onorab Hoareau? Wi?

HON JOHN HOAREAU

Bonn apre midi Mr Speaker. Bonn apre midi tou dimoun ki a lekout. Mr Speaker mon ti pou demann ou lotorizasyon, ou *leave* lo nou *Standing Order 97* pou nou kapab *change the order of business* lo *Order 25*.

Akòz ki *Bills Committee* nou'n fek zwenn apre midi la, pou diskite enn de dernyen pti lamannman ki nou pa ti'n tonm dakor avek Biro *Attorney Zeneral* lo sa *Bill Mascarene Plateau*. Alor nou pou bezwen

pran Mosyon ozordi avan. E nou ava pran *Bill* demen bomaten si ou dakor. Mersi.

MR SPEAKER

Byen. Mon krwar sa ti'n ganny prevwar. Me selman nou bezwen sa Mosyon pou nou met nou prosedir annord. Alor mon a demann segonnman pou Mosyon Onorab Hoareau. Onorab Naidu.

HON SATHYA NAIDU

Mersi Mr Speaker. Mosyon in ganny segonde.

MR SPEAKER

Manm a vot lo sa Mosyon silvouple. Manm ki an faver lev lanmen? Byen. Manm ki kont? Mosyon pou *wave order of business* anba *Order 25*, 19 manm in vot pour, 0 kont e 8 *abstain*. Alor sa Mosyon in aprouve, nou a kapab prosede.

Bon, mon ti pe dir lo *Order Paper* nou annan Mosyon. Me, mon'n rankontre- nou annan 2 Mosyon. Enn dan non Onorab Cosgrow e lot dan non Onorab Waven William. Mon'n ganny en konplikasyon. Mon'n rankontre en konplikasyon an relasyon avek Mosyon Onorab Cosgrow. E mon pou eksplik li byen, eksplik Lasanble byen.

E Onorab a ganny en konpran ki mon pa pe sey tir

son Mosyon, oubyen pe met li retar. Me selman ekout mwan. E zot a war ki mon pe dir. *Order 78, Order 78* mon bezwen lir *Order 78* avan. E si zot kapab swiv mwan silvouple. *Financial restrictions on Bill, Motions and Amendments*;

Except for the recommendation of the President signified by a Minister, neither the Assembly nor a committee shall;

(a) *Proceed upon a Bill (including any amendment to a Bill) which, in the opinion of the person presiding or the Attorney General provides or imposing or increasing any tax, for imposing or increasing any charge on the revenue or other funds of Seychelles or for altering any such charge otherwise than by reducing it or compounding or remitting any debt due to the Government of Seychelles.*

(b) *Proceed upon any Motion including any amendments to a motion, the effect of which in the opinion of a person presiding or the Attorney General is that provision would be made for the*

purpose aforesaid. So, (b) i refer *back to* (a).

Prezan Mosyon Onorab Cosgrow i lir koumsa “sa Lasanble pe demann avek Gouvernman pou reviz son Lalwa Fon Pansyon Sesel (*S.I 135 of 2022*), pour ki bann kategori travayer ki *entitled* pou resevwar en pansyon spesyal servis piblik, i ava osi kapab pran zot retret a laz 60an, san okenn rediksyon dan sonm ki zot resevwar.”

Bon konplikasyon ki annan 2 pwen. E zot a remarke ki lopinyon *Attorney General* i ganny site dan sa *Standing Order*. E mon’n bezwen konsilte *Attorney General*. I annan 2 pwen. Premye pwen se ki si Fon Pansyon i enn bann *other funds of Seychelles* anba Lalwa. E sa in ganny note. E mon a donn zot lopinyon *Attorney General* dan en moman, Eski Fon Pansyon i enn sa bann *other funds of Seychelles*, ki ganny kouver anba *standing Order 78*?

(b) se dan pwen (b) ki nou pa kapab prosede lo en mosyon ki enkli “*and increase in the charge*”. I annan sa konplikasyon *S.I 135*. E dan sa *S.I 135*, i annan provizyon ki Gouvernman pou pey Fon Pansyon pou sonm ki nesaser.

Premyerman, zot ava eskiz mwan akoz mon’n remark sa tre tar. E mon’n fer tou le nesaser pou mwan sey kapab klarifye sa.

S.I 135 i pou provide pou Gouvernman kapab pey Fon Pansyon, pou larzan ki nesaser pou zot pey bann pansyon militer. So, mon annan sa konplikasyon.

Prezan mon pe dir Onorab Cosgrow, mon pa pe retir ou Mosyon konpletman. Me selman mon bezwen *postpone* li. An tandan en repons kler sorti kot *Attorney General*. Si *Attorney General* i klarifye sa 2 pwen, ki mon napa problem, nou a pran Mosyon parey i ete.

Si prezan i war obzeksyon mon pou sel opsyon, se pou regarde si ou kapab *amend* ou Mosyon, pou nou pa bezwen al kontrer avek *Order 78*. ok? Wi Onorab Cosgrow, mon a donn ou laparol prezan.

HON WALLACE COSGROW

Mersi Mr Speaker. Bonn apre midi Mr Speaker. Bonn apre midi tou Manm e tou dimoun ki pe ekout nou. Mr Speaker mon annan 3 pti pwen ki mon ti a kontan fer resorti. Mon premye pwen Mr Speaker, malgre ki ou’n dir si nou ava eskiz ou pou letan ki ou’n vin anons nou sa. Mon en pti pe regrete Mr

Speaker, akoz mon Mosyon ti ganny mete lo *Order Paper* en kantite letan pase. Annefe plis ki 1 semenn pase.

E mon ti ava ekspekte ki si ti annan okenn nesesite pou mwan reviz mon Mosyon, mon ti ava'n fer li avek letan, ase letan pou nou kapab pran mon Mosyon ozordi.

E mon Mosyon i en Mosyon ki mwan mon santi i tre, tre enportan pou nou koz lo la koman en Lasanble. E pou manm piblik osi kapab fer zot kontribisyon. I dezole Mr Speaker ki ou'n pran sa desizyon ozordi apre midi.

Mon dezyenm pwen Mr Speaker, i sa ki konsern pwennvi *Attorney Zeneral*. Mon pwennvi pou mwan mon pa krwar ki Fon Pansyon i *other funds of Government*. Akoz Fon Pansyon i fon kontribiter pep Seselwa.

Dimoun ki kontribye ladan i pa fon Gouvernman. E mon pou *beg to defer* avek *Attorney Zeneral* lo la. E mwan mon krwar poudir i devret ganny pran mon Mosyon parey i ete.

E mon trwazyenm pwen Mr Speaker i konsern Mosyon. Mosyon pa *binding*. E i rekomandasyon. E petet si nou ti kapab revwar *wording* Mosyon. Si nou ti'n ganny letan

pou nou revwar *wording* Mosyon. Mosyon ti ava diferan, e nou ti a kapab pran sa Mosyon ozordi apre midi.

I ti pou zis pozisyon met devan Gouvernman anvi ki i en size ki ozordi ki bokou Seselwa, i met bokou latansyon avek.

E parey mon dir Mr Speaker a sa pwen, a sa ler mon dezapwente. E mon dezole ki sa desizyon pe ganny pran dan sa Lasanble ozordi. Mon dezole akoz sak fwa mon anmenn en keksoz, souvan fwa mon anmennen tou mon keksoz i ganny rezete. E i malere Mr Speaker, i malere si mon kapab dir koumsa. Mersi bokou.

MR SPEAKER

Mersi Onorab Cosgrow. Wi. Me mon ti pe mazine ki ou pou akiz mwan, en mannev kelkonk. Me selman mon oule dir senserman. E i avek regre ki mon pa'n war sa pli boner. E in swivre mwan zis letan mon pe regard *Order Paper* pe repase, pou gete lo ki size ki mon'n remark sa konplikasyon.

E mon'n sey fer tou mannyer pou sey sort out osi vit ki posib. Me mon pa'n reisi, akoz *Attorney General* in dir mwan wi, i en pwen en pti pe konplike i bezwen tyeke. E lo size *Attorney General*, mon a dir ou mon oblize pran son

pwennvi an konsiderasyon. Akoz *Standing Order 78* i fer kler ki son lopinyon i konte ladan.

La ankor Onorab Cosgrow, wi mon regrete ki lafason sa in deroule. Me mon bezwen fer sir ki sa i mars annord. E mon ankor repete pou dir si i posibil, mon pou envit ou pou *reward* ou Mosyon pou gete si nou kapab evit sa konplikasyon.

Onorab Pillay, wi ou kapab adres mwan. E si lezot Manm i le adres mwan lo kestyon prosedir, nou a *deal* avek prosedir mon pare pou ekout zot konsey. Onorab Pillay.

HON SEBASTIEN PILLAY

Mersi Mr Speaker. Mr Speaker mon pe lir *Order 78*. Petet mon oule etabli en konteks pou mon largiman. Byen avan ki mon fer okenn komantr ki ganny war dan okenn fason, ki mon pe *impute* okenn motif, *ulterior motive* lo ou par an relasyon avek sa ki mon pe al dir la.

Semenn pase nou ti annan en Mosyon ki ti fer sispann enn mon Manm dan Lasanble. E *Standing Order* i prevwar ki tou Mosyon lo ki Lasanble i fer en desizyon, a leksepsyon en Mosyon pou fer

adjournment deba. Oubyen en Mosyon pou *adjourn* en prosesis dan komite, tou Mosyon i sipoze ganny ekrir pou li kominik en desizyon Lasanble.

Ti napa en Mosyon ki ti ganny mete lo *Order Paper* sa zour. Me Lasanble ti pran en desizyon ki apre ti ganny kominike avek Onorab Loze, ki'n ganny sispann pou 2 *sitting*.

Ozordi ou vin dir ek nou koumsa aprezan, apre ki ou'n konsilte serten *Standing Order*. E ankor enn fwa an sa ki konsern en size ki *involve* en Manm lo sa kote latab, ou dir ek nou koumsa poudir sa Mosyon ki Onorab Cosgrow in mete i al an kontrovansyon Lord 78.

Kestyon ki nou bezwen demande i se si. Premyerman, ler en Mosyon i ganny *submit* i bezwen *past the test of admissibility*. Savedir se ou koman Speaker, ki deside sa Mosyon e bezwen vin lo *Order Paper*.

Ou'n *allow* Mosyon Onorab Cosgrow pou vin lo *Order Paper*. Mosyon Onorab Cosgrow in aparet lo *Order Paper*, in ale in napa okenn obzeksyon ki'n ganny *raise* a okenn Manm lo kote mazoriter, okenn lezot Manm lo kote isi lo Lopoziyon.

Prezan ou'n lir nou, sa *clause* ki *relate* avek lopinyon *Attorney Zeneral*. E mon ti a kontan ki piblik i enterpret byen sa *clause*, ki dir “nou pa devret prosede lo en Mosyon oubyen lamannman ki en Mosyon ki annan lefe. Lefe se ki pou enpoz en sarz lo Gouvernman, si dan lopinyon sa dimoun ki pe *preside* oubyen *Attorney Zeneral*”.

I pa dir lopinyon sa dimoun ki pe *preside* e *Attorney Zeneral*. I pa dir tou lede, i dir enn oubyen lot. Si ou pe dir nou sa ki ou pe dir nou se ki *Attorney Zeneral* in ganny konsilte. *Then* desizyon pou retir Mosyon Onorab Cosgrow i ou desizyon pou *hold* lo Mosyon Onorab Cosgrow. I ou desizyon apre ki ou'n menm aksepte pou les son Mosyon lo *Order Paper*.

So, kekyon ki nou bezwen enterprete lo sa kote latab se, eski *Standing Order* i aplik dan en fason pou nou? E i aplik dan en fason pou lot kote latab. Mon a sit legzanp Mosyon Onorab Waven William ki ti dir ek Gouvernman “o fir e amezir ki keksoz i amelyore” sa osi ti enpoz en sarz lo *Consolidated Fund*. Akoz pou li ti pli direk, ou ti les pase.

Ki *manner* alors pou Onorab Cosgrow ozordi nou dir li poudir non ou pa pou kapab

ale, apre ki nou'n fini fer tousala. Me prezan kot nou bezwen *raise en matter of privilege* nou. Akoz, akoz i en privez Manm pou anmenn en Mosyon.

Nou *matter of privilege* i *relate to the fact* ki ou ti'n devret enform Onorab Cosgrow depi bomaten, ki son Mosyon pa pou kapab *prosed* lo *Order Paper*. Ou pa'n fer sa Mr Speaker. Ou'n vin enform Onorab Cosgrow la *on the floor* apre midi.

So, i reste nou pou zis krwar poudir ou pa oule sa Mosyon pase devan Lasanble ozordi. E ou pa oule Onorab Cosgrow anmenn en deba lo sa Mosyon. E deplis Gouvernman i annan en mazorite. Si zot pa dakor avek bann propo sa Mosyon, zot a vot kont sa Mosyon.

E mon dernyen pwen Mr Speaker. An se ki konsern *other funds of Seychelles*. Lenterpretasyon *Standing Order* i *relate* avek lenterpretasyon Konstitisyon. Sa *clause* i sorti direk dan Konstitisyon. Konstitisyon i fer kler bann fon Sesel, Fon Pansyon pa enkli, Fon Pansyon i en fon kontribiter en Fon Pansyon.

Sa ki Onorab Cosgrow pe koz lo en desizyon Fon Pansyon. E mon pa war rezon, akoz ki

nou pa kapab fer en deba, akòz sa i al dan lentere plizyer endividi, ki Lasanble in deza pronons son lekòr lo la enkli ou menm dayer Mr Speaker.

So, mon ti a kontan ki ou revwar ou desizyon, prenan kont ki nou deza annan presedans devan Lasanble kot en Mosyon parey in deza pase. Mersi Mr Speaker.

MR SPEAKER

Mersi Onorab. Premyèman mon regret, petet lakizasyon ki ou'n fer ki mon'n *bias*. Selman mon asir ou poudir mon'n konsider sa konplikasyon ase tar, zis avan nou rantre. E mon'n zis ganny ase letan pou mwan konsilte *Attorney General* lo serten size. So, si ou dir mwan bomaten, bomaten mon pa ti la mon ti dan en fonksyon. So, mon pa'n ganny sa adres sa bomaten.

Lo size *funds*, mon'n eksplik ou poudir enn bann konplikasyon se *S.I 135*, ki dir ki Gouvènmàn pou *top up* larzan ki Fon Pansyon i bezwen, pou pey sa bann fon spesyal. So, se sa ki dan mon lopinyon e dan lopinyon *Attorney General* i kapab vin en *charge* lo Gouvènmàn. Mon pou aksepte, mon apresye zot largiman, zot kontribisyon. Me selman mon pou *stand* lo mon

desizyon pou *postpone* Mosyon Onorab Cosgrow.

Mon pou enform li o si vit ki posib lo ki pozisyon. E pou donn li posibilite pou li *reword* son Mosyon, si nou war en fason pou met li ki i pa bezwen an konfli avek *Standing Order* 78. Mersi bokou. Mwan mon remersye zot pou zot konprenezon.

E avek sa. Bon Onorab mon ava donn ou dernyen pwen. E nou ava terminen. Mon'n reviz ou bann largiman, e mon'n donn mon lopinyon lo la. Mersi.

HON SEBASTIEN PILLAY

Mersi Mr Speaker. Mr Speaker mwan mon ti fer en *commitment* ki mon pa antre dan, pou kre bann largiman ki anmenn okenn alegasyon, oubyen bann lesanz ki pa anliny avek lespri nou Lenstitisyon. E mon ti a kontan met sa osi devan ou. Ler en Mosyon ki dan non en Manm in ariv ler pou li *move*, mon esey ganny en konpran petet ou ava eksplik mwan. Ki pouvwar egzaktèman ki ou pe servi pou anpes Onorab Cosgrow *move* son Mosyon ozordi? Mon konpran Lord 78.

Lord 78, i vèdir ki sa Mosyon pa devret ariv lo *Order Paper*. Sa i byen. Sa i son *test of admissibility*. Dan sa konteks

ou a dakor ek mwan lo en pwen largiman ki, *in term of diligence the Chair has failed* pou fer *diligence* dan sa konteks.

In terms of argument, lo ou pwennvi largiman, *Chair in fail* pou fer son *diligence*. Me Mosyon in ariv lo *Order Paper*. Prezan mon ti a kontan konnen ki provizyon ki ou pe servi pou anpes Onorab Cosgrow *move* son Mosyon? Ki *stand* lo son non. Mersi Mr Speaker.

MR SPEAKER

Wi. Mon pe servi lotorite ki donn Speaker, ki donn Speaker lotorite pou *rule* lo tou *matters* Lasanble, *for the proper following of these Standing Orders*. E se sa i dan sa *Standing Order*. Mersi. *Point of order* Onorab?

HON SEBASTIEN PILLAY

Mersi Mr Speaker. Mr Speaker, i kler ki si ou pou servi sa provizyon i zis dan konteks kot *Standing Order* pa prevwar ki pou arive, *ok?* Me *Standing Order* i prevwar, kan en Manm i bezwen *move* son Mosyon. Anfen kont Mr Speaker, dan sa konteks ou napa lotorite pou anpes Onorab Cosgrow *move* son Mosyon.

E napa en *Standing Order* ki permet ou, *unless* mon ganny en Mosyon, ki sispann *Standing*

Order ki permet ou servi ou perogatif koman Speaker, pou kapab fer sa. *that is* pou sispann sa Lord ki pe anpes Onorab Cosgrow *move* son Mosyon.

In napa okenn Mosyon ki'n ganny *move* par okenn person pou sispann *Standing order*, pou anpes Onorab Cosgrow *move* son Mosyon. Alors ou largiman ki ou annan lotorite zeneral lo Lasanble, Mr Speaker avek *all due respect* i pa fonde. Akoz ou annan lotorite zis lo bann keksoz ki *Standing Order* pa prevwar.

Me anba *Standing Order* i prevwar ki ler Mosyon i lo non en Manm, sa Manm i annan drwa *move* son Mosyon *as* i son privez pou *move* son Mosyon.

So, *unless* ki ou ganny en Mosyon ki permet ou pou sispann *Standing Order* a sa moman Mr Speaker, ou pou bezwen les Onorab Cosgrow *move* son Mosyon.

E prezan si oule annan sa konsiltasyon, pou nou pa *proceed further, then*, mazorite pou bezwen *move* en Mosyon *for adjournment of debate* pou konsider sa Mosyon en lot zour.

Nou annan en prosedir Lasanble ki bezwen ganny swiv. E si ou dir mwan ou pa pou swiv sa prosedir pou fer 2enm fwa, 2enm legzanp ki mwan

mon krwar sa pa pe ganny swiv Mr Speaker.

Mon pa krwar ou annan lotorite zeneral dan konteks kot Mosyon i konsernen. Akoz i pa dir ou anba Mosyon ki Speaker i kapab anpes sa Manm *move son Mosyon. Test of admissibility* in fini pase Mr Speaker. Mosyon in ariv lo *Order Paper*. Mosyon i pou Lasanble i pa pou Speaker *anymore*. Mersi Mr Speaker.

MR SPEAKER

Onorab Georges, ou a kapab ganny laparol.

HON BERNARD GEORGES

Mersi Mr Speaker. Mr Speaker mon pa ti anvè antre dan sa deba apre midi. Mon krwar ou'n fer ou pozisyon tre kler. Me mon ti a zis kontan *remind* Lasanble ki anba *Order 25(2)(1)* ou annan lotorite pou decide anmenn swa en *Bills*, swa en Mosyon *or any other business* ki devret *proceed the remaining business of the day*.

E ou'n dir tre klerman ki ou pou *postponed* en Mosyon pou anmenn en lot. E mon pa vwar akoz ou lotorite i ganny met anba kestyon. Mersi.

MR SPEAKER

Mersi. Onorab Pillay?

HON SEBASTIEN PILLAY

Mersi Mr Speaker. Mr Speaker mon ti ekspekte sa largiman. Me 25(2)(1), i ganny servi an konteks en Mosyon ki annan pou fer avek en *matter of privilege or lezot item* ki pou *precede the order of the day*. Me pou ou kapab varye *Order 25*, ou bezwen en Mosyon *for the suspension of Order 25*.

Sel Mosyon ki ou'n gannyen *for suspension of Order 25* annefe, i fer ki Mosyon Onorab Cosgrow, i sipoze vini. Si ou ti'n ganny ou en Mosyon pou sispann *Order 25*, ki ti dir nou pa pou pran *Second Reading Bill Mascarene* e nou pa pou pran Mosyon Onorab Cosgrow, e Lasanble ti'n dakor, la wi.

Be ti napa sa Mosyon. Mwan, akoz sa i bezwen al lo rikord Lasanble ki keksoz pe ganny fer byen. E Onorab Georges pa kapab montre mwan kote ou annan lotorite, pou anpes en Manm ki annan en Mosyon dan son non *move son Mosyon*. Napa sa lotorite ki ou'n gannyen Mr Speaker. *Unless* Lasanble i donn ou sa lotorite.

Alors mon pe regarde si parti mazoriter ki annan en mazorite, i pare pou donn ou sa lotorite se tou ki nou pe rode.

I senp sa napa, napa largiman ki nou le fer ouswa pou *challenge* ou lotorite. Nou respekte ou lotorite, nou anvi ou ganny sa lotorite. Me nou ti a kontan ki nou fer li byen. Parti mazoriter *move* pou anpes Mosyon Onorab Cosgrow pase, i senp sa.

Otherwise, nou pa pou kapab aksepte sa Mr Speaker. E si nou proteste nou sorti, eski nou pou ganny blanmen ankor? Nou pa pou kapab ganny blanmen ankor. Nou'n vin la pou nou travay, zot blanm nou zot dir nou pa kapab swazir travay. Me apre zot blok nou Mosyon.

So, fer sa ki zot anvi fer avek zot mazorite. Be Mr Speaker, Onorab Cosgrow i bezwen kapab *move* son Mosyon. Akoz nou dan en lenpas.

Ou napa lotorite pou anpes en Manm *move* en Mosyon ki dan son non, *unless* i annan en Mosyon ki anpes sa Manm pou fer li.

Parey Onorab Henrie ti fer avek mon Mosyon en fwa, i ti *move* en Mosyon, mazorite ti vote pou *adjourn* deba lo la, sa napa problem.

Me i bezwen ganny fer dan en fason ki kler. E nou lir byen *Order 25* Mr Speaker.

MR SPEAKER

Mersi. Bon *ok*. Mon pou met sa kestyon devan Lasanble. mon'n fer mon pwen kler, akoz Onorab Cosgrow mon bezwen *postpone* son Mosyon. Mon bezwen *postpone* son Mosyon. Eski Manm Lasanble i anvi *move* en Mosyon pou *suspend Order 25* pou nou pran *other* business dan plas Mosyon ki lo *Order Paper*. Eski Manm Lasanble i anvi anmenn sa Mosyon? Onorab Georges.

HON BERNARD GEORGES

Non Mr Speaker. Mon pa krwar nou bezwen. Parey mon'n dir. Onorab Pillay i annan drwa a son lenterpretasyon *Standing Orders*. Me *Standing Order 25*, i donn ou e selman ou lotorite, pou decide ki en Mosyon, en *Bill* oubyen lezot biznes ki dan ou lopinyon, i devret *precede the remaining business of the day* pou fer li.

Ou'n decide dan plas pran Mosyon Onorab Cosgrow, ou pou pran en lot biznes ozordi. Sa se ou prerogativ, e ou'n egzers li an konformite avek *Standing Orders*. Sa ki Onorab Pillay pe dir ki sa i annan zis pou fer avek *matters of privilege* Mr Speaker, *is neither here nor there*.

Si en Manm i anvi sispann *Order 25* pou fer en biznes ki pa

anba 25 (2)(n) pran presedans lo en lot, sa nou ava fer li. Me la ozordi se pa sa ki pe arive. Ou, ou annan lotorite pran en Mosyon, avan en lot Mosyon. E ou'n egzers sa lotorite. Mon pa konpran akoz ki Onorab Pillay pe kontinyelman debat lo sa pwen. Mersi.

MR SPEAKER

Ok. Ou pe dir mwan *Order 25(2)(a)*? *Order -?*

HON BERNARD GEORGES

25(2)(n). *N for November.*

MR SPEAKER

25(2)(n), Wi. *Any motion, Bill, or other business which, in the opinion of the Speaker, should precede the remaining business of the day;*

I kler. Onorab Pillay mon'n fini fer en desizyon. Onorab Waven William, mon pou apel ou pou met ou Mosyon. Onorab William ou Mosyon silvouple.

HON WAVEN WILLIAM

Mersi Mr Speaker.

MR SPEAKER

Ale, les mwan ekout sa dernyen *point of order*. Wi?

HON SEBASTIEN PILLAY

Mersi Mr Speaker. Mr Speaker, Onorab Georges pe servi en

largiman ki pa konkret. Ou ti'n kapab servi 25(2)(n), si nou pa ti ankor ariv lo *Motions of which notice has been given*. Get mannyer *Order 25 is worded*. Laplikasyon 25(2)(n) i vin apre ki nou pran *Motion for the adjournment of the House under Order 22, ok?*

Ler nou'n ariv la, avan ki nou pran *Bills* ou annan drwa a sa moman met okenn *item* lo *Order Paper*. Be nou'n sispann *Standing Order*, nou'n al direk lo (p) *Motions of which notice has been given*. Be nou'n fini arive. Akoz Onorab Cosgrow son Mosyon ki'n ariv la, e ki'n en pwen kontansyon.

So, ki mannyer Speaker ou kapab retourn nou deryer. E dir pou dir ou ganny drwa fer en Mosyon vin presedans dan lezot Mosyon. Si ou ti'n fer sa, e dir Onorab Cosgrow sa depi lo komansman ki ou pou pran Mosyon Onorab William avan son Mosyon.

E letan Onorab Hoareau ti pe *move* son *Motion for adjournment* i ti'n dir sa, then nou ti aa aksepte lo sa kote latab. Be sa ki pe arive la, i montre klerman ki poudir nou *Standing Order* pe ganny servi pou anpes nou travay.

So, ki nou pe dir ek ou, fer i parey i devret ganny fer. Ou menm ou bezwen kapab war

poudir kote ki dir ou sa. I dir 25(j) *statement by Ministers*. So, nou'n fini keston, napa *statement*. *Personal explanation* in napa, *matter of privilege* in napa, *Motion for adjournment* in napa.

Prezan i vin (1). (1) i dir Speaker i deside prezan a sa moman, avan nou pran *Bills* ki lo *Order Paper*, avan ki nou pran Mosyon ki lo *Order Paper*, mwan mon annan en Mosyon ki mon anv Lasanble i pran, mon annan en *Emergency Bill* mon anv Lasanble i pran. I byen sa, mon napa problem ek sa, sa i ou pouvwar.

Be nou'n fini desot sa step, nou'n ariv lo *step a Motion of which notice has been given*. *Notice has been given*, lakantite zour in ganny pase e i kler sa. So, ki mannyer ou kapab dir mwan ou pou reservi en pouvwar ki pa permet ou a sa moman pou anpes sa Manm *move* son Mosyon.

Sel keksoz ki permet sa Manm, e Onorab Georges i konnen zot kote pa oule *move* pou fer sa. Akoz i pou montre Lepep Seselwa egzaktman ki zot vre kouler. Vwala ki zot pa oule fer.

MR SPEAKER

Mersi.

HON SEBASTIEN PILLAY

Zot pou bezwen montre nou ki zot pa oule donn sa pouvwar Mr Speaker.

MR SPEAKER

Mersi Onorab. Mersi pou tou sa bann largiman. Mon krwar in ede pou eklersi pozisyon. Mon satisfè ki *Order 25* i donn mwan sa lotorite pou sanz lord biznes. Onorab William, nou a ekout ou Mosyon.

HON WAVEN WILLIAM

Mersi Mr Speaker. Bonn apre midi tou dimoun ki a lekout. Mr Speaker Mosyon i lir konm swivan;

Swivan desizyon enportan COP27 ki konsern kreasyon en fon pou *loss and damage* pou ed bann pei ki'n ganny afekte par sanzman klima, Lasanble i demann Gouvernman pou fer tou sa ki neser lo en plan rezyonal e enternasyonal, pour ki sa desizyon i ganny realize e enplimante o pli vit posib.

MR SPEAKER

Mon a ganny segonnman pou sa Mosyon silvouple? Onorab Esparon.

HON REGINA ESPARON

Mr Speaker, mon pou segonn Mosyon Onorab William. Mersi.

MR SPEAKER

Mersi Onorab. Ou kapab prezant ou Mosyon.

HON WAVEN WILLIAM

Mersi Mr Speaker. Mr Speaker, sa Mosyon i pa difisil, i pa konplike. I pe senpleman demann Gouvernman pou fer le neserer dan son laporte, o nivo rezyonal ouswa enternasyonal, menm nasyonal, pou ki desizyon ki'n ganny pran lo *loss and damage* lo COP27 i ganny realize, e enplimante o pli vit posib.

Mr Speaker mon ti a kontan donn en pti bilan kwa ki pe arive depi ki sa desizyon in ganny pran. Mr Speaker i annan en Komite Tranzisyon ki'n ganny kree, kot 24 reprezantan dan diferan rezyon mondyal, ensi ki bann lezot reprezantan ki form apepre en 45mil dimoun ki pe travay; pou fer sir ki COP28 zot kapab prezant serten rekomandasyon pou kapab enn, trouv sa fon an menm tan fer li vin an operasyon.

Mr Speaker, Sesel koman en *large oceanic state* ki pa pe polye latmosfer parey bann pei devlope. Mr Speaker nou atas vreman gro lenportans avek sa desizyon, ki'n ganny pran dan COP27 lo *loss and damage*.

Mr Speaker, sa komite tranzisyon zot in prevwar pou fer 4 *meeting*. Zot ti zwenn lafen Mars, zot in zwenn osi lafen May. E zot annan ankor 2 lezot *meeting* pou fer.

Zot annan bann diferan groupman ki pe travay, pa zis sa komite tranzisyon. Me i annan bann lezot komite ki pe donn gidans, pou kapab fer sir ki letan sa lot *meeting* lafen lannen ki nou konnen ki Prezidan pou en *high level delegation* pou asiste COP28. Zot pou kapab konnen ki bann desizyon ki'n ganny pran, pou kapab realiz sa fon.

Mr Speaker nou okouran osi poudir letan lakor *Paris Agreement* ti ganny sinyen an 2015, ti annan bann *pledges* ki ti ganny fer pou bann pei devlope kontribye anviron \$100*billion* par an. E nou konnen poudir sa pa'n zanmen ariv lo son target. E Sesel in benefisye serten proze anba diferan *scheme*, ki tonm anba bann desizyon ki'n ganny pran pou donn bann fon.

E Mr Speaker i en lager ki bann pti leta zil e pei devlope zot kontinyelman pouse pou fer sir ki bann pei devlope, zot pran serten degre responsabilite. So, i ti tonm byen ki lafen *meeting COP27* apre bokou negosyasyon, e presyon mete

par bann pti pei leta zil. E bann lezot pei ki pe devlope kot sa desizyon ti ganny pran.

Alors Mr Speaker sa i kre en lot *avenue*, pou nou kapab ganny bann nouvo finansman. Sirtou par lefe ki koman bann *Large Oceanic State* ouswa *Small Island State*, nou annan bann proze ki tonm anba adaptasyon avek mitigasyon. Kot bokou larzan i nesese pou kapab ganny depanse, pou kapab, enn;- fer sir ki nou bann nivo enfrastriktir i *meet* bann mon kapab dir lekspektasyon lefe sanzman klima.

Mr Speaker, alors i tre enportan ki Sesel i kontinyelman pouse e fer tou sa ki nesese dan sou rezyon. Par egzantp o nivo *COI*, e isi Sesel nou annan bann *Resident Ambassador* ki reprezant bann diferan bann gran pei devlope. Ki mon santi sa *lobbying* bezwen ganny fer e entansifye.

I annan en lot komite pti leta zil lo nivo Lafrik, ki serten travay pe ganny fer. Alor Mosyon pe demande ki Gouvernman i fer tou sa ki nesese, pou fer sir ki *COP28* letan bann rekomandasyon i ganny met devan Lasanble. Ki nou kapab met ankor presyon pou fer sir ki sa fon i ganny realize.

Mr Speaker resaman nou'n antann Prezidan letan i ti pe fer son vizit laba Maldive, ki'n koz lo la. Ki dan *meeting* La Digue letan i ti pe eksplik lo en kestyon demande par en rezidan Digwa. Kot i pe dir ki Sesel avek Maldive zot pou zwenn ansanm lo sa groupman pti leta zil, pou fer sir ki keksoz i bouz de lavan.

Alors Mr Speaker, Mosyon i senp. E Mosyon pe dir ki sa desizyon i ganny pran lo nivo *loss and damage*, nou pe demande ki Gouvernman i fer tou sa ki posib. Tou sa ki posib ki sa fon i ganny realize, e vin an operasyon. Mersi Mr Speaker.

MR SPEAKER

Mersi Onorab. Eski segonder Mosyon ou ti a kontan adres Mosyon la? Onorab Esparon.

HON REGINA ESPARON

Mersi Mr Speaker. Mon ti a kontan dir 2 mo, pou siport largiman Onorab William.

Mr Speaker, mersi pou donn mwan sa loportinite, pou dir 2 mo lo sa Mosyon ki lir koumsa ki mon'n segonde;

Swivan desizyon enportan *COP27* ki konsern kreasyon en fon pou *loss and damage* pou ed bann pei ki'n ganny afekte par sanzman klima, Lasanble i

demann Gouvernman pou fer tou sa ki neser lo en plan rezyonal e enternasyonal pour ki sa desizyon i ganny realize e enplimante o pli vit posibil.

Mr Speaker, mon pou siport largiman ki prezantater Mosyon in fer resorti dan son prezantasyon. Parski sa size sanzman klima ozordi i enn ki pe okip latansyon lemond antye. Fodre fer resorti ki i pa zis preokip lemond. Me i pe afekte lemond antye. Sirtou bann pti leta zil parey nou menm isi Sesel, nou vwazen Moris e osi bann pti pei zanmi parey Maldive. Kot zot deza, zot in perdi serten zot zil atraver sanzman klima.

E sa ti ganny fer resorti dan COP26 dan en *site meeting* ki mon ti ganny sans asiste. I ti fer resorti ki sityasyon i enn ki merit ganny latansyon spesyal. Ler bann Sef Deta i zwenn pou diskite bann size sanzman klima. E ki tou bann pei ki ganny afekte, i merit koz menm langaz. E sirtou bann pti leta zil ki sitye lo bann *flat land* ki malgre ki ozordi zot pa ankor ganny afekte, me ki annan sa *risk* ganny afekte a lavenir.

Ki zot osi zot devret pe apiy sa largiman, pou demann bann pei pli devlope ki zot aksyon i afekte bann pti leta zil. Pou kontribye finansyerman

pou repar domaz, kontribye par mitigasyon. Kontribye pou mitigate sityasyon tel parey finansman pou konstri baraz proteksyon pou prezerv lakot. Sirtou bann pti leta zil ki zot lakot pe ganny afekte oubyen riske ganny afekte.

Mr Speaker, se pou sa ki sa size sanzman klima i enn ki vin en size enportan ki pe ganny diskite kot COP26,27,28 pou ganny diskite. Ki mon ti ganny sans asiste parey mon'n dir. E dan son *site meeting* dan Parlman *Scotland* an 2001, 2021. Kot bann pti leta zil parey Moris, Maldive e lezot ti rasanble ansanm pou anmenn sa largiman.

Mr Speaker, sityasyon klima ozordi dan lemond i enn ki pa pe amelyore, me ki pe agrave. E sak lenstans ki pase, sityasyon i vin pli grav. E anviron 150 milyon dimoun ki reste lo lakot i riske ganny afekte. Si selman delo i ogmante par 1 met ou plis.

E lenstisyon resers pou klima in osi anonse ki Losean Pasifik pe fer fas avek El Nino. E parey nou konnen, bann kouran dan losean i kapab bouz sa tanperatir dan bann lezot landrwa, kot parey nou isi Sesel nou kapab pa ganny eparnye.

E si sa i ariv Sesel, si sa i arive Sesel pou reste ek selman

anviron 50 zil. Alor i enportan pou nou rod bann mekaniz. Pou nou osi ganny akse ek sa larzan *loss and damage alongside* bann lezot pti leta zil. Mr Speaker, ozordi sa sityasyon *rise in sea level* i enn ki reel. Mon get sityasyon dan mon distrik, kot nivo lanmer i kontinyelman monte.

E si nou pa fer atansyon, bann batiman o bor lanmer pou pti tap pti ganny balye par nivo laroul ki kontinyen ogmante. La mon pran legzanp sa *bus stop North East Point vizavi Rehabilitation Center*. En batiman ki'n egziste pou plis ki 20an, ki'n ganny balye par lafors laroul e kot in *crack*.

Ozordi mon remerisi Gouvernman ki'n kapab *at least* refer sa *bus stop*, e byento nou pou ganny en *bus stop* la pou bann travayer e bann zanfan ki servi *Vocational Training Center*, pou zot kapab esper bis.

Mr Speaker, nou'n bezwen an se moman la pran plis prekosyon avek sa sanzman klima. Kot pou konstri sa *bus stop* li menm li, nou'n bezwen annan en, en ki mannyer ou apel sa? En *rock armouring* zis par deryer pou ki letan laroul i vini, i bat avek. E sa lafors laroul li menm li i pa ale pou afekte sa nouvo *bus stop* ki fek ganny konstri.

Kot nou'n konstirir bazar Glacis osi, malgre ki nou'n fer en miray nou'n bezwen osi fer *rock armouring* la, pou ki lafors laroul ler i bat avek i pa afekte sa miray ki nou mete avek nou nouvo bazar.

E Mr Speaker sa size sanzman klima, i parey en lot lager mondyal, ki kapab detri en parti lemonn. E ki kapab detri en parti lemonn ki ganny zot lavi otour losean. Akoz aksyon zonm ver lanvironnman.

Mr Speaker avek sa 2 mo, mon pou donn sipor sa Mosyon. Mersi.

MR SPEAKER

Mersi. Mersi Onorab. Mon a donn laparol Onorab Michel Roucou.

HON MICHEL ROUCOU

Mersi Mr Speaker. Mr Speaker mon osi mon pou dir 2 pti mo lo Mosyon, anmennen par Onorab William *MNA* pou distrik Grand Anse. Akoz mon war li i nesaser, anvi ki mon distrik i annan detrwa pti zil ki form par sa i Ile Aux Cerf, Ile Moyenne ek lezot ankor ki o bor li.

Mr Speaker sa Mosyon i vreman enportan. Akoz mon krwar poudir se ki nou osi Lasanble nou bezwen donn sa sipor Gouvernman. An se

moman kot ler zot al *attend* bann seminar deor pou koz lo sanzman klima. E nou osi nou bezwen reste vizilan an term lo kote nou bann pti zil li menm li.

Bokou nou, nou distrik i baliz avek lanmer, lakot li menm li. E mwan mon distrik li menm li, nou annan bann zil ki form par mon distrik Mont Fleuri. E enn partikilye mon mazin Ile Au Cerf kot laba nou annan nou apepre en 30enn manm fanmir ki reste. Kot tanzantan Mr Speaker nou'n bezwen war nou pe asize pe diskite.

E pou zwenn avek Departman Lanvironnman, sey rod bann fason pou kapab sey gete ki mannyer pou ede, ki bann zabitan laba pa perdi zot zoli lans. E osi Mr Speaker, toultan mon mazin en ler nou ti *attend* en - nou ti *attend* en vizit ki ti fer *London*, kot la nou ti zwenn bann konferans *London* kot la nou ti kapab zwenn ek bann lezot pei ki ti la.

E en pei partikilye ki nou kapab zwenn laba ki osi tou dan Pasifik kot zot in, sa Speaker laba ki'n enform nou ki kot i reste parey toultan mon dir, se ki tanzantan son lakaz i baliz avek lakot. Tanzantan i war kot sa nivo delo sale i pe monte. E sa i vreman fer ou efreye aköz i menm dir nou si zot pei i

vreman pov, kot zot pa pe depan lo okenn fason pou zot kapab ganny en Bidze, ki antre zot, zot sey debourye zot menm zot.

Me selman Mr Speaker en keksoz ankor ki ti port a mon latansyon, se ki pou annan en serten moman letan kot zot menm zot, zot pou bezwen war zot pe al pran refiz dan en lot pei. E nou swete ki sa pa arive.

E osi ler ou pe koz lo sipor pou Gouvernman ler i al *attend COP27*. Se ki nou bezwen mazin en avek sanzman klima 28 *sorry* - sanzman klima ki pe annan nou'n war poudir, zis parey la nou pe gete, nou ti pe antre dan en moman lasesres kot menm *PUC* li menm li, i ti pe komans anvoy lanons pou bann dimoun pou zot rezerv delo pa gaspiy delo.

Nou'n war poudir letan in sanz en sel kou. Kot la nou pe antre en sel kou dan en letan lapli li menm li, kot sa osi i kapab anmennen par en lefe sanzman klima. E zis pa bokou letan pase, nou'n war kot mon distrik ti annan sa gran *flooding* li menm li. E sa i bann mon kapab dir bann i bann lefe ki demen i kapab al lezot landrwa ankor.

Me selman i annan en travay ki Lanvironnman pe fer, kot Lanvironnman pou retourn

ankor kot bann zabitan Ile Au Cerf. Kot la pou kapab enform zot lo bann desizyon ki'n kapab ganny pran lo kote lakot li menm li dan sa landrwa, kot zot pli ganny afekte. E anba sa fon ki bann Onorab in koz lo la avan mwan, kot la petet bann proze ki kapab ganny finanse. Sa osi i kapab ed sa bann pti zil ki form par dan mon distrik.

Mr Speaker, e nou, nou bezwen nou osi koman en pti leta zil toultan pe fer tande nou lavwa lo nivo enternasyonal. Akoz nou war poudir bann lefe atraver bann aksyon, ki zot sa bann gran pei zot pe pran, ki tousala aprezan i desann i kot nou anba. E nou, nou pe sey prezerv nou lanvironnman li menm li. Nou pe rod tou fason pou nou kapab fer sir ki nou reste, nou pe toultan pe tenir lo bann keksoz natirel.

Parey Gouvernman pe met bokou lanfaz an term servi lenerzi natirel, lezot ankor. E nou war plis langazman ladan. E nou, nou bezwen fer bann pli gran pei ankor konnen poudir, i annan bann pti leta zil la ki par zot aksyon ki pe ganny afekte.

E nou, nou donn nou sipor. Nou donn nou sipor sa Mosyon anmennen par Onorab William, akoz mon konnen poudir mon bann zabitan osi. E zot pou benefisyé anba sa, anba

sa fon ki nou pe demande. E nou pe demann ek Gouvernman pou met plis presyon ankor avek bann gran pei ki pli pwisan.

Pou zot pli vit posib si zot kapab finaliz sa dyalog. Kot la bann pti pei i kapab benefisyé anba la, dan en fason pou ede ki demen nou pa ganny plis afekte.

E i ava vin sa *awareness* osi tou, pou zot konnen. Akoz sa bann gran pei zot bezwen realize ki souvandfwa, zot vin fer vakans dan nou pei li menm li. Zot vwar ki mannyer i santan zoli. E ki mannyer nou pe sey prezerv nou zil li menm li. Nou bann lans pou fer sir poudir zot menm zot demen ler zot vin vakans zot ganny en keksoz ki zot kapab *relax* e detann zot.

E zot bezwen konnen poudir zot, zot bezwen ed nou dan sa lager. Donn nou koudmen pou nou prezerv sa labote ki Bondye in beni nou, ki'n donn nou. E kontinyen avek nou, pou ed nou pou nou bouz en pti pe pli devan.

Mr Speaker, mon pou donn mon sipor sa Mosyon, anmennen par Onorab William. Akoz mon war son benefis. E mon swete poudir avek letan Minister ki responsab pou lanvironnman, zot a kapab ganny en fason. E osi dan bann

dyalog anba sa fon, pou nou kapab *deal* avek bann, bann sityasyon. Ki nou bann pti leta zil pe pas atraver. Mersi.

MR SPEAKER

Mersi Onorab. Onorab Sandy Arissol.

HON SANDY ARISSOL

Mersi Mr Speaker. Bonn apre midi tou dimoun ankor enn fwa. Mr Speaker, mon anvi dir detrwa mo pou mwan montre sipor Onorab William. En dimoun ki annan latasman avek bann zafer lanvironnman. E la ozordi in anmenn en Mosyon. Swivan desizyon enportan COP27 ki konsern kreasyon en fon pou *loss and damage*, pou ed bann pei ki'n ganny afekte par sanzman klima.

Lasanble i demann Gouvernman, pou fer tou sa ki neser lo en plan rezyonal e enternasyonal pou ki sa desizyon i ganny realize, enplimante o pli vit posibil. Bout ki enteres mwan avek sa Mosyon Mr Speaker, "enplimante o pli vit posibil."

Letan nou tann sanzman klima, sanzman klima i annan en pe letan nou'n tann mansyonnen dan nou pei. E souvandfwa nou tann koz lo sanzman klima, nou tann sa

zafer delo monte. Par egzant letan lannen pase menm, delo monte landrwa ki nou tande souvan se Au Cap.

E la toultan mon ti tande poudir Turtle Bay, toultan ban dimoun ki reste la zot lakour ti ganny inonde parske delo monte.

Nou annan osi North East Point. North East Point kot Onorab Regina fek fini fer son ladres. North East Point i la devan vizavi kot avan ou zwenn lakour Mr Diran lot kote semen kot lanmar. Lannen pase zot a rapel kantite disab ti lo semen. E bann motoris enkli manm piblik ti ganny difikilte pou zot travers sa semen, parske nou ti annan delo monte.

Anse Gaulette Baie Lazare, souvandfwa Anse Gaulette e Anse Gaulette sa ki enteresan se ki kot moniman Lazare Picault i ete. Nou rapel ti annan en zoli deba laba. Parske aparaman Lazare Picault pa ti mont Baie Lazare, ti mont Anse Boileau. Me selman sa i en lot konversasyon pou en lot zour. En lot deba pou en lot zour.

Me selman nou ti ganny dir poudir i pa neserman korek kot i ete. Me selman son lank in ganny mete laba. E mon konnen ki Baie Lazare i en landrwa kot souvandfwa, sak fwa rad mare e bann dimoun ki

reste lo lakot. E bann motoris ek rezidan ki servi sa bout semen, zot ganny afekte.

Grand Anse Praslin. Nou rapel dan medya, dan Medya Nasyonal ti montre poudir Grand Anse Praslin ti annan lerozyon lo lakot. E menm *store STC* ti ganny balye par delo sale, e rann lapel parey nou dir dan kannal. So, letan nou pe koz sanzman klima nou pe koz delo monte.

Me i annan osi sa ki nou apel sofman lanmer. Kot nou ti war tou resaman dan nou pei, Beau Vallon lo lakot dan nor depi Bel Ombre, Beau Vallon, ti annan en loder ekstraordiner ki tou dimoun ti pase ti pe rode kwa.

E apre nou ti ganny vwar lo medya, poudir i annan en seri pwason ki ti'n mor e ki ti pe flote lo lakot. E si mon rapel byen, ti annan osi en moman letan kot Praslin osi ti annan sa.

Ler nou pe koz sofman lanmer, i annan osi pou fer avek blansisaz koray. Kot bann syantis al anba delo, ti montre nou ki kouler i ti ete la ki kouler in vini. Ki i pou fer si nou pwason pa pe manz sa, pe manz sa. I annan pou fer avek blansisaz koray.

Tousala mon'n tande letan nou pe koz sanzman klima.

Apre ti annan en seri kalite avek kantite gomom ki tonm lo lakot. E nou rapel Praslin ti annan en zoli leokri. Parske depi *Praslin Beach Hotel* an desandan depi Cote D'Or isi *Praslin Beach Hotel* an desandan *Paradise ziska La Reserve* ti annan en seri gomom ki ti tonm lo lans. E tou dimoun ti en pe enpresyonnen, medya ti vini, tou syantis ti vin gete. Tou zofisyè konsernen lanvironnman ti bezwen monte pou al rode, akoz?

Parske tousala ti annan pou fer avek sanzman klima, sofman lanmer. E tousala ti fer ki nou ti annan en seri kalite, kantite gomom ki ti pe tonm lo nou lakot. So, mon'n komans koumsa Mr Speaker parske pandan tou sa bann lannen, letan bann syantis bann dimoun *expert* ti pe koz lo sanzman klima. Kekfwa pa neserman ki nou tou, nou ti konsernen avek sanzman klima. Parske pa tou dimoun kekfwa ki annan lanvironnman a ker.

I annan dimoun ki lezot size ki pli apre avek, be sanzman klima ozordi in vin en topik konversasyon. E i vin en size ki bezwen enteres nou tou. Parske i konsern nou tou. Parske nou osi nou viv lo sa pti

leta zil ki apele Sesel, kot nou antoure avek lanmer.

E si mwan mon pa fer mon bout, mon le zis en pe dimoun fer son bout. Mon pa pe ede dan sa demars kont sanzman klima.

Ki mon pe dir par sa? I zis ki si mon osi mon ed erozyon. Par egzansp si mon al tir disab lo lans. Si ou koup bann vezetasyon kekfw ki ede avek sa degradasyon. Si nou menm nou kot nou reste dan rezyon pli o, nou pa prezerv nou larivyer nou zet tou kalite salte.

Nou zet nou *washing machine*, nou zet nou *deep*, nou zet tou kalite keksoz dan larivyer. Sa i ede ki i refoul dan lanmer ki osi kapab afekte nou koray, afekte pwason ki nou manze.

Nou kontan la tou resaman, letan nou pe koz afekte larivyer. Tou le swar i annan en seri *advert* ki pase, ki *PMC* i fer. Ki dir avek Lepep Seselwa, enkli mwan osi ki get televizyon, ki kalite keksoz ki nou pa devret zet dan twalet.

Ki kalite keksoz nou bezwen zet dan bin. Konmsi nou'n ariv 2023 dan nou pei, nou ankor pe edik nou pep ki manner pou viv dan en kominote. Ki manner i pou viv dan son flat e kwa ki i zet dan bin. E kwa ki ou met da twalet laba pou ou *flash* pou li al dan

sistenm, dan sistenm *sewage*. Nou ankor lo la 2023.

Be letan nou pe koz sanzman klima Mr Speaker, mon krwar i enportan. I en ledikasyon pou nou tou. An relasyon avek ki manner nou protez nou lakot. Ki manner nou protez nou pei. Be Mosyon li i oule ki o pli vit posibil, bann desizyon ki'n ganny pran dan bann letan bann gran pei endistriyalize, bann pei pli devlope, bann pei pli ris o monn, zot zwenn zisteman pou zot dir pou dir zot pou *pledge* en larzan pou ki bann pti pei leta zil parey Sesel, nou ganny asiste avek serten finansman pou ed nou dan sa demars. pou ki nou pa noye avek lanmer parske sanzman klima.

E si mon korek mon rapel mon ti pe koz ek en Manm Parlman Maldive, i ti dir ek mwan to ou tar Maldive zot pou bezwen komans tap laport enn de landrwa. Parske Maldive li, mon krwar son ka an relasyon avek lanmer monte, i pli pir ki Sesel. Kot zot pe sey negosye enn de lezot landrwa pou gete ki manner zot kapab bouze, pou zot re al etabli zot en lot landrwa.

Parske Assumption, mon krwar ti anba vye ladministrasyon Mr Speaker. Letan Onorab Wallace ti ankor

Minis sa letan. E zot ti negosye sa. E la mon krwar Assumption i pa lo latan pou le moman nou a gete pli tar.

Me selman mon krwar poudir bann pti leta zil parey Sesel, enkli Maldive ek lezot. Mon krwar i enportan pou bann gran pei endistriyalize parey nou pe dir. Pou ki zot onor zot bann komitman ki letan sa bann *meeting* i fer pou zot asiste. E se sa ki Mosyon Onorab William pe demande. E mwan mon pou siporte.

Parske souvandfwa zot ale zot fer bann gran deklarasyon. E nou bann pti pei par egzantp, nou kontinyen onor bann keksoz ki zot dir ek nou an relasyon bann Lalwa *tax* bann lezot keksoz ki atraver bann gran pei, zot etabli, pou ki nou swiv. E nou bann pti leta zil nou swiv.

Me mon krwar i enportan pou zot osi bann gran pei, e la nou pe demann avek gouvènmman sirtou Prezidan ek tou bann lezot Minis.

Par egzantp Minis Lanvironnman, letan zot al sa bann, sa bann lenvitasyon. Zot pran par sa bann desizyon an relasyon pou kontinyen met presyon, pou ki nou Sesel enkli lezot pei ki ganny afekte ek sanzman klima pou ki zot donn nou bann lasistans. Pou ki nou

kapab kontinyen par egzantp ed nou finansyerman pou nou kapab kontinyen ede.

Letan nou war poudir Baie Lazare in ganny en zoli *rock armouring*. Sa i fer ki son lakot pa degrade. Mon rapel Beau Vallon letan Beau Vallon la zisteman Onorab John in bezwen kit nou parske an preparasyon pou son *meeting* 5er ki pe fer dan son distrik. Mon rapel letan Beau Vallon ti apel sa en, toultan mon bliye ki mannyer pou li ti apele Beau Vallon an relasyon avek son miray ki'n fer *seawall*. Ok?

Zot ti pe fer en *seawall*. Ti annan en kantite leokri, bann biznes, bann endividi ti rode ki zot pe fer, pa tro konnen ki zot pe fer. Gouvènmman pa'n negosye ek zot. Zot pa ti oule, la pou defigir zot biznes. Ozordi, ler ou pas Beau Vallon, *ar* latan in ganny mete lo sanmenm sa *seawall*. Sez kabann lo kote, sez kabann *sur* atraver tou kalite keksoz in mete ozordi.

Me selman ti annan en leokri enorm. Akoz pe fer sa? Akoz pa devret pe fer sa la? Pa'n konsilte nou. E ozordi mon *happy* parske ti bann desizyon brav, direk ki Gouvènmman in pran. Zisteman pou protez lakot Beau Vallon e en lans ki plizyer dimoun i frekante. Menm bann

touris ki vin Sesel zot frekant sa. E mon *happy* avek sa.

E mon konnen poudir Bel Ombre kot Mary Geers i ete, i osi annan en travay ki pe fer an relasyon avek lanvironnman. E osi avek permisyon *Planning*, pou li kapab osi sey kre en *rock armouring* ki'n komanse. Zisteman pou ki lakot Marie Laure pa degrade an relasyon avek sanzman klima ki Mosyon pe koz lo la.

E mon krwar bann led Mr Speaker, i ava enportan pou ki parey Onorab Regina in mansyonnen pou ki i ava annan bann striktir ki ava ganny kree. Ki ava ganny konstri, zisteman pou protez en pe nou lakot. Sirtou bann lakot ki baliz avek lanmer ki ganny bokou afekte. Depandan mannyer mare i ete e osi depandan ki mannyer klima i ete.

E mon kontan, parske sanzman klima i en keksoz ki nou pa kapab kontrole. Nou koman en pti pei leta zil, nou pa pou kapab kontrol li. Me selman sa ki enportan se ki bann gran pei endistralize, se zot menm zot ki annan plis *factory*. Zot menm zot ki annan plis lendistri.

E se lontan letan nou ti lekol, nou ti tann koz *ozone*. *Ozone layer* pe ganny afekte. Son trou pe agrandi, alor nou

ganny plis larder soley ozordi ki pa bon pou lapo, ki pa bon pou nou bann plant. I pa bon pou nou bann zannimo. Tousala nou ti ganny dir lekol.

Me nou ti ankor pe asimile dousman, dousman ki si sa, sa *ozone layer*. Ki sa ki sanzman klima i fer, akoz ki i fer. Me anmezir sityasyon i agrave, nou viv avek sa toulezour. E lo medya sosyal, e menm atraver nou radyo e televizyon kot sa bann lenformasyon i kontinyen partaz avek nou. Mon krwar ozordi i enportan.

E se pou sa rezon ki mon pou siport ou Mosyon Onorab William, parske mon santi poudir wi, Gouvernman i bezwen kontinyen tap sa laport. Gouvernman i bezwen kontinyen bezwen met presyon pou ki nou ganny, pou ki sa bann *pledge* ki'n ganny fer la, i ganny realize parey Mosyon pe demande. E enplimante o pli vit posib.

E mon krwar sa i en bon Mosyon. E nou koman en pti pei nou bezwen sa bann kalite sipor. Nou bezwen sa bann kalite sipor, parski nou bezwen protez nou lakot. Parey zot konnen poudir Sesel nou lans ozordi i en keksoz ki nou bann touris i kontan.

E menm nou bann Seselwa, parske dan *weekend*

ou war kantite Seselwa lo bann bout lans partou. Sakenn in etabli li. Sakenn in enstal li parske ozordi lafason ki dimoun i viv zot santi poudir, lo nou bann lans i meyer fason pou zot kapab detann an fanmir, dan lape. Pou zot kapab *enjoy* zot *weekend* avan retourn travay son lendi.

So, Mr Speaker, mwan mon pou donn mon distrik ki baliz avek lakot. Parey zot konnen Bel Ombre, nou osi nou baliz ek lakot. Nou osi nou baliz avek lanmer. Mon pou donn sipor, parske mon santi poudir si i annan en keksoz ki pei i benefisyé, pep osi i benefisyé. E nou tou nou pou *happy* avek sa.

Alor Mr Speaker mon pou montre sipor pou Mosyon Onorab William, e mon pou demande ki letan nou pe koz lo sa Mosyon, ki Gouvernman i ava kapab tap laport pli for, pou ki sa bann demann i a ganny enplimante. E i ava vin o pli vit posib pou ki distrik Bel ombre, Au Cap Baie Lazare, North East Point, Grand Anse Praslin e lezot landrwa lo lakot Sesel, ki ganny afekte ek sanzman klima, nou a kapab rode ki fason ansanm koman en pei.

Pou nou kapab travay pou asire ki nou pei i bouz pli devan. E nou ganny lasistans nesaser, pou ki nou viv nou zanfani i

kontinyen *enjoy* nou Sesel pou plizyer lezot lannen.

Plizyer lezot lannen avenir, menm letan nou'n ale nou pa kit zot dan en leta ki pa konvenab. Me nou ganny en leta apropiye parey nou, nou gran paran in kit avek nou. Me parey nou dir pou ki nou zanfani i, i benefisyé Mr Speaker.

Avek sa detrwa mo mon krwar poudir Mosyon i senp. E mwan mon pou montre tou sipor parske parey mon'n dir okenn keksoz ki annan pou fer avek pei i osi benefisyé zabitan Bel Ombre. E osi benefisyé Lepep Seselwa. E mwan mon pou siporte Mr Speaker. Mersi bokou pou sa pti letan.

MR SPEAKER

Mersi Onorab. Laparol pou Onorab Francois Adelaide.

HON FRANCOIS ADELAIDE

Mersi Mr Speaker. Bonn apre midi Mr Speaker. Bonn apre midi tou *MNA* e tou dimoun ki a lekout.

Mr Speaker, dabor koman *MNA* Baie Lazare mon le fer sir tou keksoz ki annan pou *highjack* nou lidantite mon bezwen defann. E parey Onorab Arissol in dir ki Lazare Picault pa ti desann Baie Lazare, pa ti debark Baie Lazare. Mon pe dir li non. O kontré si i annan

okenn *Loss and Damage Fund* ki pe sorti dan fon Lazare Picault, se Baie Lazare ki pou benefisye, akoz i ti debark kot nou. E si petet, mwan mon konnen Anse Boileau zot ti bwar delo laba. Me selman zot ti debark Baie Lazare. E sa ki anvi defann nou kapab mont en *case* pli tar.

Me ozordi Mr Speaker, sa Mosyon ki Onorab William i anmennen mon krwar i en Mosyon ki annan son merit. E parey Onorab Arissol in dir, vre Baie Lazare osi i en distrik ki in ganny afekte. E mon krwar depi dan mon premye manda, ler mon ti annan en proze *rock armouring* Anse La Mouche, kot dan Lasanble menm mon ti defann. Mon ti dir nou pa pou fer sa landrwa vin Ros la Mouche. O kontrer nou pou prezerv son lans.

E bann parol ti byen ganny ekoute parey tou kou mon dir, kantmenm sak fwa mon koze zot pran en bout mon parol zot fer politik avek.

Me mwan kot i annan merit mon dir, me kot i annan lespas pou aranze mon pou kontinyen dir. E wi, ozordi nou vwar poudir Anse La Mouche bokou bann *picnickers*, i ankor pe vini pe *enjoy* sa lans. E la si ou pase la, 4 zour pase mon'n pase mon'n gete manman en

zoli lans. E mon krwar i bann keksoz ki nou fer, anmezir nou pe konbat sanzman klima.

Me i enportan osi nou konnen ki bann metod ki nou servi, pou ki nou kapab sey, sey protez en pe nou bann lakot. E ki nou bann dimoun i *enjoy* bann landrwa.

Mr Speaker, sanzman klima wi. Nou tou nou koze nou dir i annan bokou lopinyon ki pe dir, eski se vreman sanzman klima ki pe fer tou sa bann keksoz? Ouswa se evolisyon?

Akoz lontan nou'n tande poudir, pa mwan ki dir dan listwar ti annan dinozor. Ti annan bann lezot keksoz. Apre tousala in ale, imen in vini. Eski apre imen, petet eski lemn pa pe transform son lekor, pou ki i annan en lot keksoz pou vin ranplas nou ler nou ale. E sa, mon pa en syantis Mr Speaker.

E sa i bann pwennvi aköz mon dan Lasanble Nasyonal. Mon reprezant parol, lavwa enn de bann dimoun ki met zot konsern. E mwan mon sey fer sir pou mwan adres tou pti bout, pou ki nou kapab *at least* konpran kanmarad.

Mr Speaker, wi nou'n ganny parey Onorab in dir, Onorab Arissol. Dernyen *testimony* ki nou kapab dir Baie Lazare, sirtou lo kote Anse Gaulette. Mr Speaker vre nou

tou nou ti pe. Akoz nou ti pou napa sa semen ki pou al lot kote dan Takamaka pou fer par Anse Royale.

Akoz vreman bann semen, lans, vezetasyon avek petet bann lenfrastruktir, ti pou fini ganny al dan delo si ti napa sa lentervansyon, ki dabor mon bezwen remersi tou bann lazans, tou bann Minister ki'n kapab ed nou pou nou kapab fer sa proze. Mon konnen nou pe al lo 2enm faz la ki pou al fini en pti pe pli lwen.

E esperon ki sa osi i ava en lot mannev pou nou kontinyen protez nou teritwar Baie Lazare. E ki malgre sanzman klima nou dir, parey mon dir i annan dimoun ki dir wi, sanzman klima. I annan dimoun ki dir evolisyon - pou ki menm sa bann prosesis pe arive, me nou, nou kapab kontinyen protez lavi. Protez sitwayen avek zot bann lenvestisman.

Mr Speaker i enportan pou nou dir, ki wi kantite larzan ki pou donner pou nou kapab fer sa bann devlopman, sa bann proteksyon. Byensir ki kantite larzan ou kapab mete, lanatir tou kou i pas par lao tou. E lanatir ki deside ki mannyer i pou tret nou. E nou, nou bezwen la sey fer nou mye pou nou kapab viv ant avek lanatir.

Pou ki mwens destriksyon i kapab ganny fer.

E pou ki nou pa ede nou menm anmenn bann lefe advers. Menm ki petet lanatir parey mon dir li ki konn son bann kour. E ki mannyer zot fer sa bann keksoz. Me nou, nou pa devret ganny trouve koman bann kontribiter ki pe agrav sa bann sityasyon.

Wi, Mr Speaker i normal e enportan parey Onorab William in dir, ki tou bann *leaders*, sirtou bann *leaders* ki dan bann pti leta zil i koz menm lavwa Mr Speaker, i enportan.

Me selman nou menm nou konnen, nou bann diferan groupman dan Lafrik. Nou menm nou trouve ki mannyer bann *leaders* dan sa kontinan zot annan bann diferan azanda. E petet si zot vwar zot benefisyen en pe plis ki ou, zot kapab par ler sanz lide.

E si keksoz i vin koumsa, sa pou fer ki nou bann demann i pou vin pli *weak*. E petet la ki nou ava war ki petet bann gran pouvwar, petet i tant pe zwen en pe avek nou.

E sa, ki nou kapab dir avek bann *leaders*, se ki annou koz en sel lavwa. Annou tonm dakor poudir vre i annan en pe destriksyon ki pe arive. Nou pou bezwen en pe lasistans, me selman annou pa get nou lekor

an premye; annou get nou kontinan. Annou get nou bann zil. E nou ava ganny sa pli bon kouraz. Sa pli bon kouraz pou nou kapab koz dan en sel lavwa pou kapab rod en pe sipor.

Mr Speaker, mon'n tann dir poudir Sesel li i pa kontribye dan destriksyon. Me mwan mon annan en pti konsern Mr Speaker. Me petet mon kapab byen ouswa mon kapab mal. Ler nou'n gete nou'n fer bokou konblaz Sesel. Eski sa osi i pa'n ede pou petet detri en pti gin ekolozis?

Eski sa osi i pa'n ede pou tir disab en landrwa? Wi, nou pe fer konstriksyon, nou bezwen en landrwa. Eski sa osi petet nou, nou pa pe ede en pti gin pou fer en pe destriksyon lakot? Akoz mwan mon kontan en fer bann pti leksperyans.

Mon al lo lans mon gete ki mannyer delo sale i travay. Mannyer disab i ale vini. E mon panse si sa disab ti dan delo sale, nou'n tir li nou'n met li anler. Posibleman lanatir osi pe repran son bann keksoz.

So, mon pa eksper parey mon pe dir. Me selman sa osi mon krwar nou bezwen kalkile. E byensir nou pa pe fer bann gran, gran destriksyon. Me selman i enportan ki sak pti keksoz ki nou fer, nou fer sir nou mazine ki son konsekans.

Mr Speaker, mon pa konnen si vre. Mon'n tande poudir Sesel ti annan en letan ti pe vann disab, avek bann pei deor. Eski sa osi petet pa'n ede osi pou destabiliz en pe nou lakot? Ou konpran? Mwan mon pe sey rod tou bann pti keksoz ki nou, nou kapab fer. Mon konnen poudir bann pei eksteryer, zot fer petet bann lendistri ki kre bokou bann domaz avek petet parey nou'n dir latmosfer, *ozone whatsoever*.

Me selman nou osi nou bezwen fer sir ki nou veye tou sa ki nou fer. Akoz mon krwar lasarite i komans dan lakour. Wi, i enportan ki nou bann Sef Deta, annefe pa zis Sef Deta; me osi koman bann Manm Lasanble nou osi nou al bann *forum* dan bann pei deor. I enportan pou nou osi *align* nou bann konversasyon, nou bann largiman pou ki nou koz menm langaz. E ki nou pa ganny zwe, zwe ant kanmarad. E ki bann lezot gro pwisans i benefisye.

Mr Speaker, mon krwar parey mon'n dir Sesel pou le moman i en sanpyon lanvironnman. E mon swete ki sa pti parol ki mon'n dir, i pa pou petet montre poudir mon pe dir napa sanzman klima *whatsoever*. Me sa i bann pwen ki bann dimoun in *echo*.

E mwan mon'n fer sir ki mon'n vini mon'n met devan. Me selman an tou gran liny, mon apresye sa Mosyon ki Onorab William in met devan. E mon pou siport ou. E fer sir ki Sesel i ganny *the best deal*. E nou, nou pe ede nou pe protez bokou lanvironnman.

E menm nou pe bezwen priv nou bann dimoun pou pa ganny en lozman, ouswa pa ganny en bout later pou fer sir ki nou, nou protez e nou prezerv lanvironnman.

E mon krwar si nou devret annan en pti rekonpans, mon krwar Sesel i devret kapab gannyen li osi. E pou fini Mr Speaker, zis parey mon ti komanse lo kote lanvironnman bannla osi pe dir ki Bel Ombre osi fodre *MNA* i get en kou. Akoz zot mazine poudir sa lakrwa pa Bel Ombre. E Onorab fodre fer sir li osi i ede li osi dan sa proteksyon lanvironnman.

Si lakrwa pa Bel Ombre, mon tande i la Reunion. Annou al La Reunion nou a sey gete. E pou ki bann lans Bel Ombre i ava reste trankil. Mersi Mr Speaker.

MR SPEAKER

Mersi Onorab. Mon a donn laparol Onorab Wavel Woodcock.

HON WAVEL WOODCOCK

Mersi Mr Speaker. Mr Speaker mon pa kapab les sa Mosyon pase, san Mosyon Onorab William pase san dir 2 pti mo lo la. Par lefe ki Mosyon pe met lanfaz lo desizyon *COP27*, pou kreasyon en *Loss and Damage Fund*, ki pou ede, annefe pou ed bann pei ki'n ganny afekte avek sanzman klima. Sirtou bann pei Lafrik e bann pti leta zil, parey nou menm Sesel.

Ki pou ed nou pou nou sey trouv solisyon. E rod bann remedye ouswa fason pou nou *manage*, sirtou parey nou zil enkli Praslin in ganny bokou afekte par sanzman klima. Sirtou avek parey Onorab Arissol in koz en pe lo la. Bann problem lerozyon sirtou ki afekte bokou nou zil Praslin, Grand Anse e Baie Ste Anne. Mon pa konnen kantite fwa dan Lasanble mon'n anmenn kestryon lo sa size.

Sirtou parey mon'n mansyonnen lo lerozyon lakot. Annefe semenn pase mon fek anmenn en kestryon lo size lerozyon lo lakot Amitie, Ros Korbizo ki nou ankor pe rod en solisyon.

E sa fon, ler i ganny etabli definitivman i pou ed nou bann pti leta zil. Pou nou ganny en pe solisyon ouswa annan sa finansman pou nou a dres en pe

sa bann dega ki sirtou lerozyon pe koze.

E non selman Mosyon pe demann pe adres - pe met lanfaz lo sa fon. Me i osi pe demann Gouvernman osi pou zwe en rol. Akoz parey loter Mosyon in dir i annan en pe retar dan kreasyon sa fon. E Mosyon pe demann Gouvernman osi pou zwe en rol enportan. E mon prezimen pa zis Gouvernman. Lasanble osi nou kapab zwe en rol. Par lefe ki plizyer nou form parti plizyer bann lorganizasyon enternasyonal.

I annan nou ki lo SADC, i annan nou ki lo IPU, i annan nou ki lo Parlman Lafrik. Kot nou kapab zwe en rol pou nou pouse, e met en pe presyon ki vremen sa fon ki'n ganny promet, dan COP27 i vin en realite. I realize e ganny enplimante kot nou kapab benefisy e sa bann fon, pou nou fer bann proze neserer pou nou *deal* avek sa bann *issue*.

I pa sa problem lerozyon lakot, me i annan bann lezot *issue* ankor parey Onorab Arissol in koz lo blansisaz bann koray. bann koray ki pe mor dan lanmer sirtou akoz *global warming*, lesosman later.

E zisteman, dan *Pan-African Parliament in May*, an Me zisteman fek annan en *High*

Level Climate Change Summit ki mon ti form parti ladan. Mon ti dan sa konferans e ki nou Speaker ti Prezidan Ruto, Prezidan Kenya ki ti adres sa *submit*. E osi prezan ti Onorab Mondon, Onorab Lemiel, Onorab Gabriel e Onorab Desheila Bastienne, kot nou'n partisipe.

E osi annan en Komite Parlman Lafrik osi ki *deal* zisteman avek sa bann size sanzman klima *and so on*. E dan sa *summit*, bann pei Lafrik ti ganny demande pou *enhance* zot Bidze, pou konmsi annan en pli gro Bidze nasyonal pou adres problem sanzman klima. E osi met lanfaz, lo sa ki nou apel *Adaptation Financing*.

Me Mr Speaker, menm si sa *request* sa demann in ganny fer dan parlman Lafrik. Me selman pei Lafrik lo li menm, bann pei Lafrik bann pti leta zil, nou kontribye mwens dan *climate change*. Annefe nou kontribye mwens dan emisyon bann *gas* danzere. Ler nou pe koz bann *gas* danzere, mon pe koz lo *carbon monoxide*, *nitrogen oxide*, *methane* e bann lezot *gas* danzere ki afekte, ki afekte nou *ozone layer*.

Ki zwe en rol dan lesosman later. I bann *gas* ki parey mon'n dir i annan bann lefe advers osi lo lasante, lasante imen. E

Sesel koman en pti zil ek popilasyon anviron 100 ekek mil dimoun, nou pa kontribye preski naryen dan sanzman klima lo bann emisyon sa bann *gas* danzere.

E parey mon'n dir pei Lafrik pousantaz i montre poudir bann pei lafrik i kontribye minim konpare avek bann lezot pei Azyatik e osi Lerop zot emit bann *gas* danzere.

E alor dan sa, se i plizoumwenn responsabilite sirtou sa bann gro pei. Sa bann *world powers* pou zot zwe en rol, osi ede pou *mitigate* sa kriz sa sityasyon ki pe fer fas avek. E osi fer serten kontribisyon anver bann pti pei, sirtou leta zil bann pei Lafrik ki ganny afekte avek sanzman klima.

E COP27 zis pou detaye i en *ever united National Climate Change Conference*. Ler zot ti pran sa desizyon pou kre sa fon, ti en bon desizyon. Tou dimoun ti aklanmen, nou tou nou dakor poudir i en bon desizyon.

Me i malere Mr Speaker, ki ziska prezan i pa ankor ganny enplimante. I pa ankor materyalize. e nou bezwen sa fon. Nou bezwen sa larzan i pou ed nou. E mon bezwen dir Mr Speaker ki sanzman klima i annan bokou konsekans

negativ. E i anmenn plizyer risk pou bann pti pei pou Sesel osi.

E parey mon'n dir mon'n koz lo lenpak ki resofman later i annan, menm lo nou lavi maritim ozordi. Lo lenpak lo bann koray ki afekte bann *marine life*. I annan lanmer ki pe kontinyen monte. Sirtou akoz lesofman later.

I annan *the melting of a solar ice cap* ki tousala, i fer ki nou annan sa *rise in sea level* ki definitivman pe afekte bann lakot, bann pti leta zil parey Maldive ki bokou bann zil pe koule.

E nou parey nou'n remarke poudir nou lakot pe retresi. Akoz nou lakot pe ganny manze. E sa i evidan, si ou pou get Amitie Praslin, Anse Kerlan, La Pointe Saint Sauveur, Consolation e Cor D'Or osi lot kote zil pe ganny afekte. Menm dan Anse La Blage osi ou war lenpak ki i annan. Lenpak lerozyon lo lakot.

E Sesel lo nou menm nou'n pran serten desizyon, nou annan serten diskisyon. I annan *Coastal Management Plan* ki ti ganny prepare. Annefe in vin devan sa Lasanble. Mon rapel dan 6enm Lasanble nou ti diskite lo sa *Coastal Management Plan*.

E i annan serten travay ki pe ganny fer lo la. E nou tou nou konnen poudir pou *manage* lakot, i pa en keksoz ki pou kout en pti sonm larzan. Akoz i kout en kantite larzan. E i malere Mr Speaker, i annan serten travay pou remedye pou sey bann proze pou sey ede avek lenpak laroul, lenpak lanmer lo nou lakot.

Me i malere Mr Speaker, i annan bokou bann proze ki'n Gouvernman presedan in sey enplimante. Me petet lafason ki zot in fer li, i pa'n fer li lo sa nivo lo sa standar ki ti merit ganny fer.

Parey en konparezon, i annan sa *rock armouring* kot site Amitie vizavi *airport* ki ozordi nou tou nou war poudir sa *rock armouring* pe ale. Akoz lafason ki in ganny fer i pa'n ganny fer dan en fason ki byen. E la Gouvernman pe bezwen pran en desizyon pou refer sa *rock armouring* ouswa rod en lot solisyon.

Me sa ki'n ganny propoze se pou *extend*, fer sa *rock armouring* en pti pe pli deor. Sey anmenn li antye lo lakot Ros Korbizo, akoz definitivman pye sed pe tonbe, pye dibwa pe tonbe, semen pe ganny afekte.

I a 2 repriz dan lepase. 2 repriz annefe dan sa bann

landrwa in annan 2 fwa ki semen in degrengole.

E ozordi i annan plizyer bann propozisyon. Annefe pou *deal* avek sityasyon lerozyon lakot dan nou pei. Lo Cote D'Or mon konnen ti annan propozisyon pou fer *breakwater*, *tetrapods*, met bann *tetrapods* pou kas lafors laroul.

E lo kote Praslin osi, lo kote Grand Anse osi ti annan serten propozisyon pou fer sa. I annan plizyer aksyon ki'n menm bann dimoun dan prive in sey antreprann. Lo kote Anse Kerlan i annan bann *businessmen*, bann dimoun ki'n vin ansanm parey Anse Kerlan Avangard kot zot in fer gronny. E sa in ed en pe avek sa lenpak. E laroul lo lakot.

E parey mon dir tou sa bann keksoz i pa kout en pti sou. E definitivman sa larzan i pou ede akoz la ziska prezan, Gouvernman ankor pe rod en fason pou ganny larzan pou finans sa bann proze.

E nou ti tande osi ki Prezidan ti fer en deklarasyon. E Minis fek reponn kestyon semenn pase lo parey mon'n koz lo la. Lerozyon lakot Amitie, Ros Korbizo kot i annan propozisyon kot nou kapab ganny sa finansman atraver

parey *Travizory* ki pou *partially fund* sa proze.

Me selman *the onus* pa met zis lo nou. Akoz pa nou ki vremen loter sa sityasyon ki pe arive. I annan bann pei ki pli gran, pli gro ki nou ki se zot i *the main contributor towards climate change*.

E nou santi ki vremen sa fon i a en fason pou ede; pou nou ganny sa bann finansman pou nou kapab fer sa bann proze; ki nou pa war bann lensidan parey Onorab Arissol in koz lo la kot en *warehouse* antye i *end up* dan lanmer.

E nou vremen bezwen finansman pou nou fer sa bann proze pou protez nou bann lakot, pa zis lo Praslin me Mahe e La Digue osi, e osi lo bann lezot zil.

E Mosyon osi in koz lo lenportans pou nou Gouvernman enterakte avek bann lezot pei, pou donn nou sa sipor pou nou vin as al koman en blok. Annefe i annan bann diferan groupman ki *deal* avek sanzman klima.

O nivo Lafrik nou annan nou *AISCC*. E pou bann leta zil i annan groupman *AOSIS*, bann groupman bann pti leta zil ki nou kapab vin ansanm parey mon'n dir koman en blok. Nou sey met presyon sirtou lo sa bann gro pwisans. Sa bann gro

pei akoz nou tou nou konnen ler zot en pti pe zot kapab en pti pe dominer.

Alor i enportan ki nou tou nou vin ansanm koman en blok. Non selman bann pti leta zil. Me osi ansanm avek bann pei Lafrik. Akoz deza bann pei Lafrik in realize poudir lenportans pou nou vin ansanm.

Olye ki sakenn pe redi son kote, sakenn pe sey fer pou li. Ler nou vin ansanm nou ganny plis lafors pou nou kapab met presyon, pou nou ganny sa *funding*. Pou nou ganny sa *Loss and Damage Fund* i ganny kree. E ki nou ganny sa finansman pou nou adres e *deal* en pe avek sa size *climate change*. E son lenpak lo nou pei.

Avek sa 2 mo Mr Speaker mon pou siport sa Mosyon anmennen par Onorab Waven William. Akoz mon santi ki i en Mosyon ki annan merit. Avek sa 2 mo mon dir ou mersi Mr Speaker.

MR SPEAKER

Mersi Onorab. Onorab Bernard Georges.

HON BERNARD GEORGES

Mersi Mr Speaker. Bonn apre midi Mr Speaker. Bonn apre midi tou bann Manm Onorab. E tou dimoun ki pe swiv nou. Mr

Speaker. Si i annan en keksoz lo lekel nou devret ini koman en pep, e ini koman en Lasanble, mon krwar se sa size lanvironnman ki devan nou la apre midi.

Mon regrete ki lot kote latab pa pe pran laparol. Sirtou ki – Sirtou ki bokou sa ki'n arive pou protez nou lanvironnman, in ariv anba bann ladministrasyon ler zot, zot ti o pouvwar.

E nou ti a krwar ki zot ti ava ralye ansanm avek sa enn administrasyon ki pe fer bokou pou met sa bann size devan, pou ede siporte, e donn en pe lankourazman avek Onorab Waven William ozordi lo sa Mosyon.

Me, Mr Speaker, kantmenm nou bezwen fer li nou tousel, nou ava fer li nou tousel. Akoz nou lo sa kote latab nou konsyan kisisa ki devan nou, e ki manner ki nou devret antreprann en travay kolektif dan nou rezyon ek lo lasenn enternasyonal, pou en size ki anglob lemonn antye.

E ki pou afekte tou bann pei ki annan en lakot – kot, avek sanzman klima ek avek bann sirfas delo ki tanperatir pe monte. E, ki son nivo delo li menm li i pe monte, pou ganny afekte a en serten moman.

Mon pa pou kasyet deryer lefet ki Onorab Deputy Speaker, Onorab Gervais Henrie ek mwan, nou 2 distrik i a labri akoz nou, nou napa en lakot. Annefe, avan ki delo monte i arive Les Mamelles, i bezwen koul *Eden Island*. I bezwen koul Roche Caiman. E apre ki i pou ariv kot nou.

Me sa se pa en leskiz. Akoz *at the end of the day*, nou tou nou pasaze lo sa *planet* lemonn. E nou tou nou bezwen fer sa ki nou devret kapab fer pou anpese ki sa zour tris i arive.

Ler mon'n dir sa, Mr Speaker, nou bezwen osi met nou pei dan konteks. Annefe, ler nou ti lekol nou ti aprann ki ti annan 2 kalite zil dan nou teritwar. I annan zil granitik parey sa enn lo lekel nou pe asize la ozordi. Ek bann zil koralyenn. Be annefe, nou aprann anmezir ki nou al en pe pli lwen, ki i annan 2 lespes zil koralyenn.

I annan bann ki nou apel bann *sand keys* ki'n baze zis lo disab. Parey *Bird Island*, *Ile Denis*, *Platte*. Bann zil dan *Amirante*. *Coëtivy*, eksetera. Epi, i annan bann zil ki dan nou sid wes - sid was. Par egzanp; *Farquhar*, *Assumption*. *Aldabra*. *Astove*. *Cosmoledo*, eksetera. Ki bann *atoll* ki sa ki nou apel bann *raised atoll*.

Donk, si nou per, parey nou ti per a en lepok ki avek sanzman klima ek delo ki monte, zil pli lwen avek Mahe ti pou *Île Denis*. Annefe sa pa pou ariv o tan souvan. Nou pou perdi bann zil, bann *coral keys*, me nou pa pou perdi bann *raised atoll* an menm tan. Nou pou perdi zot en pe pli tar.

Donk, sa katastrof ki pou arive, pou ariv dan 2 faz kot nou. Me sa katastrof Mr Speaker, pou arive! Tou dimoun in dakor. Dernyen COP pa'n kapab arive metriz sa 1.5 degre. Zot in koze. Zot in fer letour, en pti pe parey nou, nou pe fer apre midi la. Koze i fasil pou koze lo sa size. Me *at the end of the day*, sa ki sa Mosyon pe demande, e sa ki nou Prezidan...

E la mon bezwen dir; Prezidan Ramkalawan, Mr Speaker, i en sanpyon lanvironnman!

(APPLAUSE)

HON BERNARD GEORGES

E si - e si bann ladministrasyon oparavan in fer en pe travay, Onorab Prezidan Ramkalawan in pran paviyon Sesel, e in lev li pli o, e in fer sir ki Sesel in koz non selman pou Sesel, me pou bokou lezot pei. E i pe ganny tande.

E si nou vwar ozordi ki pozisyon Sesel, e pozisyon ki bokou lezot pei ki trouv zot lekor dan menm sityasyon - Maldive dan Pasifik, eksetera, pe swiv - se gras a sa *challenge*, e gras a sa travay ki Prezidan Ramkalawan pe fer lo sa nivo.

Alor Mr Speaker, kantmenm nou bezwen rekonnet travay ki'n ganny fer avan, nou bezwen osi rekonnet travay ekstraordiner e spesyal ki pe ganny fer la ozordi. E mon-mon mazine Mr Speaker ki sa sityasyon sanzman klima ki a labaz sa Mosyon ozordi, i en keksoz ki'n *around* pou en pe letan li. Me selman nou vwar li pe akselere.

I annan bann map Sesel ki dat dan lepok ler pirat *Levasseur* ti pe - ti pe kasyet son lakrwa Bel Ombre ek *Lazare Picault*, ti pe zet lank, swa Baie Lazare, swa Anse Boileau; sa Onorab Adelaide avek Onorab Phillip Arissol a lager sa lager zot menm - ler sa ti arive, ti annan detrwa zil Sesel lo nou *map*.

Lanonsyasyon ek *San Francisco* ki lo tou sa bann *map*, ki ozordi zot in disparet e zot zis bann ban kot dimoun i al lapas lo Defonse. Lo *border* avan Defonse. Donk nou ti annan zil ki'n disparet.

E la nou pe – nou annan zil ki anvwa disparisyon. Par egzanz Ban Afriken ki in ganny menase, e dan lagon *Alphonse*, Sa pti zil *Bijoutier* ki ti en zoli pti zil, in preski disparet. Donk, nou vwar Mr Speaker, ki i annan definitivman bann keksoz ki pe arive dan nou teritwar.

Mon dir sa, be mon bezwen – Akoz nou bezwen dan tou transparans eksplik tou keksoz. Mon dir sa akoz, malgre ki dan lagon *Farquhar* i annan en zil ki li pa ti la avan, e ki depi siklonn *Fantala* in fini arive. E i fer douzyenm zil dan *Atoll Farquhar*. Ti annan 11 avan, la prezan i annan 12. Akoz sa enn ki'n ganny apele *Derrick Island* i pe ganny vezetasyon lo li. E donk, donk set en pti zil ki fek aparet.

Me lo nivo mondyal, lo lesel mondyal kantmenm, nou annan serten zil ki nou pe gannyen. E tou bann zil ki'n ganny *reclaimed* isi o bor Mahe, avek Praslin, se bann zil ki nou'n gannyen, i annan osi zil ki nou pe perdi. E nou bezwen rekonnet ki lapert nou bann zil pou kontinyen.

Alor, Mr Speaker, kote nou – ki pozisyon ki nou pran ozordi? Nou en pei vilnerab. Sa nou tou nou konnen. E in ganny eksplike bokou fwa apre

midi. Nou napa le mwayen pou nou, nou tousel kapab anpes sa kalamite ki pou arive *sooner or later*.

Nou pa kapab– nou pa kapab asize e dir; Les Mamelles avek Mont Buxton nou *ok*. Tel parey nou pa kapab asize e dir; Sesel nou *ok*, akoz kantmenm nou perdi nou bann zil elwannyen, nou *still* annan nou bann zil granitik. E donk, nou, nou pa pou annan en problem. Bann zil dan Pasifik laba, les zot debourye, Maldive si i disparet, *well too bad*.

Nou pa kapab fer sa Mr Speaker, akoz nou dan en lemonn ki enterkonekte. E sa enter koneksyon se sa ki anmenn sa *meeting COP* Anyel, akoz bann pei lemonn in realize ki se pa en konversasyon ki nou bezwen annan enn fwa letan, be set en konversasyon ki nou bezwen annan tou le-z-an. Akoz problem i grav.

E malgre ki nou pa kapab dan en *COP*, *attend* tou bann lobzektif, tou dimoun i konnen ki a en serten moman dan en lot *COP* – kekfwa sa enn ki pe vini sa lannen, kekfwa sa enn pou vini lannen prosenn. Nou pou *attend* lobzektif ki nou bezwen *attend*.

E antretan i pou annan bann mezir ki ganny met an plas. Tel parey; sa *loss and*

damage - Sa lanvlop *loss and damage* ki nou ava rapel, i pa en lanvlop larzan li. Sa ti lepase kot bann pei vilnerab ti al kot bann pei pli ris e ti dir; ti montre ledwa e dir zot problem, “ozordi si nou, nou pe disparet se akoz zot problem. Alor zot bezwen donn nou en sibvansyon monneter.”

I nepli koumsa. Akoz in *any event* parey nou konnen, bann pei ris i deside pou met en lanvlop larzan an plas, epi zot pa fer naryen. Tel parey; Onorab Prezidan Ramkalawan i rapel nou.

Alor, sa ki'n arive la, se ki sa – lepase kot tou keksoz ti an term larzan, i ganny sanze. E prezan *focus* i lo en *loss and damage structure*, kot sa ki pou arive – se ki akoz nou konnen ki sa ki pe arive i inevitab. Me sa ki pe arive i kapab ganny anpese.

Parey nou dir. Bann *mitigator, mitigating factors*. Nou kapab *mitigate*. Nou kapab anpese. Nou met *rock armouring* e nou re ganny nou teritwar. Nou konble, nou reganny nou teritwar.

Donk, sa ki'n ganny met an plas avek sa *loss and damage structure* se ki bann pei ki annan larzan, olye donn larzan bann pei ki napa, zot pou donn sipor teknik. Zot pou

anvoy *expert*. Zot lanvlop i bokou pli larz dan en fason ki nou ava kapab *mitigate* lefe sanzman klima. E nou a kapab *mitigate* sa *loss and damage* avek en pti *L* ek en pti *D*, ki nou ti pou servi si nou ti napa san lanvlop *loss and damage* avek en *capital L* ek en *capital D* pou ed nou.

Donk, Mr Speaker, sa Mosyon Onorab William apre midi, i ariv en moman apropiye, e i ariv en moman en oportèn kot nou bezwen reflexir lo sa ki nou pe fer. E nou bezwen parey Mosyon i demann nou donn lankourazman bann dimoun ki pe lager pou nou. Sirtou sa msye ki reste lari *Serret* e ki travay *State House*. Ki son seve pe vin blan akoz i pe travay dir pour Sesel.

Nou bezwen koman en Lasanble – e mon ti a swete - E mon demann avek bann Onorab lot kote, zwenn nou dan sa demars. Me si zot pa pou zwenn nou, pa fer naryen. Nou lo sa kot latab, nou ava dir avek nou Prezidan; nou pe siport ou dan sa travay ki ou pe fer; *Well done! Champion. Carry on.* Mersi Mr Speaker.

(APPLAUSE)

MR SPEAKER

Mersi Onorab. Mon annan zis 1 Manm ki'n demann laparol ki reste. Donk, mon ti a kontan fer sir ki napa okenn Manm ki le entervenir. Akoz si napa, mon a kontinyen avek li, e i ava dernyen entervenir, e nou ava kapab terminen avek sa Mosyon. Onorab Loizeau?

HON NORBERT LOIZEAU

Mersi Mr Speaker. Bonzour tou dimoun. Bonzour tou dimoun a lekout. Mr Speaker, ozordi sa Mosyon i en Mosyon ki tre enportan. E ler mon'n lir Mosyon, mon vwar menm leokri ki Prezidan Ramkalawan pe kriye dan sak fwa i al sa bann *meeting* aletranze.

Sa leokri Mr Speaker, ki Prezidan e nou Lasanble ozordi nou pe kriye, se akoz nou Sesel koman sa pti leta zil, nou pa'n ganny eparnyen avek sanzman klima. Nou en pti leta zil, Mr Speaker, parmi tou lezot, ki'n anmas bokou e ki'n ganny afekte en bon pe sirtou lo nou rezyon lakot.

Mr Speaker, zis annou fer en pti letour. En pti letour nou bann zil. Pa zis isi Mahe, En pe partou Mr Speaker. Nou pou vwar sa sanzman. Sa sanzman lo lafason ki nou lakot pe ganny deteryore.

I annan serten landrwa, Mr Speaker, ki lontan ou ti

pase. Ozordi ler ou pase ou zis demann ou lekor; sanmenm sa landrwa ki ti ete detrwa lannen pase? Mr Speaker, in sanze konpletman. Kot serten parti, Mr Speaker, in ganny detri e tousala i an relasyon avek sanzman klima.

E ozordi Gouvernman. Gouvernman *LDS* dirize par Prezidan Ramkalawan, pe fer tou, parey Onorab Georges in dir, pou nou kapab sey rod en fason pou nou kapab *deal* ek sa sityasyon. E mon osi rekonnèt Mr Speaker, Gouvernman *US* osi in fer bokou. Annou onnet ek nou lekor. Gouvernman *US* in fer bokou an relasyon avek sanzman klima avek nou lanvironnman.

E mon konnen Onorab Cosgrow, i pe get mwan la. Onorab Cosgrow in partisip dan en ta keksoz pou lanvironnman Mr Speaker. Nou bezwen felisit li.

(APPLAUSE)

HON NORBERT LOIZEAU

Nou bezwen felisit li koman Minis. In deza Minis pou Lanvironnman. Nou bezwen admet Mr Speaker. Mon'n war li lo televizyon pe vizite Praslin. Zot in fer keksoz zot osi Mr Speaker, nou bezwen rekonnèt sa.

E mon ti ekspekte ki ozordi ti a partisipe Mr Speaker, pou li kapab donn nou son leksperyans. Mon konnen Onorab Cosgrow i annan leksperyans ladan aköz son pozisyon ki'n tenir.

Mr Speaker, dernyen fwa nou ti al en vizit *Desroches* avek Komite COGA. Onorab Lemiel pou rapel sa tre byen, avek bann lezot Manm. *Desroches* nou bann zil elwannyen Mr Speaker, zot osi zot pe ganny afekte.

Ozordi *Desroches* i annan en proze kot zot pou bezwen al met bann gro ron beton. Mannyer i apele sa? Bann *reef balls*. Zis aköz Mr Speaker? Lerozyon ki pe arive lo *Desroches*. Zot *reef* pe ganny andomaze. E zot lakot antye. Laroul Mr Speaker, nou'n vizite. Laroul i vin zwenn ou lo lans. E zot, zot pe antre dan sa proze pou met sa bann *reef balls* pou protez zot brizan.

E osi sa bann *reef balls*, Mr Speaker, i pa pou zis protez zot bann brizan. I ede, aköz i annan blansisaz koray ki bokou nou in koz lo la. I pou ede osi Mr Speaker, refer nou koray e refer sa lanvironnman otour zil dan en pli bon leta ki i ti ete avan.

Mr Speaker, nou'n vizit *Coëtivy*. *Coëtivy* nou ti al fer en

vizit ansanm avek Mr Lionnet ki ti la. Mon, mon ti dan transpor ek li. I ti anmenn nou lo sa bout *Coëtivy* kot en nonmen Mr Siva ti ganny *lease* pou fer en lotel.

Mr Speaker, i abandonn konpletman. Laroul pe ariv ziskan lo semen! Savedir i montre ou ki sanzman klima pe fer en ta dega. Pa zis isi Sesel, me osi lo nou bann zil elwannyen. Nou pa'n ganny sans vizit tou, me sa 2 ki nou'n vizite Mr Speaker, nou'n war pou nou menm. Komite in war ki degre dega sa pe arive.

Nou'n war osi, Mr Speaker, lo Praslin. Lo Praslin ki kantite destriksyon. Baie lazare. North East Point. Lo Praslin, Mr Speaker, ti annan en moman kot nou ti vwar kot delo sale ti'n ariv anba semen Grand Anse, Praslin ankouri pou al - Anse Korbizo menm mon krwar. Ankouri pou al dan Grand Anse laba, kot ti mat semen Mr Speaker. Sa i montre ki sityasyon i grav.

E tousala Mr Speaker, se bann keksoz ki'n ganny – Nou, nou en viktim nou. Sesel, bann pti leta zil, nou en viktim. Tousala se bann gran pei endistriyalize, Mr Speaker, atraver zot aksyon ki ozordi nou, nou pe sibir le konsekans.

Atraver zot bann gran, gran Lendistri, Mr Speaker.

Napa ki pa'n ganny large dan latmosfer. Ozordi tou bann lefe advers, se nou koman bann pti leta zil ki pe ganny – ki pe anmas tou sa bann konsekans.

E ozordi Mr Speaker, parkont, i annan serten – i annan serten gran pei endistriyalize ki pe seye fer serten keksoz. Me selman nou pa konnen ki zistans zot pou arive. Akoz menm zot pe seye, se zot ki'n kontribye plis dan sa gran destriksyon dan lemond.

Parey Lasin... Be ler nou ti Lasin, nou ti vwar bann prezantasyon mannyer Lasin pe sey – pe seye pou redwir en pe bann kemikal ki pe al dan later lo kote lagrikiltir. Mannyer zot pe sey tret zot bann larivyèr. Zot bann delo. Bann restan ki al dan lanmer.

E menm zot pe - lo kote salte. Onorab Pillay i okouran sa. Nou ti vizit en landrwa kot zot ti pe– *Jiangmen* mon krwar son non, si mon byen, kot zot pe servi *waste*. Zot pa pe met sa *waste* dan latmosfer. Zot pe servi li. Zot pe *turn waste into energy* atraver met li dan *incinerator*, bril li.

E sa lenerzi ki zot, zot pe – zot pe prodwi ozordi, zot pe *supply* sa rezyon antye avek elektrisite. Me selman nou Sesel, nou mwayen pa permet pou nou al lo sa nivo. Me petet

sa en keksoz ki nou merit konsidere.

Ozordi mon'n tann – mon'n tann i annan in koz lo *ozone*. Ozordi *ozone*, i annan serten keksoz ki nou, nou pa'n realize ki bann pei *west* avek bann pei – gran, gran pei endistriyalize - ki zot in servi ki apre in vin ganny *dumped* dan bann pei tyermonn. Bann *refrigerant*.

Mr Speaker, mon a plito servi en term ki tou Seselwa pou konpran. Bann *gas*. Bann *gas* ki met dan *fridge*, dan *aircon*. Se zot ki'n komanse. E ler zot ti'n' trouve. Parey ti annan en *gas* ki apel *R12*. Apre ki zot ti'n trouve, *R12* i annan *chloride*, e *chloride* ti pe ede pou fer sa trou pli gran dan *ozone*. E zot, zot ti deside pou zot sorti lo la, envant en nouvo *gas* pou ranplas li.

Me selman Mr Speaker, nou sa bann pti pei zil avek sa bann pei tyermonn Lafrik, nou, nou ti ankor pe servi *R12*. E zot, zot ti'n fini *move away from R12*, zot ti pe al lo en lot nivo. Apre zot desann zot vini. Ou konnen ki zot dir nou? Nou bezwen *phase out*.

E nou, Mr Speaker, nou napa lekipman. Mannyer nou pou *phase out*? Nou pou kennsel tou bann lekipman, ki nou pou fer ek sa bann

refrigerant ki ladan?

Tousala i annan Mr Speaker, in al dan latmosfer. Zot dir nou anmase. Ti annan bann *recovery machine* zot in montre. Pou anmase ki pou fer, pou reste dan sa masin? Zot pa'n donn okenn alternativ apre ki nou'n anmanse, ki nou pou fer avek?

Mr Speaker, tousala se bann keksoz ki'n arive kot nou koman sa bann pei sou devlopman, nou, nou pa'n konnen nou. Nou, nou'n servi akoz nou pe *follow* sa bann gran pei endistriyalize ki zot, atraver sa menm keksoz ki nou, nou pe servi – ki zot in servi e zot in detri, Mr Speaker.

E, ozordi ler mon pe get sa Mosyon – mon pou kourt Mr Speaker - mon pou siport Onorab William pou son Mosyon, Mr Speaker. Akoz sa Mosyon i en Mosyon ki byen. Akoz sa Mosyon i byen? Ozordi, nou bann pti leta zil, nou, nou en viktim. Nou, nou viktim sa bann gran pei ki'n okazyonn tousala.

Alors, ler nou, nou sa viktim, ki nou fer? Nou bezwen retourn ver zot. Akoz zot ki annan. Zot ki'n kree sa. Nou bezwen retourn ver zot, parey Prezidan Ramkalawan pe fer, i pe plenny ek zot. I pe dir ek zot; ed nou pou nou kapab rektifye

sa problem pou ki – Akoz nou Mr Speaker, nou en pei ki protez nou lanvironnman.

Ozordi, nou lavil. Si nou get nou lavil. I enn bann lavil ki *green*. Ki annan pye dibwa. Nou fer sir ki nou latmosfer i sen. Tandis ki ler ou al dan en pei – parey nou ti vizit Lasin. Onorab Arissol ti la - ou pe mars dan en *concrete jungle*. Son ler, son latmosfer parfwa ou get lesyel, ou pa war soley. Soley pe tape, ou pa war soley. E nou. Nou war sa.

Alors, i enportan pou nou protez nou pei, pou protez bann pti zil, Mr Speaker, i enportan ki nou al ver zot. Alors, Mosyon Onorab William pe demande pou ki i annan sa fon. E mwan, mon pou siport Onorab William akoz nou pti Sesel, nou tousel nou pa pou kapab fer li. Nou pou bezwen sa bann gran pei pou kapab ed nou pou nou kapab *meet* sa ki nou anvi fer ozordi. Mersi Mr Speaker.

(APPLAUSE)

MR SPEAKER

Mersi Onorab. Mon ava apel Onorab William pou son repons lo deba.

HON WAVEN WILLIAM

Mersi Mr Speaker. Mr Speaker, o debi mon ti a kontan remerisi

tou bann Manm ki'n entervenir lo sa Mosyon. Zot in anmenn bann diferan pwennvi. E lenformasyon pou ankor enn fwa edifye pep Seselwa vizavi sa size sanzman klima.

Mr Speaker, mon a osi profit sa lokazyon osi pou remersi nou Kreater ki ziska aprezan, nou pa ankor ganny okenn gran lensidan ki in anmenn bokou destriksyon lo nou pei. E mon ti a kontan ankouraz tou bann dimoun ki pe priye, ki pe entersedede lo sa size.

Mr Speaker, mon annan enn de lenformasyon mon anvi met ater pou tir latansyon. E sa i pa mwan ki dir, akoz mon pa en eksper, mon pa en syantis. Be solman, vizavi bann *panel* syantis in ganny kree vizavi sanzman klima, pe ganny predir ki sa 1.5degre *celsius* logmantasyon dan lasaler ki ti'n ganny predir pou ariv dan 2050. Me pe ganny dir la ki sa i kapab ariv ant 2037 a 2040.

So, Mr Speaker, i montre ki lemonn i annan rezon pou li konsernen e enkyet. Akoz nou tou nou konnen poudir avek sityasyon aktyel, lentansite lasaler, e si sa i kontinyelman ogmante. Par lefe ki ozordi nou pa pe vremen apresye ki i annan en *decline curve* vizavi logmantasyon dan lasaler.

Mr Speaker, in ganny osi predir ki bann pti pei zot pou depans apepre en tyer zot reveni anyel, pou kapab fer fas avek bann re laranzman, rekonstriksyon bann enfrastruktir. E ler ou pran li dan konteks Sesel, ou kapab imazinen kwa sa i vedir.

Mr Speaker, par egzanp si mon pe koz lo mon distrik - distrik Grand Anse, Mahe; kot laplenn Grand Anse, Mahe nou'n ganny dir ki *high water mark* i kot sa *court* - sa *multipurpose court*.

So, dan lavenir - dilon 2030/2050, ou kapab imazinen ki bor delo sale pou'n arive. E otomatikman pou bezwen sanz pozisyon sa bann enfrastruktir ki zot ete aktyelman.

Mr Speaker, me mon ti a kontan osi met devan ki sa *Loss and Damage Fund*. Letan zot pe koz lo la, zot pe koz li pou bann pei pov. E Sesel ozordi i trouv li dan en *Catch-22*, akoz nou ganny klasifye koman en *high middle-income country*.

E lafason ki bann zizman, bann kriter pe ganny servi pou ziz bann pei vizavi zot *gross national income*, Mr Speaker, I en kriter ki bezwen ganny revwar.

E mwan, mon pe fer en rekomandasyon avek nou bann dirizan ki letan zot al *COP28*, ki

sa size lo en *Multidimensional Vulnerability Index* i ganny osi debat lo la, ki enn; ki bann pei devlope zot rekonnèt ki poudir ozordi bann pti leta zil or bann pti *oceanic state*, zot pa kapab servi sa vye kriter pou ziz lafason ki larises en pei i ete.

Mr Speaker, si ou pran dan nou konteks. Mon krwar pandemi *COVID-19* in montre nou ki bokou pei pa'n prepare pou - bann pti leta zil pa'n prepare pou bann tel sityasyon ki anmenn en sok vreman entans ki konsern finansman. E i annan sa nesesite pou vwar ki dan lavenir, anmezir ki i annan plis lentansifikasyon menas.

Sesel, parey bann lezot pti leta zil, nou pou vwar nou pe fer fas avek bann kalamite ki si bann pei devlope pa pran li an konteks, Sesel pa pou benefisye otan parey ti merite. E lezitiman Mr Speaker, aköz enn; parey mon dir, nou pa pe polye otan parey bann pei devlope.

Mr Speaker, alors sa i en demann ki mon pe met devan nou bann dirizan aköz nou bezwen fer sir ki sa negosyasyon, sa bann diskisyon i pran an konteks sa *Multidimensional Vulnerability Index*. Sa i tre enportan pou

bann pti leta *oceanic or small island states*.

Mr Speaker, mon ti a kontan osi remersi *Secretariat* Lasanble, sirtou *Unit* Resers ki'n fer en bon kontribisyon vizavi sa Mosyon. Mon vwar poudir zot in anvoy en pti *report* ki ase byen detaye. Mon ti a kontan remersi zot e felisit zot, e ankouraz zot pou kontinyelman fer sa pou nou, aköz i ede dan bann deba.

Mr Speaker, alor koman en Lenstitisyon Lezislatif, i enportan ki nou osi nou donn sa sipor. Mr Speaker, ou menm ou konnen poudir o nivo *IPU*, delegasyon Sesel i pouse pou fer sir ki nou lavwa i kontinyelman tande, parey bann lezot Manm ki a lo nivo *SADC*, ouswa *PAP*, ouswa *CPA*, parmi lezot.

Alors nou ki annan sa *oversight role* nou bezwen fer sir ki nou osi nou swivre sa ki Legzekitiv pe fer. E an menm tan donn sipor, e ankouraz nou Gouvernman pou li kapab ganny sa lafors e kouraz pou kontinyelman pouse.

Alors, Mosyon dan lansanm pe demande ki nou Gouvernman i servi tou mwayen nesesser pou kapab fer sir ki enn; sa *Loss and Damage Fund* i ganny *operationalise* o pli vit posib. Mr Speaker, avek sa de pti mo, mon anvi

remersye tou Manm ankor enn fwa, e demande ki zot donn zot sipor anver sa Mosyon. Mersi.

(APPLAUSE)

MR SPEAKER

Mersi Onorab. Mon ava aprezan envit Manm pou vot lo Mosyon. Manm ki an faver, lev lanmen silvouple? Mersi. Manm ki kont? Lo Mosyon prezante par Onorab Waven William. 19 Manm in vot pour, 0 kont, e 5 in – e 7 in *abstain*. Alors sa Mosyon in aprouve par Lasanble. Mersi. Onorab Cosgrow, ou le pran laparol? Wi?

HON WALLACE COSGROW

Yes, Mr Speaker. Mersi bokou Mr Speaker. Mr Speaker, mon annan 2 *issue* mon ti a kontan *raise*. Premyerman en pwen klarifikasyon apre osi en *matter of privilege*.

Klarifikasyon Mr Speaker, dan sans ki ou a kapab gid mon lo ki mannyer mon pou prosede, an vi ki mon Mosyon pa'n ganny aksepte pou pase ozordi, malgre i ti lo *Order Paper*.

E malgre à *mon avis* in *pass the test of admissibility*, ou ava kapab gid mwan aköz mon pa konnen prezan si mon kontinyen *proceed*, si mon kontinyen prepare, ouswa si

mon bezwen amann mon Mosyon. So, mon *seek* ou gidans lo ki mon pou fer *going forward*.

Dezyenm Mr Speaker, mon ti a kontan met a ou latansyon, a latansyon Lasanble, ki mon santi dan sa prosesis ozordi, ki mon privez koman en Manm Lasanble, pou anmenn en Mosyon devan Lasanble. E pou fer serten diskisyon lo en deba ki mon krwar i preokip bokou Seselwa ozordi. Sa deba pansyon. E lefe ki ozordi en kantite Seselwa i war zot dan serten difikilte konsernan zot pansyon.

Mon santi ki mon privez pou anmenn sa *in the forefront*, e pou fer diskisyon pou ki pep Seselwa i a kapab petet – *or* Gouvernman i a kapab war bann solisyon kan mannyer nou amelyor sityasyon Seselwa, an relasyon avek zot bann pansyon. Malerezman Mr Speaker, Lasanble ozordi in *deny* mwan sa *right*. E, mon tre dezapwente. E mon pe proteste lafason ki sa in ganny fer.

E mon santi, Mr Speaker, lot kote latab dan mon pwennvi ou a krwar ti annan sa. Aköz ler zot in antre mon'n tann en serten koze konmkwa ki poudir i annan detrwa dimoun ki pe al koze. Ou a krwar zot in fini konpran poudir zot ti pe al koze

avan ki mon Mosyon. So, mon proteste Mr Speaker. Mersi bokou.

MR SPEAKER

Mersi. Mon a adres ou 2 pwen premye. Lo ou *matter of privilege*, mon ase konfidan ki mon'n swiv tou prosedir Lasanble dan lafason ki mon'n *manage* ou Mosyon. E si mon'n swiv prosedir e mon'n swiv *Standing Orders*, mon santi ki ou privez pa'n ganny afekte.

Lo ki mannyer ou pou prosede. Mon pou adres sa dan en pti moman. Premye avan nou fer sa, mon ti a kontan met devan zot, lopinyon *Attorney General*. Mon konnen kestyon in ganny leve si i bezwen lopinyon *Attorney General*, oubyen si Speaker ki devret fer sa desizyon.

Mwan, mon ti a dir, mon lopinyon i koresponn avek sa ki pou *Attorney General*. Alors si sa 2 lopinyon i koresponn, mon pa war okenn problem. Mwan mon santi poudir mon kapab *act* lo sa desizyon. *Attorney General* in rann mon en repons lo bann korespondans ki mon ti'n anvoy li avan pou en lopinyon. E in pas ase an detay.

E mon pou sirkil son repons pou tou Manm, pou zot war. In pas dan Konstitisyon. In montre ki *Standing Order 78* i

vreman baze lo *Article 90 of the Constitution*. E *wording* i preski egzaktaman parey. In fer komanter lo *Contingency Fund*, lo *Consolidated Fund* e lezot *fund* Gouvernman. In fer komanter lo *S.I 135*.

Tousala mon pou met a zot latansyon. La pou rezon zis senplisite, mon pou zis lir son konklizyon. E dan son konklizyon i dir; “*opinion of the Attorney General*”.

E son konklizyon i lir koumsa; “*We have considered the proposed Motion carefully and we are of the opinion that it falls within the scope of Standing Order 78 and Article 90 of the Constitution. As you are aware, Standing Order 78 places a restriction on the introduction of Bills, Motions and amendments that have a fiscal impact.*”

We have looked at S.I 135/2022 and note that regulation 2(d) of S.I 135 seeks to allow SDF employees to be permitted to retire at 60 years of age by way of the insertion of new regulation 8(A) into the Seychelles Pension Fund Benefits Regulations 2005. And importantly, (underlined), for these purposes, introduces a new regulation, 8(B) in the Seychelles Pension Fund

Benefits Regulation 2005 which reads as follows;

8(B) “The funds for the payment of pensions for members of the Seychelles Defence Forces under regulation 8(A) shall be provided to the fund by the Government for the period of time when the member is 60 to 64 years of age or any part thereof.

The effect of the motion seems to be to expend the benefits afforded to the SDF under regulation 8(A) of the Seychelles Pension Fund Benefits Regulations to include those who are otherwise entitled to a special public service pension under the Public Service Special Pensions Act 2017. Act 24 of 2017. And presumably to allow for such pensions to be paid for by the Government as from the age of 60 to 64.

In the light of this, we are of the very firm view that such a Motion would have the effect of imposing a charge on the revenue or other funds of Seychelles, in particular upon the consolidated fund. This is because any such policy proposal would need to be funded and the funding provided for in S.I 135 2022 was for the Government to in effect pick up the tab of any shortfall that would’ve been felt by the

SPF, Seychelles Pension Fund under normal conditions”. Sa i lopinyon Attorney General e mon aksepte e mon concur avek son lopinyon.

Lo keston ki mannyer Onorab Cosgrow i kapab prosede? Mon a dir parey mon'n dir avan. Si i kapab anmenn son Mosyon dan en fason ki i pa sanz li konpletman, me ki i evit komplikasyon ki i anmennen pou funds of Government, e osi anba S.I 135. Mon a – avek bon konsiderasyon waive peryod ki i bezwen pou anmenn sa amendment. E nou a kapab pran li demen.

Lo size - i annan en pwen ki ti ganny leve. E sa se si son Mosyon in ariv lo Order Paper, e si i annan posibilite pou retire. Si Speaker i extend ziska kapab retir son Mosyon lo Order Paper. Mon pa'n retire. Mon'n postpone.

Me selman mon fer kler ki Standing Order 78 i dir “The Assembly shall not proceed on any motion”. Pou mwan, sa term ‘proceed’ savedir ou kapab adres sa nenport kle moman, menm si Mosyon in ariv lo Order Paper. E menm si in ariv ler ki i ti pou al konsidere. E menm si i ti'n komans ganny konsidere.

Akoz ‘shall not proceed’. Dan mon fason se dir; ou pa al

pli lwen avek ler ou fer sa desizyon. Mersi bokou. Sa i mon *ruling*. Mon konpran.

Mon ou envit Onorab Cosgrow e avek Onorab Pillay si zot annan okenn diskisyon ki zot fer – ki zot anvi fer lo prosedir, lo ki mannyer i kapab fer. Zot kapab war mwan. Me mon'n adres tou *Standing Order* ki mon'n war neserer dan sa *ruling*. E mon'n adres tou *point of order* ki'n ganny leve. Lasanble pou *adjourn* e nou a rebran travay demen *matin*. *Adjourn*.

(ADJOURNMENT)